

宛

卷


第

藏

江蘇古籍出版社

古逸民先生集

南海百詠 史詠集



崔舍人玉堂類稿

江蘇古籍出版社

宛委別藏

(清) 阮 元 輯

江蘇古籍出版社出版

江蘇廣陵古籍刻印社整理

江蘇省新華書店發行

上海市印刷七廠印刷

開本：七八七×一〇九二毫米 三十二開

印張：一八九七·七五 插頁：四八〇

一九八八年二月第一版

一九八八年二月第一次印刷

ISBN 7-80519-073-9/Z·13  
定價：（全120冊） 2550 圓

崔舍人玉堂類藁卷第一

內制

王淮除樞密使制

門下象著三辰斗極上通於帝紀政分二柄機廷  
內總於兵權朕振長策以御邦綜大綱而撫世永惟  
軍國之任竝繫安危之圖茲有良臣久司右府旣協  
同於人望亦灼見於朕心遂升班聯乃重委寄涓以  
吉且諗于羣倫具官王淮剛正而守中高明而持重  
質諸天地言顧行以無慙發自朝廷實浮名而有裕  
曩踐政路歷宣賢勞調娛萬微綏靖四國逮進登於

宥密益具罄於忠嘉尊俎之畫消難於未形帷幄之言進規於不逮事必汝訪謀無予欺邦其尊榮民以寧壹朕稽參古誼簡畀事權勃輔漢家實倚本兵之重彘謀越國亦專主外之長是用誕頒恩書升正使號式序爾位亞端揆以同登克壯其猶秉神樞而獨制仍陪戶邑併陟文階是由至懷庶表優禮於戲賢人之業可大副予體貌之崇天下之務惟幾藉爾精神之運勉堅壹意沆底多盤可特授樞密使太中大夫依前東陽郡開國公加食邑一千戶食實封四百戶主者施行

皇叔祖士歆除節度使制

門下朕恢崇王化斐迪民彝高廟神靈仰慶源之有  
遠周家忠厚閱宗室之多賢眷我茂親繫時令望錫  
是褒典告于治朝皇叔祖具官士歆天稟粹資世憑  
華問長富貴之守汔無流心服詩書之聞克有常德  
約已自循於防範會朝不爽於威儀率其賢猶昭乃  
燕譽朕顧視在列慨興自懷念東平之世家是存典  
則攷南陽之帝屬茲見老成維歲月之深長曾寵光  
之未繼是用稽仁祖推恩之詔酌徽皇考績之常斷  
於深衷渙此茂命披圖按地肇開舊甸之藩揆日□

壇顯授元戎之節仍加采邑併行真番口循成規口  
示優禮以重犬牙之勢以崇麟趾之風於戲保乂我  
家有衍蕃昌之緒虔恭爾位無忘敦叙之盟尚迪前  
修益綏後福可特授保康軍節度使依前提舉佑神  
觀加食邑五百戶食實封二百戶封如故主者施行

趙雄轉官加恩制

淳熙六年四月五日係國  
史日歷所修纂到隆興以

後日歷奏成  
篇秩轉一官

門下良史立編年之法日繫月而事明聖王持厲  
世之權賞當勞而下勸眷維元輔方秉洪鈞迨茲載  
筆之書嘉乃提綱之績爰推茂典咸告明廷具官趙

雄敦大而直方宏深而開亮守持仁義會歸六籍之  
醇奮發文章度越百家之上膺受帝賚延登宰司迪  
忠純之度而鎮定四方闢公正之門而甄序庶位繫  
爾熙績維予仰成朕祇荷慈謀紹膺寶位志勤道遠  
念歲月之深長業鉅事叢賴簡編之有紀嘗詔紬書  
之彥趣聞汗竹之期曾不淹遲沆茲告備藏之金匱  
雖天子之不可觀副在京師將後來之有足證肆稽  
故實並答勤勞是用涓以剛辰渙茲顯號進陟文階  
之峻陪敦戶食之豐咸輯榮章用昭優禮亶維國體  
亦重民瞻於戲君舉必書每深懷於兢畏衮職有□



尚終藉於彌縫庶集勲庸益光方冊可特授正奉□  
夫依前右丞相魯郡開國公加食邑一千戶食實封  
四百戶主者施行

王淮轉官加恩制 同前

門下聖人之道布方冊事乃著於無窮王者之賞  
酬勲庸法宜先於自近眷言英館適告成編維今輔  
翼之臣有昔纂修之績逮議勞而錫寵廼出命以揚  
廷具官王淮資正而行恭量宏而識遠萃天地之和  
氣悉集于躬究古今之道原遂臻其奧延登與政超  
冠本兵從容聲氣而多整暇之規密勿謀謨而見深

長之慮國所嘉賴民其具瞻朕率循彝章遴選羣彥  
迭居遞宿俾並聚承明之庭廣記備言乃汜成傳信  
之典比觀剡奏已就珍藏審篇帙之寢繁撫歲年之  
逾邁治弗加進曾敢怠於圖回史不絕書將何堪於  
紀述豈伊碩輔可廢前勞是用卜涓剛辰推畀茂典  
既厚加田之富仍超進秩之崇萃厥寵榮光其翰墨  
亶維國體適協予懷於戲春秋謹嚴既具循於筆削  
夙夜宥密尚深勉於贊襄克咸厥功同底于道可特  
授通議大夫依前樞密使東陽郡開國公加食邑一  
千戶食實封四百戶主者施行

趙雄轉官加恩制

淳熙六年七月二十二日  
勅令所修進一州一路

賞格法  
轉一官

門下朕統萬宇以建中摹百王而作則設官庀事酌  
求憲度之宜涓日奏篇鋪閱章程之備悉條功緒優  
答勞能爰疏進律之恩首逮提綱之宰渙此丕冊告  
于明廷具官趙雄才鉅而識高器全而量遠望王商  
之威重自見中朝之尊資元齡之智謀乃能大事之  
斷攄爾賢縕調予化元忠勤載于王家潤澤施于方  
夏朕並建官師之重外釐職務之繁四方是維既因  
宜而辨等三尺安出亦量事以疇庸居樂土而猶號

要荒當平世而尚憂邊鄙仍久經於歲月已浸失於  
科條委曲私情蔓延竒請嘗令刊定沆告裁成損益  
畢協其中重輕各隨其當有勞必賞士安意於脩方  
無隙可容吏沮心於舞法更存彛典之舊徐俟它時  
之行凡豈予能良皆汝作旣懋功而自近盍出號以  
居先是用協于至懷加以顯命峻文階而進位拓采  
戶以增畚益聳羣瞻具昭優禮於戲政無常善固宜  
參合於事情令有必行時乃綱維於國體宋璟以守  
文而隆至治裴垪以持法而贊中興罔俾先民遂專  
前美可特授宣奉大夫依前右丞相魯郡開國公加

食邑一千戶食實封四百戶主者施行

皇叔祖士鞅明堂轉官加恩制

門下朕覽簡策之傳達神明之德奉聖以進魯史先  
九族之親徹豆而歸周詩同諸父之樂比涓商序初  
饗合宮重陰開裸廟之辰杲日麗登樓之旦嘉應顯  
答美祥大來逮敷祭澤之行宜厚宗盟之長具官士  
鞅行恭而志飾資粹而量闕樂以詩書自秀慶靈之  
胄守其富貴不踰法度之間夙和順以積中迄耄期  
而稱道朕仰懷英廟追厚濮園三靈之休燕及於苗  
裔萬代之祀同符於祖宗眎其象賢嘉乃耆老慨歲

年之逾邁閱寵數之未隆是用因此熙成優於商賚  
珣戈導節仍開名壤之藩通帛舒旌高進亞師之位  
陪敦井實申衍戶畚於戲東西九筵旣擁純釐之下  
本支百世遂膺景福之同尚服殊私益綏吉履可特  
授少師依前昭化軍節度使充醴泉觀使嗣濮王加  
食邑七百戶食實封三百戶令所司擇日備禮冊命  
主者施行

皇兄居廣明堂轉官加恩制

門下朕練辰商籥蠲饗合宮順昆侖以登祗見上帝  
躡泰階而下宣延羣神于時大宗小宗伯父叔父口

奔走恭事或肅雍侍成肆哀順備之休爰厚神明□  
胄具官居廣端方而和裕夷易而醇深樂善有休獨  
標玉葉之秀流光自遠茂迪璿源之長居無驕溢之  
心動有寅恭之度朕奉承慶緒監用丕彝隆形勢於  
本朝臨制夷夏合親族於高位顯榮邦家推原瓜瓞  
之來興念常華之近是用因茲惠術厚以恩章犀甲  
熊旗仍領名藩之重篆車希冕超登亞傅之崇併衍  
爰田更增真食於戲天地並況豈予涼菲之能兄弟  
具來實爾柔嘉之則尚膺同福益固純猶可特授少  
傅依前岳陽軍節度使充萬壽觀使永陽郡王加食

邑七百戶食實封三百戶令所司擇日備禮冊命主者施行

王淮修進 四朝史志轉官加恩制

門下史書萬世之準謹載策所以昭先猷爵賞一人之權優儒勞所以敬大典時維上輔位冠洪樞肆疇載筆之勤遂亶揚廷之號具官王淮德成而行飭氣粹而才全中正以通動不踰於防範優游而法徐可考於宮庭發摠賢猶秉執幾務識慮周密謀靖深朕仰惟四聖之隆昭揭百王之表接太初之後猶闕念當謹於纂修視班固之下何紛慨莫歸於折衷曩



一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十  
二十一  
二十二  
二十三  
二十四  
二十五  
二十六  
二十七  
二十八  
二十九  
三十  
三十一  
三十二  
三十三  
三十四  
三十五  
三十六  
三十七  
三十八  
三十九  
四十  
四十一  
四十二  
四十三  
四十四  
四十五  
四十六  
四十七  
四十八  
四十九  
五十  
五十一  
五十二  
五十三  
五十四  
五十五  
五十六  
五十七  
五十八  
五十九  
六十  
六十一  
六十二  
六十三  
六十四  
六十五  
六十六  
六十七  
六十八  
六十九  
七十  
七十一  
七十二  
七十三  
七十四  
七十五  
七十六  
七十七  
七十八  
七十九  
八十  
八十一  
八十二  
八十三  
八十四  
八十五  
八十六  
八十七  
八十八  
八十九  
九十  
九十一  
九十二  
九十三  
九十四  
九十五  
九十六  
九十七  
九十八  
九十九  
一百

煩碩望俾領羣英推沿革之大原綜見聞之異論既  
淹歲籥沆就志書是用褒答前勞推加懋典文階進  
位踵舊秩於隋官公社開疆肇新封於越壤寵光滋  
至體貌逾崇豈協彝章曷由隆遇於戲張越專文學  
之任輔至治於唐朝侯霸條法度之宜贊中興於漢  
室尚殫素蘊益究宏圖可特授正議大夫依前樞密  
使進封信國公加食邑一千戶食實封四百戶主者  
施行

史浩除少師制

門下出處人臣之大致世難名節之全爵齒天下之

達尊國繫典刑之重眷言元老留處內祠茲具諭於  
誠衷願卽歸於田里用錫爾祉式邁其行具官史浩  
才巨而識明德全而行備履常無競恂恂忠厚之風  
樂善有容渾渾沉沉之度委釋經綸之任從容間燕  
之談神明未衰於前賜問相望于道方深厚遇遽起  
冲懷叩黼座以攄辭壘囊書而瀝請自陳歲月之邁  
必丐山林之安承晝接之親每罄嘉猶而啟告引夜  
行之戒乃思高蹈以全榮念感會之有初閱老成之  
無幾朝批章而大息暮覽奏以長思重違乃情圖畀  
厥寵是用渙揚茂命聽便故鄉旌轂趨朝進亞師之

服位龜蒙奠壤開廣魯之山川行以新畬仍其舊節  
維名與器俾壽而昌於戲敷求前聞優待耆德皇祐  
之詔二老設几以須熙寧之遇四臣齎書而訪尚有  
斯禮勿遐爾心可特授少師依前保寧軍節度使充  
醴泉觀使任便居住進封魯國公加食邑一千戶食  
實封四百戶令所司擇日備禮冊命主者施行

王淮除右丞相制

門下人主論一相政綱舉則庶績熙上賢爲三公儒  
術行則大治起朕選建哲輔協圖康功夜夢想以營  
求朝詢咨而博采帝賚予弼夙推咸德之良民具爾

瞻茲屬已然之効渙此休命告于明廷具官王淮諒  
直而渾深清明而敦實以貫通三極之學發於宏毅  
之資以運理萬物之才行以安和之度更踐政路勤  
施王家奮明略以憲邦抱純誠而事上逮冠宥府益  
聞嘉猷辭氣從容幄中之畫已定精神孚達天下之  
患自消泯功用於不言贊謀謨於獨運朕厲精求治  
望古典懷皇天付予以生民念當躋於富厚太上授  
予以丕業思盡復於昇平撫歲月以浩然履基圖而  
惕若疇若予采適求其寧是用酌于師虞畀以宰柄  
崇其體貌旣超漢爵之階徹彼山川仍奠閩邦之壤

因念安危之寄固難文武之分俾兼元樞遂合大政  
具昭眷倚茂輯勲庸於戲歷考帝王之盛朝永懷臣  
主之亨會譬諸脩漢爾其爲羽翼以遊喻彼洪濤爾  
其爲舟楫以濟緬膺懋典益究宏圖可特授光祿大  
夫右丞相兼樞密使進封福國公食邑一千戶食實  
封四百戶主者施行

明堂大禮御札

勅内外文武臣寮等朕參稽禮文鋪究古制圓壇八  
陛雖茂展於欽柴明堂九筵亦間行於嘉饗重循寡  
德祇荷慈謀屬茲三歲之期當舉一純之祀夜觀房

宿之象旦閱奉高之圖愧于菲躬曠是懿典況今景  
緯循軌嘉生遂宜幽明統和中外寧謐宜乘亨美之  
會庶答神靈之休是用遠稽皇祐之書近述紹興之  
制因秋成物聿嚴天地之禋遵國彝章竝陟祖宗之  
配誕敷大號明戒先期朕以今年九月有事于明堂  
咨爾攸司各揚其職相予祀事罔或不恭故茲札示  
想宜知悉

賜科舉門下詔

門下蓋聞人材衆而邦國寧儒術行而治化美思皇  
多士周竝命於六卿間出異人漢旁開於數路洪惟

聖代丕闡文風旣通才碩學之攸興乃鉅德元勳之  
相望逮予菲質率是彝章屬覽有司之陳當修貢士  
之制爰加詔諭咸俾言揚獻賢能之書儻精求而上  
達陳治安之策庶廷進以周詢豈襲虛文尚圖實用  
布告中外明識朕懷

崔舍人玉堂類藁卷第一

崔舍人玉堂類藁卷第二

內制

史浩明堂加恩制

門下朕欽承慈訓丕講明禋燎煙焜而精意升銷玉  
鳴而和聲倡戎有良翰莫陪執豆之駿奔史無愧辭  
敢侈祝釐之專鄉誕敷褒冊敷告治朝具官史浩寬  
裕而純明惠和而忠肅奧學探天人之致懿文鈎造  
化之微感會潛藩賴直諒多聞之益燮諧初政見彌  
縫藏用之功誠信久而自章謀謨遠而可績比疇宿  
望往撫全閩煌煌鉅鎮之旌旄奕奕上公之袞繡□



此大惠沆其外庸屬當迎日之長誕舉就陽之祭美  
光旁魄恍萬象之留俞靈稜鴻平紛百祥之緼豫肆  
頌慶澤加勞宗臣申衍圭腴陪敦井賦於戲六變致  
天神之降朕惟備罄於齋精十倫見爵賞之施爾尚  
克蒙於商賚祇膺明命益勵壯猷可特授依前宗信  
軍節度使開府儀同三司判福州軍州事提舉學事  
兼管內勸農使充福建路安撫使馬步軍都總管奉  
化郡開國公加食邑一千戶食實封四百戶主者施  
行

鄭藻明堂加恩制

門下朕祇循彝典丕歲盛容奠華璧於園丘裸黃流  
於太室爲能饗帝敢歸福於朕躬時庸展親爰覃休  
於戚閱肆頒明命亶告大庭具官鄭藻肅括禔身靖  
共謹度周申伯之柔惠宜厥家邦漢陰尉之忠平保  
其祿位衮服視公台之貴駢旄高將閫之華從容間  
館之遊委逮盛權之地屬時休運昭舉明禋泰壇八  
弧具嚴牲幣宮隅七雉全倚親賢汜茲熙事之成可  
後顯庸之報申加多邑併衍真畬於戲受宣室之釐  
朕每懷於寅畏賜伯舅之昨爾尚克於欽承益保令  
圖永堅素履可特授依前保信軍節度使開府儀同

三司充萬壽觀使武功郡開國公加食邑五百戶食  
實封三百戶主者施行

吳拱加恩制

門下朕涓選休成稱秩元祀靈旂下而虞席美光燭  
而昭廷天其相民誕錫履洪之福予有禦侮阻陪扈  
衛之勞徹俎均釐敷朝渙號具官吳拱才全而行果  
志大而氣剛用兵法若珠之走盤摧敵鋒猶刃之破  
竹當百年勝殘之會共起壯圖念三世爲將之家獨  
懷冲尚擁大纛高牙之貴從珍臺間館之遊比歲盛  
容用虔美報皇矣上帝博臨中壇念茲戎功越處外

服肆輯神娛之厚肇開公社之崇加畀爰田申陪奠  
賦於戲予惟奉若於天命哀對純休爾尚追配於前  
人答揚明訓勉堅忠節嗣奮勲庸可特授依前捧日  
天武四廂都指揮使武康軍節度使提舉興隆府玉  
隆觀進封武功郡開國公加食邑五百戶食實封二  
百戶主者施行

蒲察久安明堂制

門下朕躬三歲之明禋候一陽之初籥駢犧豐碩瑄  
玉潔溫來燕來寧旣畢合祛之禮有嚴有翼爰嘉在  
列之英揚于大廷綏以多福具官蒲察久安疏通而

能斷沈毅而善謀日磬常侍於宴游忠誠自著契苾  
久更於戰鬪驍勇無前參希冕於孤班擁崇牙於將  
閫寵名赫奕恩數便蕃比修美報之容實賴駿奔之  
助出則驂乘旣亮純衷祭有歸膳厥存彝典陪敦多  
邑申衍真畬於戲展采錯儀誕受於萬年之祜發爵  
賜服敢遺不二心之臣勉答殊私益圖顯績可特授  
依前檢校少保大同軍節度使提舉萬壽觀奉朝請  
通化郡開國公加食邑五百戶食實封二百戶主者  
施行

皇弟居中明堂加恩制

門下朕荷天駿命攷古上儀裸廟告虔靈陰陰而般  
雨登壇展采光穆穆以流波聲氣協同神祇歡喜迄  
成盛典實賴懿藩禮旣作於恭先恩宜從於親始肆  
頒渙號用錫褒章皇弟具官居中質厚而氣溫身端  
而行治雍容道義渾然忠孝之資涵泳詩書展矣豪  
英之譽主粲盛於益廟授旄鉞於齋壇率履罔愆飭  
躬匪懈維時禋祀之舉誕輯靈明之休有來雝雝贊  
予熙事厥猶翼翼嘉爾粹容奉籩豆以無違執圭璋  
而有恪受茲介福惟上帝弗異於下房綏乃思成念  
他人不如我同姓陪敦采邑申衍腴租於戲登漢歌

之十九章朕敢專博臨之施維周基之八百載爾其  
堅夾輔之圖勉迪令猷欽承丕訓可特授依前保康  
軍節度使權主奉益王祭祀天水郡開國公加食邑  
五百戶食實封二百戶主者施行

成閔明堂加恩制

門下朕紹膺景命哀對純休奠幣圓壇卽四圭而錯  
事回輿端闕第五玉以疏封慶賜畢行通遐咸喜武  
侯承德眷乃舊勞媪神蕃釐敢茲專鄉疇咨在服明  
聽作猷具官成閔沈毅而不回端莊而有立凜凜冠  
軍之勇扞我王家煌煌敵愾之勲藏諸盟府自釋轅

門之重久安琳館之間據鞍雖緩於請行擐甲猶聞  
其可用屬涓今日祇歲精裡黃鍾奏而靈嘉虞紫幄  
張而神安坐駕龍十二允嚴天仗之徐驅被練三千  
適阻戎車之密護肆均慶澤誕輯徽章增衍圭腴申  
加并賦於戲觀時而行典禮朕方茂講於稷容帥師  
而修封疆爾尚勉思於遠馭欽承丕訓益展壯圖可  
特授依前慶遠軍節度使提舉江州太平興國宮武  
功郡開國公加食邑五百戶食實封二百戶主者施  
行

悉里地茶蘭固野明堂加恩制



門下朕欽承帝事穆卜天正權火升而雲杳冥玉梢  
舉而星明潤美應昭答嘉祥大來辨位設儀尚阻鸞  
旂之戾考圖數貢實存象譯之通爰輯慶章用敷顯  
冊具官悉里地荼蘭固野宅心淳固秉德直溫山川  
土田奄先世之賜履聲明文物賴本朝之假靈本恭  
儉以守邦推寬慈而撫衆修方彌切率職無違維時  
景運之隆丕講圓陔之饗四方和會多士駿奔雖地  
隔重溟後諸侯之來助祭顧天無暴雨知中國之有  
至仁通周道以輸誠款漢闕而慕化肆均商賚敢緩  
褒康是用陪敦采邑之豐申衍圭畬之實萃茲異數

昭乃洪休於戲福祿來崇夙夜永懷於基命會同有  
繹春秋尚謹於承王祇服寵榮益堅忠順可特授依  
前檢校司徒使持節琳州諸軍事琳州刺史充懷遠  
軍節度琳州管內觀察處置等使兼御史大夫閭婆  
國王加食邑五百戶食實封二百戶散官勲如故主  
者施行

曾懷除右丞相制

門下三台宣符色齊明而星度正二氣播物和咸  
感而歲功成廼眷耆賢夙居揆路屬懇辭之游至式  
遄其行逮疑謗之洞開使復其位敷予有命告爾在

廷具官曾懷端重而無華寬仁而有裕學探古今之  
緼氣涵天地之全才略濟繁更百爲而彌劭智謀經  
遠周萬變以皆通蚤簡深知歷敷要任有績咸入靡  
勤弗宣迄登政地之庸旋正宰司之體從容調娛而  
協時幾之會造次啟沃而陳久大之圖心休休而善  
容猶翼翼以祇畏還觀忠實益厚倚毗嘉宏業之方  
隆駭流言之不靖爰徇告歸之請俾從均逸之私朕  
廣開至正之門茂建大中之極攷昔君臣之相遇允  
繫於同心維時上下之弗交亦先於除間肆詳加於  
審覈已備見於昭明又缺我斯念稍違於近輔疇若

予采恐浸墮於前規是用誕錫恩章趣還鼎席總領  
繁機之要燮諧大化之元具袞衣而迎周公庶率循  
於往訓啟延英而待裴度已欽佇於嘉猷仍進文階  
併增井賦是爲殊寵亶穆輿情於戲無競維人有孚  
在道日月照矣茲盡釋於嫌猜股肱良哉宜力圖於  
報効尚堅素節永翌丕基可特授光祿大夫右丞相  
加食邑一千戶食實封四百戶封如故主者施行

楊倓除節度使制

門下奉祠官而均逸久參儒職之華開將聞以展  
容盡示恩章之異眷維禁路時有俊臣推予褒賞之

能作爾功名之會誕敷丕冊乎告大廷具官楊俊渾厚而雄深方嚴而肅給忠義由於世濟通明稟於天資才略應繁刃發劓而有裕智謀周變龜獻兆以無遺歷更事任之宜積著勞能之盛逮司國用具觀運理之長旋卽里居采見靖共之譽茲被張旌之遣曾無引道之難是用申錫溫綸優加茂典建齋壇而授節撫瓊管以殿藩明庶以功實參圖於素効會紹乃辟尚追繼於前規仍從仙館之遊復啓侯封之寵陪敦采邑增衍真畬於戲治匪異塗材難具美文武維憲爰得亮邦之賢威儀則多是昭馭貴之體克祗茲

訓益固乃猶可特授靖海軍節度使依前提舉佑神  
觀進封繁峙郡開國公加食邑五百戶食實封二百  
戶主者施行

曹勛除開府制

門下朕總搢宏綱照臨庶位不遺故舊爰興忠厚之  
風尚有典刑盍示褒崇之體睠維耆德久護宸居肆  
輯徽章庸敷渙號具官曹勛宅心和裕稟質粹溫中  
正以通動悉由於防範優游而法居自守於宮庭始  
終歷事於四朝夷險備更於百致還觀操履靡見瑕  
疵嘉乃謙虛嘗遂垂車之逸倚其親信莫從遺俗之

高起司夕櫟之嚴密告辰猷之益周旋匪懈誰問無  
違顯有休庸具孚雅望朕眷懷夙昔慨念忠勞誦行  
葦之詩庶幾有翼攷正元之士今已無多方資宿衛  
之勤尚喜儀刑之近豈無優禮式表殊私是用涓以  
剛辰發茲茂冊皇皇衮繡晉參揆路之崇奕奕旌旄  
仍領戎旃之重陪敦采邑申衍圭畚並協朕衷是循  
國典旣隆予寄亦獎爾修於戲泰階六符已超躋於  
朝位周廬千列諒增壯於軍容臨寵而懼則名乃休  
處高而卑則福斯永祇承明訓勉迪令圖可特授開  
府儀同三司依前昭信軍節度使提舉皇城司加食

邑五百戶食實封三百戶封如故主者施行

葉衡進玉牒轉官加恩制

門下朕祗承慈謀紹履休運駿命弗易推厥璿源之  
長大事必書載諸寶牒之重繫我碩輔舉茲宏綱誕  
敷寵章咸告庶位具官葉衡道方而行果器遠而材  
閎多識前言夙知述作之體明習故事遂達典刑之  
原延登台階亶穆輿望乃績時乂斯謀日宣朕追懷  
先猷垂佑後嗣繇烈祖啟神明之胄暨真皇膺熙洽  
之圖維緒次之不可失其傳維謨烈之不可忘其紀  
逮于登進賴爾裁成御正殿以鋪觀闢廣儲而崇奉



文昭武穆見於萬年之休帝德王功具不一書之實  
事開廟社慶集臣民相時稜容迄成此禮申衍戶畬  
之富超躋秩序之崇庶優賢勞亦表眷遇於戲晉室  
著皇宗之譜庸示無窮漢家秘金匱之文固將有采  
尚堅純節永翊丕基可特授正奉大夫依前右丞相  
兼樞密使加食邑一千戶食實封四百戶封如故主  
者施行

趙雄除右丞相制

門下朕紹天休運持國永圖內懷未究之規摹外愧  
難成之功業長撫遠馭將恢不世之基達識通材庶

獲非常之輔有赫延登之命無逾歷試之賢具宣乃  
猶咸告爾衆具官趙雄器全而用遠實大而聲聞臨  
事善謀端若元龜之信當機立發沛如流水之原蚤  
膺深知即踐要路攷其才恢恢而有餘地驗其策斷  
斷而無空言灼知俊心可倚大任遂付以政用宏乃  
庸周旋三時醇亮一節以智畧通明贊朕事以道德  
寬大廣朕心民言維嘉國論以壹朕敷聞古昔注想  
英賢以言寤合則曷究於深誠以象營求則固非於  
素望念此選舉疚于夙宵有能奮庸協我昌明之會  
曾是在位得茲碩大之臣是用誕敷恩綸登授相柄

廣宣厥道俾盡展於良規無棄爾成尚汔終於顯績  
申加采邑超進文階竝出眷懷是崇體貌亶茲注意  
維以蒙休於戲邃古之治益遙真儒之効浸寡維身  
克正卿士庶尹無不宜維心克誠陰陽四時無不序  
勉摠素蘊永底丕平可特授右丞相正議大夫依前  
魯郡開國公加食邑一千戶食實封四百戶主者施  
行

崔舍人玉堂類藁卷第二

崔舍人玉堂類藁卷第三

批答

賜劉懋上表再辭免加食邑食實封不允仍  
斷來章批答

朕比卜景至承神嘉壇禮成休明福嘏綏輯豈曰予  
一人之能今靈釐之下不敢遺小國之臣而吾戚畹  
之愛既親且賢如卿者乃以多辭何哉惟天休之不  
可稽惟朕命之不可格往宜祇服毋復重陳

賜姚憲上表再辭免除參知政事不允仍斷  
來章批答

朕祇承慈訓嗣守慶基有綱紀萬事之緒而未克成  
有經營四方之志而未克遂遐想遠慕予心漠然深  
求治原匪賢曷濟卿方大之德通明之資迪知朕衷  
登進樞筦審固足以定幾事淵微足以贊明謨經之  
遠猷倚以修輔夫才難適於時會道常待於世興繫  
欲恢盛大之圖馳寥廓之見自非開亮卓偉邦之瓌  
英孰與共吾事哉僉曰汝諧政將安往趣其祇服沆  
以仰成

賜葉衡上表再辭免除端明殿學士簽書樞  
密院事不允仍斷來章批答

負經世之才者常畫於無志懷許國之志者又病於無才才志具矣時不爾與亦未見其能成功也卿學術宏深器資方重練達萬變而智與幾會忠實一意而謀皆予同召從留都進長禁路察其可任斷以不疑今天下之事所當爲者衆矣朕方夙夜宥密不遑康寧求其遠且大者亦惟爾左右帷幄之臣是咨是度濟于丕成儀圖壯猶參翊神務素所注東宜無踰卿亟奮而庸助起予治區區謙避靡懌厥聞

賜王友直上表再辭免除奉國軍節度使加食邑食實封不允仍斷來章批答

一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十  
二十一  
二十二  
二十三  
二十四  
二十五  
二十六  
二十七  
二十八  
二十九  
三十  
三十一  
三十二  
三十三  
三十四  
三十五  
三十六  
三十七  
三十八  
三十九  
四十  
四十一  
四十二  
四十三  
四十四  
四十五  
四十六  
四十七  
四十八  
四十九  
五十  
五十一  
五十二  
五十三  
五十四  
五十五  
五十六  
五十七  
五十八  
五十九  
六十  
六十一  
六十二  
六十三  
六十四  
六十五  
六十六  
六十七  
六十八  
六十九  
七十  
七十一  
七十二  
七十三  
七十四  
七十五  
七十六  
七十七  
七十八  
七十九  
八十  
八十一  
八十二  
八十三  
八十四  
八十五  
八十六  
八十七  
八十八  
八十九  
九十  
九十一  
九十二  
九十三  
九十四  
九十五  
九十六  
九十七  
九十八  
九十九  
一百

朕敷求良將槩見前書若周亞夫之治軍足嚴國體  
如祭征虜之潔已自得士心豈無若人用勸武服乃  
睦在位時維俊臣卿性稟沉雄材資敏銳總予周衛  
賴爾壯猶謹廉尤務於無私訓練悉聞於有紀載觀  
規畫深協眷懷惟器與名已峻齋旄之拜能謙必豫  
尚披遜牘之陳宜即欽承毋勤重請

賜葉衡上表再辭免除參知政事不允仍斷

來章批答

朕嗣隆丕緒寅念永圖朝忘食以就功夜振衣而思  
治疇若予采亦惟直方持重之臣用乂我民俾有安

樂得賢之福卿器資淳固識慮淵通才周文武之宜  
學洞古今之蘊忠勤一節自結朕心出入百爲浸崇  
人望比召從於帥閫卽登踐於樞廷謀猶具宣風績  
逾劭肆晉參於大政實素定於至懷碩大無朋當愈  
堅於獨立溫恭有恪尚益效於同寅方倚佇於交修  
奚游形於冲避令維無反時乃可行宜亟欽承毋容  
重請

賜徽猷閣學士太中大夫提舉佑神觀楊俊  
上表再辭免除靖海軍節度使簽書樞密院  
事進封鴈門郡開國侯加食邑食實封不允



仍斷來章批答

朕纘紹慶基規恢大業廣運文武庶底安彊之功延  
覽英豪共圖長久之道卿材猷敏達識畧精明夙濟  
美於勲門存宣勞於禁路克有休績具昭遠猶肆授  
鉞於將壇俾贊謀於樞極輟萬里張旌之使副一時  
虛席之求疊疊繁機正有資於協慮謙謙小節宜無  
事於多辭亟服寵休勉思報効

賜曾覲上表再辭免除開府儀同三司依前  
武泰軍節度使提舉萬壽觀進封信安郡開  
國公加食邑食實封不允仍斷來章批答

朕誦伐木之詩而見故舊之情覽康誥之書而念耆成之益乃九月朔日誕告于廷而羣公卿士罔不是孚者識朕此意也卿率性溫恭禔身勤志臨寵深懼陳辭愈明朕烏得而聽之邪漢之南陽舊人唐之秦府僚吏其在當世皆蒙顯榮卿何疑焉

賜皇子魏王愷再辭免除改判明州軍州事加食邑食實封不允批答

朕紹承休命光撫庶邦永念先王彊本根之道亦惟有名宗臣藩保扞王家乃輟吾賢嗣往臨南服亦旣累歲宜更治民是用有四明之命茲實國體非以私

卿也且風土樂嘉可以坐鎮道里順易便於來朝尚何辭焉

賜葉衡上表再辭免除通奉大夫右丞相兼樞密使進封東陽郡開國公加食邑食實封不允批答

朕惟天子君臨萬邦亦惟有一心同德之臣左右厥辟用保乂于庶民顧朕弗逮博求于有位之士咸曰汝衡純明淵通方大宏毅是能輔朕有爲于茲世乃戊申之命告于在廷靡不維允爾乃陳德弗及願遜于在列之賢我聞曰可愛維時可圖維勲若涉大川

今予暨爾其濟爾克欽承我命往哉益懋乃猷乃罔  
于孚不休

賜葉衡再上表辭免除通奉大夫右丞相兼  
樞密使進封東陽郡開國公加食邑食實封  
不允仍斷來章批答

朕惟朝廷正而王化成儒術行而治功起朕攷擇相  
位灼求俊心必詳試以觀其能又悠久以成其望於  
是舉而加之百官之上其所注意則非一日之積也  
卿蘊經綸之學濟通敏之資簡于深知迄此大用今  
庭告之下敷聞四方乃欲徇撝謙之節而拂素定之

懷執無益之辭而格已成之命則豈可哉祇迪予衷  
亟踐乃位

賜李彥穎上表再辭免除端明殿學士簽書  
樞密院事不允仍斷來章批答

朕總覈庶治作興盛圖日來登明選公之命庶乎人  
心之所謂當然者聚此衆雋彊吾本朝維時大享越  
有希遇卿迪忠忱之度秉端毅之資歲時周旋望實  
休顯積是素眷迄于延登協升大猷陪輔密論乃陳  
情懇激至于辭朕命者再則豈見行可之誼哉亟宜  
欽承毋或謙避

賜少保右丞相史浩再上表辭免玉牒所進書回授轉官依例加恩不允仍斷來章批答朕惟尊祖嚴宗王道之先務也日者有司以成書來上乃祖宗之慶源大政是在朕覽觀宗奉差錄賢勞今賞典之下自丞相始乃執謙辭隆及於再三而不已且事關宗廟而恩不加於大臣得無傳聞重朕之不逮宜體茲意勿庸有陳

賜史浩再上表辭免除少傅保寧軍節度使充醴泉觀使兼侍讀加食邑食實封不允仍斷來章批答

朕歷觀古昔之盛深歎君臣之全漢重者儒退乃榮  
於就第周優上宰歸仍即於居豐卿國之元臣世之  
大老秉統庶事儀刑百寮逮其言歸留以自近禮絕  
今比恩逾前聞豈惟台路之光榮時乃朝家之盛美  
將流芳於簡冊永示勸於臣隣固出至懷詎容多避  
賜趙雄上表再辭免特授右丞相正議大夫  
加食邑食實封不允批答

朕惟宰相之任厥惟難才非盡古之道不足以有謀  
非達今之宜不足以有立固嘗中夜以興當食而歎  
思得一世之人傑足以濟時成務者俾任吾事天若

興世國豈無才卿蚤由禁途自結朕眷以陳平之智而復重厚可任以元齡之謀而能果斷必行朕所注意非一日也渙號已頒衆言維允功業之盛四面以觀區區謙辭終不得徇

賜王淮上表再辭免特授樞密使太中大夫加食邑食實封不允批答

朕惟帝王之盛未嘗去兵是以爰自即位蚤夜以思啟處以圖其於三軍五兵之事不敢一日忘也乃若廊廟輔臣股肱同體實賴講謀究度以旦夕承翼濟予于丕庸卿毗佐累年練達庶事鎮物以重事上以



誠具鼎才之實而養以剛中積坤德之純而發以方  
大朕所嘉賴匪卿而誰專付重權益懋成績萬微之  
會悉以屬卿宜宏大猷母事小節

賜昭慶軍承宣使提舉佑神觀士歆上表再  
辭免保康軍節度使加食邑食實封不允仍

斷來章批答

朕惟親親之道先王所以化天下厚人倫也卿裕和  
肅艾爲時老成秉德在庭克自祗畏比攷閔閔宜秉  
節旄遂涓剛辰已渙邦號朕於宗族恩靡不用至是  
積勤累善歷十年始進其官則亦惟舊憲是若顧於

予心尚有慊然而卿猶欲有辭可乎即宜欽承毋庸  
重請

賜太中大夫樞密使王淮上表再辭免曾預  
修纂隆興以後日歷奏成篇帙特轉行一官  
依例加恩不允批答

朕臨御四海閱日彌長常畏過行以羞太上皇帝之  
畀付今儒館言繫日成書重循菲涼將何以傳示萬  
世卿蚤以秉筆與游道山逮茲終編實在政路宜有  
褒賞用昭勤勞昔唐太宗嘗曰朕監前代進善人遠  
羣小亦欲史氏不能書吾惡也今三者之事方與卿

守之執謙小節此何望焉

賜正議大夫右丞相趙雄上表再辭免曾經  
預監修纂隆興以後日歷奏成篇表特轉行  
一官依例加恩不允批答

朕觀西漢故事凡郡國計書先上太史公副上丞相  
蓋天下之事太史得書之丞相得行之卿舊游承明  
多所紀述迨踐政路復專總提今簡編告備而適在  
相位以前日見聞之所及知當時得失之必書宜思  
爲朕彌縫輔贊置於無過之地則予是望一官之賞  
此何辭焉

賜降授朝請大夫參知政事錢良臣上表再  
辭免修纂隆興以後日歷奏成篇表特轉行  
兩官依例加恩不允仍斷來章批答

朕選大雅之彥萃承明之庭記事載言庶有傳於悠  
遠提綱振領可無賴於裁成卿經世通儒奕邦賢輔  
比觀剡奏沆就信書維十六年歲月之長至一千卷  
簡編之富史法不隱方深惕畏之心帝德罔愆終藉  
彌縫之益宜祇寵命毋執謙懷

賜正議大夫右丞相趙雄再上表辭免曾經  
預監修纂隆興以後日歷奏成篇表特轉行

一官依例加恩不允仍斷來章批答

朕惟繫日之書傳信萬世永言不逮賴太上之訓獲保丕緒功烈成就未有慝志今儒館成書何可紀述丞相朕所倚以經遠業建太平所宜爲朕稽參政事祈進治功庶幾大書特書吾君臣咸有無窮之問進階之寵是有故典曷爲避之堅乎覽章歎嘉終不得徇

崔舍人玉堂類藁卷第三

崔舍人玉堂類藁卷第四

批答

賜太中大夫樞密使王淮再上表辭免曾預  
修纂隆興以後日歷奏成篇表特轉行一官  
依例加恩不允仍斷來章批答

朕惟祖宗稽古右文同符三代今朕重惜名器一豪  
不輕乃茲成書沛然下賞舊勞新績纖悉靡遺所以  
尊儒術重國體也卿蚤以華望與游英躔凡今纂修  
咸昔端緒乃擢章之來上願置勿錄雖卿執謙之美  
賞國之典朕敢廢乎令至亟承辭多無益

賜正奉大夫右丞相趙雄上表再辭免勅令  
所修進一州一路酬賞格法了畢特轉一官  
依例加恩不允批答

朕厲精政理茂講民宜分道置州既外釐於羣吏視  
功詔賞乃中秉於至權曾是攸司漫無定式重輕視  
於成牘予奪付於私情比命更修要歸至當凡具書  
於甲令悉旋達於乙觀酌求其平制定其可肆茲告  
備將以常行卿酬酢繁機迎見立解練達大體深計  
遠謀復提宏綱沆就信典格令刑定元齡隆至治之  
風紀律設張黃裳贊中興之業茲推茂渥庶答成勞

卽宜欽承豈必多遜

賜中奉大夫參知政事錢良臣上表再辭免  
勅令所修進一州一路酬賞格法了畢特轉  
一官依例加恩不允仍斷來章批答

朕端臨萬方分建羣吏勸以慶賞程其功能幅員既  
長維險夷善惡之各異官職相序亦繁簡重輕之不  
同其於制爵以待庸當亦隨宜而辨等因循有日汗  
漫無文科條惑於盈几閣之書姦弊肆於長子孫之  
吏嘗深浩歎卽令改修爾有司存予皆親覽至纖至  
悉維允維平卿偉業憲邦宏才濟務達于德意定此



法章炳若丹青已無疑於承用堅如金石方有賴於  
持循茲畀茂恩固難過遜

賜右丞相趙雄上表再辭免秘書省進呈會  
要了畢提舉官特轉兩官依例加恩不允批

答

建邦者必有典傳世者莫如書三墳遠而皇綱莫尋  
六官分而王制盡在乃者功施舊省篇奏法官接十  
世之豐規聚一朝之丕則既用覽閱長深歎嘉卿全  
才憲邦宏量鎮物整持法度大勞載於朝廷潤澤典  
章餘事形於簡冊凡茲明備咸出裁成優遷文階率

用舊制續太初之後遂及全書覽正觀之元方思終善而乃嫌於亟拜爲此牢辭徒專謙牧之風殆拂忠規之望

賜參知政事錢良臣上表再辭免秘書省進呈會要了畢禮儀使特轉兩官依例加恩不允仍斷來章批答

國家制度託簡冊而傳朝廷禮文隨事體而重乃者三館之彥哀次今事踵續前書首篇所載乃皆親庭光華曠異之禮朕所以因其來上鋪張物采焜耀聽觀凡以章洪休侈巨典也卿才資通明德器安重際

于亨運總此盛儀肆推異恩已首衆雋而乃執謙陳辭至於再而未受則豈知朕意之所在序固有彝規當即祇服

賜通議大夫樞密使王淮再上表辭免提舉經修會要特轉一官不允仍斷來章批答

歷求古先咸有典則觀舊經於魯國僅得習傳問今事於崔琳徒資誦記越我熙明之代見於總會之書敢言菲躬遂踵前迹卿深純端亮簡重寬明策盟府之勲聊先翰墨定籌帷之畫當究規圖疊聞謙陳深接近比固自有說豈必皆同引稠疊而辭既足以昭

名器之不公近量勞勤而受又足以示朝廷之無廢庸各行其心俱利於國宜體眷意即收遜章

賜少傅保寧軍節度使充醴泉觀使兼侍讀史浩上表辭免已進會要經修不經進提舉官特轉一官令回授不允批答

朕秉執大柄照臨羣臣片善靡遺寸長不置而况元老大儒勲在翰墨茲而弗錄謂疏遠何卿涉道深純函德忠厚曩在宰路具宣賢猶乃者巨典告成中外同喜參條功緒褒及舊勞朕惟卿言之不釋固已徇謙志而移恩于族親矣猶遜不當毋太過乎

賜少傅昭化軍節度使充醴泉觀使嗣漢王  
士輅上表再辭免除少師加食邑食實封不  
允批答

朕惟親親人道之要也今本支蕃衍未逮全盛之日  
顧瞻大廷見此端艾黃髮在位維喜康共思有以大  
顯榮之固朕之心也乃者禮成合宮福祿來下與我  
共此無逾茂親且亞師之命近時宗族之所未有高  
秩厚禮舍王孰宜而又何辭焉

賜少保岳陽軍節度使充萬壽觀使永陽郡  
王居廣上表再辭免特授少傅加食邑食實

封不允批答

朕惟厚陵諸王有若端獻聞望光美儷昔間平天錫  
善祥十子競爽流澤未遠逮其聞孫秉德在廷厥猶  
翼翼茲朕之所嘉卿今跋祠路寢配天敷澤非優異  
之恩亡以示天下隆親而尚賢也庚子之命尚庸辭  
乎

賜少傅昭化軍節度使充醴泉觀使嗣濮王  
士輅再上表辭免除少師加食邑食實封不  
允仍斷來章批答

朕稽古彌文對時亨運玉帛萬國夙尊布政之堂簫

韶九成肇享交神之室既荷天休之應遂均惠術之  
行卿邦家茂支宗族元老紹百世濮園之祀參九霄  
仙館之遊因緣慶恩推昇懋典錫文武之胙當厚者  
明之賢篤魯衛之親乃先惇睦之道茲由素定奚可  
終辭

賜少保岳陽軍節度使充萬壽觀使永陽郡  
王居廣再上表辭免除少傅加食邑食實封  
不允仍斷來章批答

朕肇稱元祀鋪究上容多士駿奔走以在廷四方大  
和會而觀禮維時顯相多宗族之蕃昌迄此休成諒

神靈之歡喜既誠陳而享洽遂惠均而政行卿和裕  
凝資寅恭秉德被溫貂而就位奠華爵以交神既右  
饗之不丕擁繁釐之下乃商賚爾超登亞傅之崇渙號  
已孚謙辭猶至固出眷懷之異可專撝挹之高

賜宣奉大夫右丞相趙雄辭免玉牒所進書  
了畢提舉官特轉兩官依例加恩不允批答  
朕惟祖宗成功盛德儷美皇王乃金饋玉版之書所  
以勒休垂鴻未至純備比者深詔執事哀次纂述傳  
示萬世越四月丙戌有司以成書來上文富事核對  
越在天休光美實照映日月朕甚嘉之卿方大之□



一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十  
二十一  
二十二  
二十三  
二十四  
二十五  
二十六  
二十七  
二十八  
二十九  
三十  
三十一  
三十二  
三十三  
三十四  
三十五  
三十六  
三十七  
三十八  
三十九  
四十  
四十一  
四十二  
四十三  
四十四  
四十五  
四十六  
四十七  
四十八  
四十九  
五十  
五十一  
五十二  
五十三  
五十四  
五十五  
五十六  
五十七  
五十八  
五十九  
六十  
六十一  
六十二  
六十三  
六十四  
六十五  
六十六  
六十七  
六十八  
六十九  
七十  
七十一  
七十二  
七十三  
七十四  
七十五  
七十六  
七十七  
七十八  
七十九  
八十  
八十一  
八十二  
八十三  
八十四  
八十五  
八十六  
八十七  
八十八  
八十九  
九十  
九十一  
九十二  
九十三  
九十四  
九十五  
九十六  
九十七  
九十八  
九十九  
一百

渾深之度秉統萬務仔肩壹心今寶典告成恩言□  
下而乃陳見悃悞願止勿當且吾於褒賞非過也丞  
相顧安取此雖知素謙得無體朕所以厚前烈重宗  
廟耶前日之命趣當承焉

賜通奉大夫參知政事錢良臣辭免玉牒所  
進書了畢禮儀使特轉兩官依例加恩不允  
仍斷來章批答

朕惟國家襲唐憲度鏤玉成書祖功宗德交映簡冊  
舊制領於宗寺典以侍臣承平日久庶事大備越大  
觀間乃侈盛容物至置使以領之所以昭謨烈重宗

廟也卿負通明之才居弼諧之任維正庶事調娛萬  
微今大典告成寶儲崇奉簪纓駢萃羽衛紛陳時維  
令儀陟降上下不爽于度沆漭厥成記曰禮無不答  
不有優賞曷以旌使範之勞乎超晉文階增加采戶  
厥有故事卿無辭焉

賜宣奉大夫右丞相趙雄再上表辭免玉牒  
所進書了畢提舉官特轉行兩官依例加恩  
不允仍斷來章批答

朕惟嚴鏤玉之書集汗青之績事大者體必重功隆  
者報乃豐卿黼黻王度之文淵源聖域之學闡繹□

訓鋪張烈光既成信書宜錫茂典而乃剡奏疊□□  
誠益明上歸美於菲躬下委勞於羣彥欲以一謙之  
節立於百辟之先朕惟侯霸善錄遺文魏相好陳故  
事皆輔乃辟克成厥功竝流英聲尚在良史卿其崇  
厚道德廣予以慶歷之寬仁招延俊賢輔予以元祐  
之正直明明成德赫赫當今是將底於大寧豈不愈  
於小諒宜體至意即收遜章

賜太中大夫試吏部尚書兼翰林學士承旨  
兼侍讀兼太子詹事兼修國史周必大上表  
再辭免除參知政事不允仍斷來章批答

朝廷延登常取羣望廊廟重任宜聳具瞻揚綰用而宿貴改觀王陽進而善士生喜朕選建碩輔翼宣大猶國皆曰賢政將焉避卿初終有守本末無疵以其緝密而粟可以參訂謨以其中正而通可以經丕務俾釋銓筦遂躋柄塗人之信道固將有行國之用儒時乃維允猷爲茲始遠近所觀方朕衷委重之意深亦衆志望賢之責備勉摠素緼沆濟熙圖謙遜之章止毋來上

賜朝請郎試刑部尚書謝廓然上表再辭免  
除端明殿學士簽書樞密院事不允仍斷來

章批答

朕綜持大柄延攬羣英修政於國家間暇之時基命於夙夜宥密之地長撫遠馭曷登濟於丕圖同寅協恭乃詢求於成彥得諸民譽近在禁塗卿賦有用之才抱無窮之學智略輻輳予知其籌慮必精識度淵長予察其規摹必遠乃進右府庶彊本朝名稱位者勿辭資逢世者難失當體大有爲之志先求不可勝之圖迄成茂功終藉長策區區謙避所不必聞

賜宣奉大夫右丞相趙雄上表再辭免進四朝正史志提舉官特轉兩官依例加恩不允

批答

朕惟天昨昌圖世承明德例凡嚴備已全五聖之書  
聞見紛綸尚闕四朝之記深詔宰輔廣延儒英趣裁  
信編沆就大典匪提綱之有道殆汗簡之無期卿勞  
大而處以謙德全而加以畏懇辭上賞敷暢忱誠維  
國家之德澤素深維祖宗之規摹可考垂將來之法  
豈專比事而屬辭慰在天之靈尚勉建功而立業當  
收謙節益邁遠猶

賜通奉大夫參知政事錢良臣上表再辭免  
進四朝正史志禮儀使特轉兩官依例加恩

不允仍斷來章批答

朕紹遵丕緒闡繹先猷嘗申命於儒臣俾趣裁於信  
史成編來上盛典時行端宸宸以鋪觀闢寶儲而崇  
奉簪纓駢萃羽衛紛陳無言不酬既表提綱之績有  
儀可象遂褒詔禮之勞卿望重民瞻謀參天緯方正  
身而厲俗乃引義以辭榮事固協於典常體亦優於  
眷遇已孚休命難徇冲懷

崔舍人玉堂類藁卷第四

崔舍人玉堂類藁卷第五

批答

賜通議大夫參知政事周必大上表再辭免  
經修四朝史志轉一官不允仍斷來章批答  
朕鑒于往昔咸重史臣觀厥成功率惟久任張華尚  
誇於再至蔣乂嘗越於十年當時推榮後世稱□□  
懿文華國雅望表民自窺典籍之藏逮聽星辰之履  
咸專載筆遂究長才力倍羣英功先衆作爰優頒於  
恩典奚固執於謙規俾下多興廉識分之風雖可嘉  
於卿志將國有吝賞廢勞之舉亦殊失於予心當□



欽承毋庸重請

賜通奉大夫樞密使王淮上表再辭免四朝  
正史志了畢經修不經進前權提舉官特轉  
行一官不允批答

朝廷慶賞必始大臣宗廟策書當嚴正史卿道躋聞  
與文擅統盟以其忠純則執簡無愧辭以其審重則  
纂事無遺實向司載筆具罄賢勞才學識之長深見  
討論之善清緝熙之典遂符祖述之心疊覽謙陳願  
辭褒進方藉謀謨之益可忘體貌之崇綸綍䟽頒姑  
昭前績旂常登紀尚廣後圖勉卽欽承毋庸固請

賜少傅史浩上表再辭免進讀正說終篇特  
轉一官不允批答

朕登延宿儒講誦先訓金聲玉振實聞道德之原日  
就月將遂畢簡編之富卿器全方重學貫中庸道予  
以正大之言廓予以寬厚之論凡廣廈細氈之邃所  
以指陳庶咸平景德之隆及於身見逮茲卒業嘉乃  
輸忠爰首下於褒康庸增光於眷遇遽披奏達願返  
恩榮雖卿素懷斂分收涯之心豈朕可廢崇儒重道  
之禮宜承優典卽畧冲章

賜少傅史浩上表再辭免除少師依前□□

軍節度使充醴泉觀使任便居住進封魯□  
公加食邑食實封不允批答

朕惟明哲君子之攸貴行藏聖人之所難壽考康寧  
方膺於備福雍容進退復保於令名想聞前風慨歎  
希遇卿誠信孚于天下勤勞載于朝廷留連燕間密  
勿議論縱其已老猶當賜几杖以從遊寧此未衰乃  
遽懷山林而獨往雖溫諭之已至迄冲規之不回豈  
無茂恩用致優禮崇高節則風俗厚體耆德則名器  
尊奚為固辭尚復勤請宜略謙柄卽承寵章

賜少傅史浩再上表辭免除少師不允仍斷

來章批答

元老大臣世所視法進退之際聳聞四方其所寵榮  
繫國大體高秩厚禮朕匪敢私卿昭厲世之規抗絕  
塵之見引誼宏遠陳辭懇誠朕惟尊者老仁也體舊  
相禮也崇高節義也今制冊之下中外固知朕意之  
所在矣可以一謙而廢三美乎宜承茂恩勿復有□  
賜鄭聞新除四川宣撫使再辭免除資政殿  
大學士不允不得再有陳請詔

朕眷懷全蜀邈在西陲惠寧一方孰專制閫之寄顧  
瞻四近迺輟贊元之賢考繹僉言稽參懋典爰□□

於祕殿廢倚重於壯猶將疾而驅已嘉忠藎益益□□  
牧尚執勞謙成命旣行多辭徒費夫文武惟其所用  
當應之不窮功名隱於無形必施而後見使朕護安  
疆之效繫卿恢久大之圖則君臣俱榮中外同福區  
區小節豈所望哉宜卽欽承毋復有請

賜中大夫提舉江州太平興國宮林安宅辭  
免除龍圖閣學士不允詔

朕取才不責其備用人必全其終豈嘗參宥密之謀  
可獨後褒榮之典卿蚤揚時譽晚踐政塗坐一青以  
去朝積累年而置散肆因郊賚稍進寵名雖君子允

迪於勞謙益堅素守顧大臣當優於眷禮難廢彝章  
姑畧多辭亟宜祗服

賜武康軍承宣使新知揚州王琪辭免差充  
荆鄂駐劄御前諸軍統制不允詔

朕修明戎備宣暢王靈我得上流爰分屯於勁旅吾  
不中治乃全付於英賢卿夙負壯猶屢收多績輟□  
淮甸之寄往總武昌之師蔽自朕衷協于輿論蹈□  
義者急於報國志功名者樂於逢辰卽宜疾驅毋□  
謙避

賜錢端禮陳乞奉祠不允詔

朕敷求前古致理之原深戒刺史數易之弊□□□  
吏咸勉奮於民庸雖爾大臣亦徐觀於治效卿宏才  
經世令德憲邦夙懷康濟之能益稔耆明之譽嘗弼  
予治參周官小宰之聯往撫乃封卽禹穴神臯之地  
教條孚洽閭里乂寧方倚佇於報成奚遽形於引退  
望之尊者豈出處之當易政之優者尚始卒之是圖  
祇若朕懷亟安爾位

賜史浩再辭免加食邑食實封不允詔

朕欽柴泰壇歷祿清廟嘉應竝見知精意之交通慶  
賜遂行庶純禧之普洽卿負時宿望爲國元臣屬修

美報之儀適阻駿奔之助稽諸彝典錫是徽章惟符  
不于其祥敢矜獨鄉乃祿必當其位奚用固辭宜卽  
祇承毋勤重請

賜中大夫參知政事姚憲辭免差同詳定一  
司勅令權監修國史不允詔

朕惟明法審令厥有彝章昭德紀功是存信史博  
宏達申命纂脩庶幾藏在名山成一經之通體亦使  
視諸故府立萬代之洪綱非吾大臣誰與領此卿遠  
識周乎世務清規密乎儒猷肆疇乃庸俾圖厥政遂  
付鉅典式觀全能三王之法合人情豈無資於折衷



五帝之書言常道正有賴於裁成任既協於當仁□  
亦循於近比亟其祇服毋咈予聞

賜吳拱上表辭免進封武功郡開國公加食  
邑食實封不允不得再有陳請詔

朕甚重名而貴器比者按圖規土出名鎮之節而畀  
之爾亦惟爾先世之忠烈乃身之勤勞咸在王家不  
可廢賞念爾先仁也疇爾勞義也一舉而兩善得於  
是無愧爾乃陳德弗稱願還之少府之官豈朕意哉  
令出惟行雖辭無益

賜宣奉大夫右丞相曾懷乞解罷機政不允

詔

朕惟成周之盛于時大臣之賢至歷四世耆德之尊  
皤然在位不聞有謝事之辭亦不聞有遺年之議今  
朕不逮所與共治者惟是老猶碩輔秉誼承翼克將  
予于有濟爾乃陳力不及願致吾機政而歸朕豈以  
力望丞相哉舉綱總要優游廟堂論道之餘亦足□  
逸

賜右丞相曾懷再降詔不允不得更有陳請  
詔

朕惟天下之事誠使老者謀之壯者決之雖聖賢不

能易矣朕率是道以用人爰得耆輔延登廟堂敷□  
令猶凝亮嘉績方日虛已以聽庶乎治功之隆遽茲  
懇辭欲以閑請豈體朕羞耆尚賢之意乎比歲宰輔  
之臣病於數易今四海具瞻之地爰立未久又復□  
去人斯謂何祇服眷懷亟起就位

賜資政殿大學士通議大夫知紹興軍府事  
兩浙東路安撫使錢端禮辭免除觀文殿學  
士不允詔

朕觀古者君臣交通中外均壹有若姬旦實勤西人  
之思乃如畢公卒成東郊之治朕甚嘉之卿秉誼純

明受材宏達曩在政路邦其安榮肆典輔藩民以綏靖觀文舊紫宸殿也禁廬邃嚴儒職隆重近時唯前宰得除今舉爲爾寵表善政而崇舊德庶幾致其優異者焉宜略謙辭亟圖祇服

賜資政殿大學士通議大夫知紹興軍府事錢端禮再辭免除觀文殿學士不允不得

有陳請詔

朕獨觀化原詳覈吏治宅乃牧而敷政維以乂民選所表而懋功庶其自近卿蘊高明之學稟方重之久典輔藩式崇賢望誕布中和之化肆宣寬大之

一  
爰嘉美庸用錫殊寵舊臣作鎮衆所具瞻信賞時  
餘將交勸未體褒康之意尚勤謙避之辭成命已孚  
多言奚益

賜王友直辭免除奉國軍節度使依前殿前  
副都指揮使加食邑食實封不允詔

朕規長策以馭邦秉至權而厲世整軍經武維干戈  
之省厥躬念功簡勞必爵祿之當其位卿志懷沉遠  
材力敏彊蔽自朕心總茲禁旅持已益知於廉謹治  
軍尤見於方嚴盡革弊原具殫忠蘊肆優加於褒典  
庶風厲於羣臣賞不踰勲已允諧於輿論言唯作命

諒難徇於謙懷祗若寵榮勉圖報禮

賜朝請郎權吏部尚書兼太子詹事兼侍讀  
李彥穎乞除一在外宮觀或待次小郡差遣  
不允詔

朕敷求羣材列布庶位乃眷禁嚴之長有如端亮之  
臣庶幾共濟遠圖詎可獨全小節卿性資莊重氣守  
剛方銓曹稱通簡之風經幄見淵源之論仍資正學  
俾輔儲宮具孚令猶休有崇望遽披遜牘備著誠忱  
虛已待賢維朕志之不貳引疾辭位豈爾心之有遐  
就使欲其名推止足之高寧不念乃后失老成之

三復來奏憮然莫從

賜奉國軍承宣使士矩辭免特差知南外宗  
正事不允詔

朕以不逮奉承聖緒之休永念本支之盛所以鎮萬  
民疆王室也乃眷南顧有繁吾宗肆疇懿賢命以董  
正卿性資純茂德度粹溫周旋禮義之經被服詩書  
之訓考屬稽行無逾汝宜方崇公族振振之風難徇  
君子謙謙之節亟其祇服毋復過陳

崔舍人玉堂類藁卷第五

崔舍人玉堂類藁卷第六

批答

賜少傅保寧軍節度使充醴泉觀使兼侍讀  
史浩辭免已進會要經修不經進提舉官特  
轉一官不允詔

朕緬循前聖優禮舊臣日者三館成書肇自初載朕  
開卷覽觀而良規善政大率多卿之講畫所以沛然  
下賞加地進律豈直故事固有至懷卿清明端誠忠  
厚亮直既已委功名而自逸乃復臨寵利而不居比  
以相貳大臣慮於恩光狎至朕固勉從其請而成□



美矣卿何說而亦辭乎當體眷私毋專謙節

賜特進觀文殿大學士判建康軍府事充江  
南東路安撫使兼行宮留守陳俊卿乞許以  
歸老鄉里不允詔

朕惟金陵都會寄重勢嚴外制帥權內司宮鑰維時  
選任當屬重臣乃者召卿遠藩命以往鎮處得地所  
人皆曰然卿高明踏中惇大成裕譬諸喬嶽鎮靖一  
方不勞發舒雲氣自潤朕睠言興顧無復勤憂武克  
文馴繫卿是賴乃茲祈逸殊異朕心卿其虞神省慮  
善總大綱表裏江淮徒得君重鄉閭之請所未欲聞

賜少傅保寧軍節度使充醴泉觀使兼侍讀  
史浩再上表辭免已進會要提舉官特轉一  
官令回授宜允詔

纂事成書是垂丕則眎勞詔賞固有舊規曾褒崇之  
未加乃謙畏之靡已卿純誠忠國厚德表民始迴渙  
號之文終避地恩之命適張良封留之願素尚□□  
覽晏嬰辭卹之言益欽冲節勉下俞旨悉收寵章□  
朕報功之心成卿厲俗之美

賜中大夫程大昌辭免除敷文閣直學士與  
郡不允詔

儒職朕所甚重也至於敞西清之棟宇聚永祐之文章通直其間豈輕畀諸卿受才雋明秉誼宏亮優結朕眷超登禁塗綜持銓衡甄叙人品維日浸久厥勤茂宣忽披懇陳願卽閑逸朕以其積勞侍從遽去朝廷參圖寵章增重郡寄寶儲延閣于是為宜而何以辭焉

賜龍圖閣直學士中大夫成都潼川府夔利州路安撫制置使兼知成都府事胡元質辭免除敷文閣學士令再任不允詔

朕厲精政理選建邦侯并鉞參旗旣倚价藩之重雲

章奎畫遂超儒職之高卿文補皇猷智經王體畀以  
蜀鎮出於朕衷而能宣道威德教條堅明詢求疾憂  
議論懇惻去國萬里居坤一隅豈不念於爾勞顧莫  
當於予寄宜服褒進毋懷滯留迄圖大成尚有懋賞  
賜太中大夫試禮部尚書兼翰林學士兼侍  
讀兼太子詹事兼修國史周必大辭免除吏  
部尚書兼翰林學士承旨不允詔

綜銓省之公衡道內庭之密命攷皇朝熙寧而上實  
爲台路之官閱唐室元和以來專待禁林之老班高  
地近事重職清曾崇朝而竝除乃曠代而罕見卿懿

文追古亮節表時英英人物之宗憲憲邦家之望久  
在近禁灼知俊心稔光大之德而尊榮朝廷藉端醇  
之度而領袖侍從優錫顯命夏超常倫當卽欽承毋  
庸過遜

賜太中大夫新除吏部尚書周必大辭免兼  
翰林學士承旨不允詔

朕閱唐故事翰苑置承旨自鄭網始凡大誥令大廢  
置乃俾專受不責以翰墨之勞也本朝以學士久次  
一人爲之秩高體重固不常置卿久在禁林多歷年  
所宜峻厥陟用休其勞况綜秉銓衡叙進羣吏亦已

詔卿免凡撰述唯特命始預略如唐制矣金門玉堂  
方倚君重宜無辭焉

賜資政殿學士通議大夫知紹興軍府事充  
兩浙東路安撫使李彥穎乞畀一宮觀不允

詔

會稽吾股肱郡也朕選輔臣臨之亦惟知予德意志  
慮之深藉其推行表倡庶國進退之際詎可輕諸卿  
秉心安常蹈道醇直自釋政路即宣外庸仁聲日聞  
政績時乂茲覽需奏願辭郡章朕惟卿精明方昌才  
力逾劭年穀登稔封圻樂康奚庸告歸卿可坐鎮

賜朝散郎試尚書工部侍郎兼知臨安府吳  
淵乞免兼知臨安府不允詔

朕惟官宿其業則易成下習其教則易使凡今小大  
之臣布在外服非甚不得已朕不輕易也而況三輔  
浩穰四方瞻望政成事著豈庸釋乎卿材資敏明風  
力彊濟從容禁路典正行都兵民具安細大畢舉而  
乃厭繁倦劇願反印章則豈朕素所選任之望哉規  
模旣成條教自洽勉汔乃績稱朕意焉

賜朝請郎降授顯謨閣待制知贛州軍州事  
新除在外宮觀留正辭免復顯謨閣直學士

不允詔

朕秉執大柄照臨羣臣謹視過功明用賞罰卿受才  
閎達迪德醇明出守輔藩嘗嬰文議起臨江國茂著  
政聲屬力請於燕間因盡還於光寵寶儲華閣寓禁  
直之凝嚴間館珍臺遂里居之恬養茲由至意寧  
冲懷

賜端明殿學士朝散大夫賜紫金魚袋胡銓  
辭免召赴行在乞檢會前累奏許休致不允  
詔

朕觀漢李固一日朝會見侍中竝皆年少無大臣宿



儒可備顧問爲之歎異乃知老成在朝誠國之福也  
况朕今臨御久長者明凋謝疏觀外服歷數舊臣忠  
壯之節早有以激士風正大之言晚有以起朕志維  
卿一德茲世幾人睠焉有懷召以自近而乃輕視軒  
冕卽安邱園則豈朕之所望哉年齡雖高精力尚壯  
彊爲一起來從吾遊

賜降授明州觀察使張說辭免差提舉臨安  
府洞霄宮任便居住不允詔

朕以大中之道待臣下雖近不私雖遠不棄譬之風  
霜雨露終歸至仁此者閱諸謫籍閱然念卿之久閑

出於眷懷畀以祠祿卿夙居親近具識恩慈今優游  
家居寓間館珍臺之逸朕之存遇茲云厚矣宜祇成  
命無咈深懷

賜資政殿學士通議大夫知紹興軍府事兩  
浙東路安撫使李彥頴乞檢會累奏差宮觀  
一次不允詔

卿亮直醇明舊維共政朕所嘉尚為時老成曩辭柄  
途遂付閩寄夙夜匪懈惠康小民前聞告歸固嘗遣  
詔諭眷留之意謂已深識予衷今何嬖而上章又欲  
去郡詩不云乎豈弟君子民之父母況卿樂易之政

三  
甚宜其民克成厥終要以無倦晦明小疹隨當自康  
真祠燕間奚必屢請

賜朝散大夫韓彥古辭免除敷文閣直學士  
在外宮觀不允詔

華閣暈飛光連天象宸章鱗次寶聚先猷朕今敦勸  
臣工審用名器有詔未爽無功不除卿智慮疏通□  
資敏給曩備禁途之列獨專邦用之司貸移不及於  
公藏贍給自周於常度厥効信矣于今因之念爾去  
朝遂投閑而置散顧予待下記豈過而忘勞俾從真  
館之遊仍寓清廂之直已享成命宜略摛章

賜宣奉大夫曾懷辭免除觀文殿大學士提  
舉江州太平興國宮不允詔

朕惟仁君不盡人之忠智士不窮己之力均勞逸之  
宜則恩義斯厚達進退之節則廉隅乃全卿迪德純  
明受材宏裕比延登於揆路實具展於賢猶薦披懇  
請之章祈遂燕間之適已頒丕制俾解繁機躋榮秘  
請之崇賦祿真祠之養階六符而成體既居輔弼之  
聯陞九級而上廉盍示始終之遇趣宜祇服母事多  
陳

賜中大夫參知政事姚憲乞就祿祠庭不允

詔

朕舉要萬機責成四輔用舍之間實關於國體動靜之際尤繫於民觀使皆歸潔而自全誰與協謀而共理卿材資開濟識量淵閎自擢預於政塗益具昭於賢業方有猷而告后維旣乃心曾何感而上書靡安厥位矧今興起庶治恢張遠圖正當宁汲汲焦勞之時豈大臣紛紛辭避之日亟祗爾服母涕予懷

賜觀文殿大學士銀青光祿大夫提舉臨安府洞霄宮陳俊卿辭免以郊祀大禮慶成加食邑食實封不允詔

朕練吉天正揭虔陽位靈顧昭假美祥來同迄于有成敢曰能饗固嘗裒神之施覃及內外小大之士春乃碩輔有勞王家久辟繁機越在外服不獲陪予禮容之盛也肆其均釐朕烏得而忘之卿望崇而益謙位高而愈畏具孚誠悃願還寵章詩不云乎受天之祜四方來賀於萬斯年不遐有佐非吾股肱咸德之舊誰與共此哉勉其祗承毋重多遜

賜朝請郎權吏部尚書兼太子詹事兼侍讀李彥穎辭免除吏部尚書乞檢會前奏除一在外宮觀不允詔

朕惟常伯之官自古所重選部之事于今實繁以盈  
凡閣之書付長子孫之吏吏之幸則士必有不幸者  
也朕思得其人而久任之卿國之寶臣時之壽俊方  
介之資形見議論莊重之質蔚為羽儀今自典銓之  
長進而為真庶幾式究爾猶使王裴之賢不獨稱□  
前世維昔九官之命皆專一職之能于時所謂陟明  
者不過爵服之加終不遽易其任若乃其間有卒為  
輔翼者亦其詳試積久而後用也勉體至意毋庸重  
陳

賜曾懷再上表辭免除光祿大夫右丞相加

食邑食實封不允不得更有陳請詔

朕惟廊廟據繁機之會朝廷端大化之原必尊重難危自稱陞廉之體維高明有倣乃符夷夏之觀豈其專任以責成遽以被誣而去位卿材猷敏邵智慮淵通蚤簡知於劇煩歷試之初迄登用於名實具孚之後事悉汝翼謀皆予同方共起於治功偶遂辭於揆路念此永歎漠然靡圖維斷乃成旣辨霍光之謗□賢罔又卽遄山甫之歸庶幾濟一時事業之隆亦足示千古君臣之盛尚形遜避未諒眷懷惟鼎司之不可暫虛惟渙號之不可復返亟宜祇拜毋重多陳



賜曾懷辭免提舉國史院實錄院國朝會要  
所勅令所不允詔

宰相之任無所不統古者上公不以一事名官後世  
賢輔亦有衆職兼領厥由舊矣朕詔館閣之士纂修  
史錄會聚章程又設有司勒爲大法皆國家一代之  
典冊垂示萬世非吾元臣碩德孰與專董振之權哉  
卿智能周物儒學承家比嘗盡總於維綱亦旣克成  
於端緒茲還舊位庶訖全書且載事貴嚴訟情貴通  
皆卿所素講也尚何辭焉

賜資政殿大學士中大夫鄭聞辭免除參知

政事赴都堂治事乞除一在外宮觀差遣不

允詔

朕權內外之勢制重輕之宜經營四方雖資於崇望  
總領衆職尤賴於偉圖卿瞻智造微敏才經遠比從  
政地往撫坤維忠勤具宣風績采邵與其寬一面之  
顧曷若端萬機之原根本旣彊精神自盛靡須歲月  
之久式遘其歸實藉謀猷之良同底于道思報國者  
固忘勞於原隰懷愛君者亦存意於朝廷虛席以須  
義無可避

賜中奉大夫試尚書吏部侍郎兼詳定一

勅令韓彥直辭免戶部尚書不允詔

周家均賦職于地官漢室理財責在計相今民曹常伯總治調度其位與權不減周漢之重委寄所在疇咨維艱卿識慮博通材猷高邁歷揚煩劇風績卓然荐登禁嚴名聲藉甚比掌銓綜尤稱公平茲用命爾以六官之長典我邦用要使緩急適宜上下均裕錢穀之問不關於朕心是所優為豈必多遜

賜安慶軍節度使張說辭免除太尉提舉隆興府玉隆觀任便居住加食邑食實封不允

詔

太尉古官也國朝以來寵數之隆遂均政路異時非  
勲德大臣未易克稱卿夙繇信遇晉預中樞既久聞  
於歲時爰浸崇於著位課功責效所冀亟成陳疾抗  
章遽茲引避朕用舉掌武之階以超畀之亦云厚矣  
尚祇恩意往卽燕間區區遜辭毋庸重請

賜安慶軍節度使張說上表再辭免除太尉  
提舉隆興府玉隆觀任便居住加食邑食實  
封不允詔

朕堅持名器躬搢權綱維時爵賞之行罔匪勲勞之  
勸迺若班升尉府寵視政塗冠于武階實所甚重□

以昇爾亦知朕所以曲示恩遇之意矣惟恐謹則  
斯永惟冲退則身乃休尚服眷私毋庸遜避

崔舍人玉堂類藁卷第六

崔舍人玉堂類藁卷第七

批答

賜曾覲辭免除開府儀同三司依前武泰軍節度使提舉萬壽觀進封信安郡開國公加食邑食實封不允詔

儀同漢制也本朝元豐建官始以易平章事之名寵數之隆一視宰路朕甚重之卿德蘊醇深志懷沉密蚤事初載具宣勞能迄遠盛權休有燕譽簡于朕意錫是徽章爾乃陳遭遇之榮念盈虛之道幾以力辭厥命誼則高矣維朕優老懷舊之誠集於是舉尚可

廢耶

賜敷文閣直學士太中大夫提舉江州太平興國宮汪大猷辭免差知隆興府不允詔

朕惟江表名區豫章要地思得忠信之長往布寬平之書卿天資粹溫風力敏裕頃在禁路日聞嘉猷肆典閩藩歲上最績會歷陳於沖請因勉徇於高情行及里居適虛帥閩渙此茂命訖其令庸爾其體九重眷注之深念一畝蕃宣之重亟祇厥服毋拂予聞

賜曹勛辭免除開府儀同三司不允詔

朕惟耆成人之在朝廷猶喬木之在故國風采所及

望之已尊今吾左右親近之臣更歷四世年高而德  
劭無踰卿者儀同之命朕固恨其晚也雖輕視軒裳  
乃卿之素志獨不體朕尚賢優老之意乎廷告維允  
宜無辭焉

賜朝散郎充敷文閣待制龔茂良辭免除禮  
部侍郎不允詔

朕惟賢德之在國家譬猶鳳皇游廷麒麟翔園文采  
所被物亦華潤卿方亮之資淵深之學越去言路久  
臨帥藩勤勞具宣風績逾著考閱最狀眷懷令猶命  
之來歸留以自近春官侍臣之清選也羽儀天朝論



思王政將于爾觀之宜無辭焉

賜侍衛親軍步軍都指揮使武昌軍承宣使  
與州駐劄御前諸軍都統制吳挺辭免除定  
江軍節度使加食邑食實封不允詔

朕躬秉常德規恢遠圖甚患諸將冒沒以自豐時乃  
弛于軍律思得謹廉安重之賢褒表以示勸卿材資  
果毅智慮疏通似其先人纘乃舊服加以持身御衆  
蔚然有良將之風朕亦何愛少府之節而不爲爾出  
邪尚覽忱辭固陳謙避令維無反誼不得從

賜皇太子惇辭免男擴除正任觀察使封國

公女封郡主不允詔

朕惟帝王之治恩由親始而况大本所繫所以顯榮其私者可以輕乎今朕上奉慈闈而吾孫穎茂雍穆侃然在側實寵嘉之前日之命豈特故事皆以崇卿體怡親顏也尚何辭焉

賜翰林學士中奉大夫知制誥兼太子詹事兼侍讀兼修國史周必大乞特授一在外宮觀不允不得再有陳請詔

卿清規邁乎朝倫懿文經乎國體久在禁苑具聞嘉猶固已發吾詔令溫淳安重踵乎訓誥之餘加以禮

遇恩寵在廷莫二而乃懇懇言歸幾於辭竭而意盡  
豈朕不敏未達好賢之誠將卿旣明自全引退之節  
莫喻厥意三復憮然詔旨屢頒勉留毋執

賜少保右丞相史浩乞歸田廬不允詔

朕宵衣旰食圖天下之治有年于茲矣顧同德壹意  
克濟于有成匪吾舊臣孰望卿忠勤在國德善在民  
黃髮台背皤然爲輔朕之所嘉賴而閱時未久遽欲  
上印綬而歸人其謂朕輕於進退貳於倚毗非所聞  
也詩不云乎樂只君子遐不眉壽卿其寧神省慮總  
秉大體稱朕意焉

賜少保衛國公史浩辭免特授少傅保寧軍節度使充醴泉觀使兼侍讀依前衛國公加食邑食實封乞俾仍舊秩歸奉外祠不允詔朕觀祖宗之盛亦惟有耆舊在朝廷不必悉勞以政用能名聲光榮風采嚴重爰暨遠邇罔不恭畏朕甚慕之卿忠厚諒直爲國元輔兩踐宰路秉誼不渝有德有勤光于上下深執謙節願還印章念將去位鬱于予心惟恐遇卿之薄也參合舊典酌用優恩凡皆致吾貪賢欽老之意顧何辭焉

賜太中大夫參知政事趙雄辭免特授右丞

相正議大夫加食邑食實封不允詔

朕惟自古國家之盛允有顯德克享天心則才為時  
生乃有碩大光明之輔左右厥辟相我受民爰暨四  
方固不同福今朕不逮側席虛已庶幾得賢卿正學  
誠明英猷開亮夙懷任重道遠之志兼得應變守文  
之長加以遠畧宏度竄出羣物天所付畀庶其在茲  
維朕時憲用不敢違今爰立之命匪卜匪筮斷自朕  
心尚恢久大之圖茂對亨嘉之會勞謙小節非所望  
焉

賜中大夫知樞密院事王淮辭免除太中大

夫樞密使加食邑食實封不允詔

朕仰惟祖宗規模宏遠以中臺總釐政務以右府對持兵權禮遇委寄靡不悉同于時元老鉅臣有若王曾文彥博猶以前宰乃居元樞朕今右武經邦體天圖大維時宥密尤待忠賢卿博大高明敦實方靖登踐政路勤勞王家蹈履誠信表裏不渝獻納謀猷本末可紀今升正使號柄愈重而位愈崇勉摠宏圖共濟丕業規規謙避非朕意焉

賜少傅保寧軍節度使元醴泉觀使兼侍讀衛國公史浩辭免弟溥長子彌大女夫李友

直夏鼎各與差遣并親屬恩數不允詔

朕若稽祖宗優待勲德推厥寵命逮其私門若其異數便蕃深思淡洽則又眷遇之意無所不用其至者也卿舊學元老國之儀刑茲釋相權具極邦禮且宰輔全美朝家光華而閨門之內不與共其榮樂朕得恣然而已乎卽宜欽承毋復勤遜

賜翰林學士中奉大夫知制誥兼侍讀兼太子詹事兼修國史周必大辭免除禮部尚書兼翰林學士不允詔

朕惟五禮管乎羣情八座高於通列若乃中朝有大

制作而無所折衷諸儒有異議論而未知適從維時  
大宗伯之官豈同常有司之事卿以道德名望之彥  
首言語侍從之聯百王憲度靡不該通一代典章俱  
成誦記庸副朕選誰逾汝宜茲超陟於新班復仍居  
於舊直進趨內禁敷雷風鼓舞之辭退踐中臺秉夙  
夜寅清之節宜祇寵遇毋執謙懷

賜朝議大夫權尚書兵部侍郎兼詳定一司  
勅令劉孝韙辭免除兵部侍郎不允詔

朕博延英材列布禁路法皆得從雖均禮遇之隆久  
乃爲真茲重近嚴之選卿迪忱恂之度秉端亮之資



文章爾雅足繼古風議論正平可詢今事懋乃賢業  
登諸貳卿歲時徊旋譽望融顯茲有興於春意俾卽  
正於班聯固嘗念之亦已晚矣宜承休命毋重謙辭  
賜昭化軍承宣使提舉江州太平興國宮錢  
愷辭免令赴行在奏事不允詔

朕惟太上皇帝軒墀舊臣朕皆昔聞其人矣矧惟我  
大主之胄元勳之家于今顯榮在者無幾矐然長懷  
得此一老卿生於華閥輔以美文越去闕廷多歷年  
所思以自近知其尚彊已頒召書方竚風采詩不云  
乎雖無老成人尚有典刑卿其趣裝來朝毋徘徊遜

避以拂朕眷想之意焉

賜武泰軍節度使開府儀同三司充萬壽觀  
使曾覲辭免除少保寧武軍節度使加食邑  
食實封不允詔

朕奉承太上之慈訓付授大器于時攀附之臣名在  
帝籍被蒙顯榮今歷更歲時興念疇昔顧瞻在廷無  
幾存者卿受才清明秉誼醇壹皤然耆艾際此亨嘉  
蹈履冲規嚮用全福朕之所優遇乃茲換節名藩進  
位亞保將使遠近聞風知朕篤於故舊有加無已庶  
幾民德歸厚無愧周家之盛何以辭焉

賜新授少保寧武軍節度使充醴泉觀使曾  
覲辭免擇日備禮冊命宜允詔

爵命有冊古也朕比褒耆舊優進孤班固已詔有司  
序簪紱陳金石朕當臨軒而賜之乃茲有陳願置勿  
講易不云乎勞謙君子有終吉雖拂予懷姑成卿美  
賜四川安撫制置使兼知成都府胡元質辭  
免除龍圖閣直學士不允詔

朕敬華閣之儲以奉先訓設清廟之職以待近臣匪  
功不除有昭具在若乃班高學士名擬河圖維時殊  
庸乃稱遶選卿遠器嚴重偉才通明寄予坤隅亢彼

方面雅俗綏靖種夷附懷朕有信賞凡皆為民也蜀在萬里之遠得賢方伯威德惠孚使朕無西顧之憂美名峻職於此何愛宜承寵命毋執謙懷

賜皇弟璩辭免特授少傅依前靜江軍節度使充醴泉觀使恩平郡王加食邑食實封不允詔

朕惟親之欲其貴愛之欲其富古之道也朕承祖宗休烈託于王公之上方親九族以和萬邦惟是昆弟之賢可勿厚乎卿秉心安常率履端靖綏乃燕譽亢吾宗盟比者攷諸閔閔三孤之位久而未進朕用慙

焉趣告大廷登拜亞傅庶幾致予親愛之意卽宜祇服毋事謙陳

賜皇弟少傅靜江軍節度使充醴泉觀使恩平郡王璩辭免備禮冊命宜允詔

朕優褒親盟序進傳位禮亦異數顧難廢於邦常民具爾瞻實有關於事體載披異牘願輟盛儀維用勉從終非朕懌

賜皇子雄武保康軍節度使開府儀同三司判寧國軍府事魏王愷辭免除改判明州軍州事加食邑食實封不允詔

朕惟先王盛時竝建宗親夾輔王室後世有分土無分民非古也卿稟資邃明迪德純茂越去左右久勞蕃宣肆茲來朝爰俾更鎮四明吾近甸郡加賦進邑併用寵行尚懋思朕所以眷遇之意亟祇厥服益劭乃庸無以辭爲

賜利州觀察使知池州張掄辭免召赴行在乞除一在外宮觀差遣不允詔

朕衡平中外器使材能試其事則有臨遣以治民念其庸則有遄歸而就位卿夙備左右具殫恭勤維予志慮之明乃畀以蕃宣之任旣歷歲月益觀勞

一乘傳而來朝尚祇恩遇三循墻而引避毋襲冲  
陳辭雖多成命難返

賜朝請郎試尚書禮部侍郎龔茂良辭免除  
參知政事不允詔

朕臨御四海焦勞萬機永惟治功之難閱日彌長望  
古猶愧思得碩大光明之輔時朕咨度庸以乂民卿  
賦資渾深秉誼端亮德器自重賢猷孔嘉度越班聯  
延寘廊廟維朕時舉有言僉同天之降材曷敢弗嚮  
人之信道亦將有行今卿時逢而位至矣不進與朕  
亟圖三五之治規規辭遜尚何爲焉

賜光祿大夫右丞相曾懷乞解罷機政不允  
詔

朕觀古之老臣乃心王家行道濟時惟恐不及衛武  
公百年猶朝夕箴戒其國欲以自輔豈曰予老維其  
身之圖卿智謀昭通德量夷遠延寘台路具施賢猶  
乃自秋以來時有晦明之疾耆碩方茂陽休不衰尚  
可以有爲也宜虞意持神總領大體丐閑之請所未  
喻焉

賜昭慶軍節度使楊倓辭免知荆南府不允  
不得更有陳請詔



朕於進退適臣初無容心於其間試其能則有峻□  
而不疑遂其私則亦優容而加遇比者擢卿於宥密  
之地意其奮由勲闕可以助成折衝經武之圖也曾  
未逾時遽復辭位雖名遂身退顧不能為朕分一面  
之憂耶無或淹行亟往就服

賜光祿大夫右丞相曾懷再乞解罷機政不  
允詔

朕紹宅丕緒緝熙遠圖廟堂之上所與共籌天下之  
事者亦惟有股肱之良朝夕左右時朕承翼卿朝之  
耆輔國之世臣倚成既隆注意衆重乃遄歸未能再

時又以疾告欲上丞相印綬四方瞻望得無謂進退之遽耶勉肩素誠昭體大誼起就乃位迄咸厥庸

賜朝請郎新除參知政事龔茂良辭免差同提舉勅令所權監修國史日歷所不允詔

朕惟共政之臣下丞相一等凡國家之大典冊不可獨任則有分總而共治事體隆重亦繇其能卿踐揚四方更練憲度周游三館熟究例凡是用命爾以史官律令之事庶幾有所折衷卽宜欽承豈必多遜

山佳舍人玉堂類稿卷第七

崔舍人玉堂類藁卷第八

批答

賜觀文殿學士通議大夫知紹興軍府事錢  
端禮乞仍舊外祠不允詔

朕觀自昔大臣乃心王家中外合體而靡不口其勤  
始終壹節而固將忘其老卿秉誼忠正受材通明口  
予近藩倚乃崇望朕方圖爾庸以風四方之諸侯乃  
欲引寒暑之小愆慕林泉之真適則豈曰達朕志口  
威德旣洽施爲不勞怡精晉神寧處厥位

賜朝請郎試吏部尚書兼太子詹事兼侍讀

李彥穎辭免除端明殿學士僉書樞密院事  
乞檢會累奏除一在外差遣不允詔

朕惟上天眷佑國家將興非常之治則亦生一時口  
材世由道昌賢乃類進易曰剛來而不窮明主在上  
君子之來無窮治乃可爲也卿德宇淵靖材謀敏彊  
揚於邇聯積有顯問稽合輿論延登中樞協於至懷  
孚乃宏蘊今衆賢穆穆竝啓經綸之圖羣觀容容益  
須亨泰之福卿猶以撝謙不居爲言邪趣承寵休亟  
就著位

賜敷文閣直學士朝議大夫知建康府胡元

質辭免召赴行在不允詔

朕差擇外服躋參適聯豈惟更練民情可備周度亦以儲熟時望迄多延登卿文高國華識貫治體越去清近歷勞蕃宣眷懷謀猶思見風采趣解留居之重卽承召節之嚴禮有疾趨誼無謙避

賜朝請郎試中書舍人兼太子詹事兼直學士院兼侍講王淮辭免除翰林學士不允詔朕招徠羣英列寘庶位凡今言語侍從之官俱一時選也乃若直居清禁班冠內朝古人至此以遡紫口凌玉虛者顧不甚重歟卿德器端亮道原淵深口

寶臣時之瓌望夙簡朕志寔登要塗忠純多告口口  
猶安重得代言之體今晉爾於詞林之長職親而口  
美位峻而地嚴是惟朝廷得士之華亦乃儒學逢口  
之盛趣承眷意勿有辭焉

賜承議郎試給事中兼侍講兼權吏部尚書  
留正辭免除權禮部尚書不允詔

朕覽先王制作之明嘆後世襲傳之陋本原浸失僅  
守於彌文議論弗純尚多於舞禮興我中和之化寄  
諸清直之賢卿秉方毅之資積該通之學踐歷華要  
發聞芬香朝有正臣士靡異論越自瑣闥晉陟文昌

位班既登器寶逾重維窮高極遠固不專綿絕之容  
當據古參今毋少損塗歸之譽已孚休命宜略擣章  
賜中大夫參知政事趙雄辭免玉牒所進書  
了畢充禮儀使轉一官依例加恩不允詔

朕惟禮隆者文必縟勞大者報必豐比輯簡編皆關  
宗廟逮於登進侈厥瞻觀卿巖巖碩臣顯顯偉望克  
相盛事沆無愆容推加優章率用舊典任大守重口  
惟先烈之承事畢功宏敢廢賢庸之賞已亮知於口  
節卽酌損於初恩若又確辭得無過遜深爲熟口口  
難勉從



賜鄭藻辭免加恩不允詔

朕以眇躬嗣守大統賴天之靈中外寧壹乃令□□  
日拜況于郊景象屑然禮無不答震于休祥不敢□  
鄉卿以外族之賢典衛宮闈朕得飭躬專精接神靈  
蒙休應皆卿之力也加地進律於典有稽趣其欽承  
無稽我已成之命

賜魏王再上表辭免加恩不允不得更有陳  
請詔

朕郊見上帝饗承嘉休遠及裔夷蠻貊之邦微至輝  
胞翟闈之役配天其澤雲行川流豈吾嗣賢而可遺

乎函封再却陳義雖高廷告一行僉言已允亟宜祇服毋拂朕懷

賜王抃辭免除觀察使恩命不允詔

朕惟春秋之時列國之大夫主辭令治賓客咸口口容談笑尊彊於乃國家朕思得若人而用之口口敏而通強而毅發其智謀克協於朕指咸乃功肆疇厥勞用陟以廉車之寵嗚呼往欽哉圖惟厥成毋拂朕命用揚爾顯績

賜沉度辭免除權兵部尚書恩命不允詔

朕仰惟前代是若建置口官曰六卿各帥其屬口口

邦治惟其人不求備備厥惟賢卿秉乃德裕□□□  
力于四方迪簡在禁塗乃有嘉謀嘉猷其在京□□  
惠和於有民茲用進爾以常伯之位亦惟爾酬應□  
客有庸於王家嗚呼卿其承之惟勞惟能朕不輕□  
乃惟爾百辟用勸

賜皇弟璩辭免加恩不允不得再有陳請詔  
朕比卜景至之日躬執圭幣用事南郊上帝口臨中  
壇賜朕洪禧休嘉辟隱著見景象戰戰栗栗懼不克  
稱思昭天地覃福萬邦詩云豈無他人不如我同姓  
加地之寵趣宜欽承遜辭雖勤數上無益

賜蒲察久安辭免加食邑食實封不允詔  
朕登禮上神膺受祉福惟爾能罷之士爪牙之臣口  
衛乃翼沆於熙事加賜多邑厥惟寵休卿其惠朕熙  
天之命惟忠惟勤宏乃丕績區區多辭毋復以聞

賜曹勛辭免加食邑食實封不允詔

祭必有澤古也廼者三歲躬郊先期宿廟重陰爲沴  
薦禱之夕同雲雨雪大輅啓行日光穿漏禮行樂奏  
光景竝見靈鑒昭答福應游至顧朕何以堪稱亦口  
爾左右小大之臣交修協相用端命於上帝皇天口  
於休成靡敢專鄉詩云烈文辟公綏以多福俾緝熙

於純嘏視勞疇賞於國有程趣宜祇服用共承□□  
休

賜吳拱辭免加食邑除武康軍節度使不允

詔

朕惟爾先世秉誼忠正經營四方厥有顯庸藏在盟  
府肆貽慶於爾後人勤勞王家宏乃舊服今予授爾  
節亦惟望爾以先世之事尚克祇厥寵無煩我申訓  
賜黃中辭免除龍圖閣學士依所乞致仕止  
令守本官職致仕不允詔

朕甚貪賢而欽老凡一時耆厯魁壘之臣非甚病不

能事猶冀其復從吾遊辭榮之奏屢上數却不忍畫  
可卿全德宿望身名俱榮高臥邱園旣起復去精神  
不衰謀猷尚壯朕固遲其來也上章力請堅不可回  
是用陟河圖之隆名以華其歸還笏朝口揮金口口  
卿之於寵利亦云澹然矣朕固以揚高風而口口口  
耳勉承休渥毋事謙辭

賜居中免辭加恩不允詔

朕比以天正之吉肆禮於郊盛牲列陳和樂具奏靈  
旂來下虞樂紫壇顧瞻在列而吾令昆弟肅肅雖雖  
周旋其間執籩奉璋實朕承翼汜於熙成朕何口口

天地之況施而不與吾親賢共安利之乎誕敷□□  
具存彝章睦族尚仁眎勞行賞皆朕所以不庸釋□  
卿也往宜欽承母事多遜

賜曾覲辭免加恩不允詔

朕惟君之於臣義均一體有福咸饗賀慶同之□□  
旋陪朕有年於茲柔嘉靖共休有燕譽比用□□□  
郊邱萬靈宴娛百祥順嚮亦惟爾肅口顯相之助□  
將予於有成竣祠逆釐沛澤庶位章明上天之休施  
衍封加邑姑循彝典朕心固不愜然也尚何辭爲宜  
卽欽承母勤攸訓

賜敷文閣直學士左中大夫知泉州汪大猷  
乞歸就祠祿不允詔

朕夙夜興念焦勞遠民得一良刺史以惠寧之如寶  
珠玉尚肯輕棄卿清規粹德踐揚禁塗典吾重藩口  
有政譽因任滋久發聞日休何爲上書必求口退齒  
髮不衰精神方盛意病未當言也藉欲自逸寧不能  
勉爲朕留慰此一方之人乎祇若訓辭趣安厥服  
賜太尉威武軍節度使提舉江州太平興國  
宮李顯忠上表再辭免加食邑食實封不允  
不得更有陳請詔



人主荷天之休不貴於能有而貴於能口口口口  
之寵不求於能遜而求於能報朕比以陽正景亭口  
款泰壇禮成休明嘉應竝見顧吾虎臣有舊勞於王  
家肆于竣祠亦俾均福卿其忠純果毅勉圖厥庸以  
茂對於寵休則予一人汝嘉辭避之章其止勿上

賜武康軍承宣使新特改添差江南東路馬  
步軍副都總管建康府駐劄王琪辭免差知  
揚州不允詔

朕惟廣陵控制淮海屏蔽東南厥今號爲要地分闡  
之任匪才不居卿蚤宣忠勤茂著休績越從祠館俾

總戎師肆嘉壯猷易典方面朕之付汝蓋不輕矣振  
之於復用則恩深而責重收之於久逸則謀蓄而慮  
精姑略謙章勉圖報禮

賜少保武安軍節度使四川宣撫使虞允文  
乞致仕退安田里不允詔

朕慨念遠圖敷求長筭乃眷西顧孰膺分閫之權  
曰汝諧遂付董師之任逾年于彼厥績用休紀律精  
嚴恩威孚洽方倚憲邦之効遽披納祿之章良駭所  
聞莫喻茲意孔明甚病尚軍務之必親子房未衰  
人事之早棄而況安危所繫神明自扶儻體□□□

愆固當臥而治耳豈勲庸之將就乃欲輕於□□□  
若予懷益共爾位

賜中大夫參知政事錢良臣乞重行黜削謹  
家居待罪不允詔

朕秉要法宮倚成政路固不以繆誤往故督過大口  
卿曩任將明偶乖察舉非親非舊誠亦何心乍佞乍  
賢自當難保況知人之法聖人猶重之卿曷爲引咎  
之深哉

賜敷文閣直學士朝請大夫秦頊辭免改差  
知秦州不允詔

卿胄由喬木之世家名在甘泉之法從起之試郡庶  
勞効之有聞更以治民初眷懷之無間諒居官而可  
紀當易地以皆然豈必謙辭卽宜祇服

賜資政殿大學士宣奉大夫提舉臨安府洞  
霄宮梁克家辭免差知福州不允詔

入登中台出典方面眷倚俱重體貌竝崇卿秉心直  
淵蹈道中正曩任宰事具昭賢猶承寧四方端正百  
度終始不懈本末無疵維閩阜繁厥土嘉樂□□□  
梓諒素習於民風問馬及牛固無勞於政術聊借□  
望亦優舊臣所宜欽承豈必多遜

賜福州觀察使知閤門事兼客省四方□□  
兼樞密都承旨王抃乞除一在外宮觀□□  
不允詔

卿臨事多通飭躬能謹道中樞之密旨典□□□  
儀勤勞備宜眷備采厚豈茲未老乃欲言歸□□□  
懷宜安爾位

賜資政殿學士通議大夫知紹興軍府事兩  
浙東路安撫使李彥穎乞除一在外宮觀不  
允詔

朕惟爲政之道譬諸農功致力專則事乃精用功多

則利自見日者朕考察材能風厲郡國專用久任之法卿亮節冲規惇德敏行曩預政論具聞德言今會稽之治上下和樂就使闕久猶當勉留而况惠方洽而中休政甫成而遽輟則豈朕之望哉所宜少安毋復重請

賜朝議大夫試尚書吏部侍郎兼侍講口口  
修國史兼權吏部尚書程大昌辭免除權吏  
部尚書不允詔

朝廷從臣咸由德選文昌常伯專用老成卿學術造乎道原智識通乎國體精明口口口吏姦於冗口口

三六三集卷八  
大之論發經誼於燕閒邕□□□□□運□□□  
譽宜居八座之聯登冠銓衡遂□羣才之會已□□  
命難徇謙懷

賜中奉大夫試禮部尚書兼翰林學士兼侍  
讀兼太子詹事兼修國史周必大辭免□□  
修纂日歷係在內官轉一官不允詔

朕惟日歷之設茲實信書之原開寶以來悉歸史館  
元豐而後始屬著庭肆子臨御之長逮此纂修之備  
趣條功緒優答勞庸卿邦家名儒臺閣舊老日月獻  
納方深賴於謀猶春秋謹嚴茲具循於凡例尚冀交

修於不逮更期垂美於亡窮賞有故常誼無過遜

賜承議郎試給事中兼修玉牒官兼侍讀王  
希呂辭免除兵部尚書兼給事中不允詔

六卿各得率屬五材誰能去兵乃眷中臺之臣尤高  
武部之長卿器資渾質知略通明學不空言達一時  
政事之體策無遺慮見萬里軍戎之情天生偉才時  
對亨會朕今修明先備嘉靖中區超躋嚴近之聯沆  
究幾深之蘊茲惟素意亦協輿言當體予懷卽共乃  
位

賜中大夫試禮部尚書兼翰林學士兼太子



三  
二  
詹事兼侍讀兼修國史周必大乞檢會□□  
除在外宮觀差遣不允詔

卿冲規亮節聳榮中朝大冊高文追躡前古越自去  
歲游祈外祠所爲春留亦已備盡何未淹於時月又  
遽上於封章詔下禁林羣聽習聞於溫厚禮行世室  
諸儒質正於異同固嘗念之疇可去此宜安厥位毋  
拂予懷

崔舍人玉堂類藁卷第八

崔舍人玉堂類稿卷第九

批答

賜中大夫試禮部尚書兼翰林學士兼侍讀  
兼太子詹事兼修國史周必大辭免皇太子  
講禮記終篇官屬特轉一官不允詔

朕惟元良根本之重固嘗博求名德之彥以輔翼于  
東宮卿稟資直方蹈道醇正朕所簡注俾位端尹而  
能敷繹古今講道法度開益德性日以高明朕甚嘉  
之昔元榮以儲君專精博學謂之國家福祐今經告  
汜篇例進官等亦惟國體所繫且以朕心之喜尚口

何辭焉

賜朝奉郎試尚書工部侍郎兼知臨安府吳  
淵辭免修葺後殿了畢特轉一官不允詔

朕躬修儉德丕變民風慕三尺之階悉存簡質惜十  
家之產盡省繕營維此便朝循夫彝制比緣極陋因  
俾更修卿登備禁途典司天府所付輒辦靡勤弗宣  
茲興事功實體朕意費出餘力役無勞民聿觀厥成  
遂取諸壯爰推加於茂典庶聳勸於具僚卽宜欽承  
豈必多遜

賜宣奉大夫右丞相趙雄辭免秘書省進呈

會要了畢提舉官特轉兩官依例加恩不允

詔

朕惟書契以後文因浸繁典謨而來政乃可考比觀  
儒館亟上奏篇紀綱制度之畢陳品式條貫之具備  
因科分類足自補於一家隨事尋源當可知於百世  
卿大猷經國純德格天配古之文潤澤皇業通今之  
學練達朝章總率雋英全就簡冊宜畀懋賞遂超崇  
階國雖重於器名有典可稽則非濫士雖先於分義  
有勞可稱則非貪卿誠無事於禮辭朕亦何庸於令  
返徒極懇至終難聽從

賜中大夫參知政事錢良臣辭免秘書省進  
呈會要了畢禮儀使特轉兩官依例加恩不

允詔

朕惟朝家有大典禮則必命宰輔爲使以領之乃者  
三館以成書來上朕以爲茲皆祖宗制度邦國軌則  
而朕之所率行疇敢不敬前詔共政之臣董總儀典  
乃七月甲戌麾幢在門簪佩在廷朕肅然覽觀旣用  
嘉歎又陳文物振鍾鼓奉而上之慈庭登而藏之華  
閣悉無愆容汔就成禮者卿之力也茲循前憲優進  
文階而乃陳詞懇激慮於過而弗當維國有體朕敢

聽乎卽宜欽承毋重勤請

賜通議大夫樞密使王淮辭免已進會要經  
修不經進提舉官特轉一官不允詔

治莫重於憲章傳當資於簡冊魏相輔政實始漢事  
之行張說佐王乃先唐典之述卿文華緯國道德致  
君頃登政途嘗領儒省維時載筆及是成書肆疇前  
勞乃畀茂賞僕僕亟拜曾非疊於近恩謙謙有終奚  
亦勤於來奏當卽祇服固難例從

賜中奉大夫權吏部尚書兼侍講兼同修國  
史程大昌辭免進呈會要經修不進特轉行

一官不允詔

居侍從之事策翰林之勲是維至榮厥有彝則卿綜  
練政體明達朝章嘗領羣英與裁大典茲旣觀於登  
進乃亟下於褒嘉維韓愈書而屢書固將垂後使宣  
子遜而皆遜何以勸功毋庸多辭宜卽祇服

賜昭慶軍節度使提舉隆興府玉隆萬壽宮  
楊俊辭免差知江陵府乞依舊任在外宮觀  
差遣不允詔

朕乃眷荊州邈在遠服控潭衡而蔽襄漢接雲夢而  
通巴巫實前代百戰之郊爲今日一都之會卿器懷

沉裕材力剛彊掌民曹調度之繁聞宥府謀謨之密未忘前遇更勉後圖間館珍臺宜釋里居之養碧幢茸纛遂光帥鉞之行尚卽欽承毋庸遜避

賜中大夫提舉臨安府洞霄宮范大成辭免  
差知明州不允詔

朕選建賢侯綏靖方夏間者重鎮闕守必先用舊政之臣豈非以其陟降左右知予德意之所在歟卿清明夷粹之資綜練該通之學出入中外勤勞國家今四明大郡方失吾賢子之愛思得慈惠之帥往撫摩之歷選重臣無越賢望卿其趣裝經闕受命之藩若



其惠利孚洽使民有餘財聲威靖嚴使海無傳箭朕  
方須爾嘉績以風動列服遲徊遜避非所望焉

賜昭慶軍節度使提舉隆興府玉隆萬壽宮  
楊俊上表再辭免知江陵府不允不得再有

### 陳請詔

朕恢宏遠圖簡畀重鎮武侯承德咸付兵民之權牧  
臣司荆尤嚴疆場之守選諸世彥經此外庸卿蚤奮  
材能歷更任使方引洞庭之逸適圖邦翰之良爰刻  
之符俾重吾圉琫戈啓道益光戎乘之行緩帶臨邊  
尚濟勲門之美重披來奏猶拂深懷唯謹固足以折

遐衝惟鎮靜足以綏遠俗方須成效宜略沖章

賜太中大夫充龍圖閣待制知隆興府張子  
顏辭免除敷文閣直學士不允詔

朕惟太上初基二三雄武之臣實能比義勳力再  
造我區夏肆朕臨御念之不忘乃其後人銜訓嗣事  
用克有邦翰之績徹于予聞其於褒表可勿異乎卿  
安和有常通達無滯宅是綏撫最於藩宣朕作興庶  
功吝惜顯職今以禁嚴儒學之直重爾方面兵民之  
觀卿其服茲異恩訖乃嘉績區區遜避非所望焉  
賜朝散郎試尚書工部侍郎兼知臨安軍府

事充兩浙西路安撫使吳淵辭免除權工部  
尚書不允詔

朕誦復古之詩思車馬器械之備修厲精之政期工  
匠技巧之能維時禁路之臣尤重事官之長卿識慮  
通達才猷瞻長轂自計曹尹茲天府績用昭著勤勞  
茂宣念方寄於浩穰宜有加於眷遇分職而倡九牧  
旣優進於巍班掌土而居四民尚盡施於宏蘊已頒  
成命奚事謙章

賜朝散郎試兵部尚書兼給事中兼修玉牒  
官兼侍講王希呂辭免玉牒所進書了畢特

轉行一官不允詔

朕明用慶賞優崇近臣築黃金之臺念首延於名  
鏤白玉之牒茲褒叙於成勞卿邦之碩儒朝之偉望  
學貫羣言而講明政體文高衆作而潤色皇猷摭其  
長才就此丕策今乃過引柄塗之比祈收恩命之行  
九虞朝之官有拜有遜一孟軻之餽或受或辭豈必  
皆同固各有體宜畧謙奏卽承寵章

賜資政殿大學士宣奉大夫知福建路安撫  
使梁克家乞除一在外宮觀差遣不允詔

朕睦懷全閩邈在南服厥土嘉樂維今阜繁圖戎翰

之良將靖彼兵民之衆擇輔臣之舊庶知予志慮之  
明卿稟資安醇執誼忠壹比起家庭之適俾光帥聞  
之行旣越歲時具聞勞効愛物拳拳之純意奉公疊  
疊之小心况乃秉執鈞衡固不勞於一鎮顧瞻桑梓  
復近在於四封豈必言歸乃爲自逸尚收冲請毋拂  
深懷

賜少傅保寧軍節度使充醴泉觀使兼侍讀  
衛國公史浩辭免經筵進讀三朝寶訓終篇  
轉一官可特回授不允詔

朕惟一祖二宗之丕訓布在方冊佑我後人比者申

命儒臣俾卒緒業日御便座不遑康寧自朝向中樂  
以忘倦于時哲艾擁經在前有博見聞敷繹開道熙  
廣朕志進于光明昔晉文公行賞于國三曰道我以  
仁義防我以德惠上賞輔我以行又次賞至於以勞  
事我乃受下賞國人聞之於是大悅卿宜受上賞者  
也固已徇撝謙之志而移恩于族屬矣若又固辭得  
無過乎

賜史浩再具辭免轉官回授不允不得更有

陳請詔

朕崇嚮儒風敷求祖訓五帝之臣莫及敢自比於高

明百篇之義得聞正有資於誦讀卿亮直和易清純  
邃深蚤際初潛具輸忠益茲陪麟趾之殿適畢金華  
之書緝熙單厥心雖予不急終始典于學咸乃有勞  
已高挹損之風姑下馳恩之命尚披沖奏殊拂深懷  
當宜欽承毋庸重請

賜特進觀文殿大學士判建康軍府事充江  
南東路安撫使兼行宮留守陳俊卿上表再  
辭免除少保加食邑食實封不允不得再有

陳請詔

朕觀祖宗盛時亦惟有履臣哲輔列在方嶽位崇望

重猶古元侯承寧四方翼衛王室用能裔夷遠邦亦  
克恭畏朕甚慕之卿經邦之才鎮物之度膺受委寄  
保釐別都民習其化以安靜而平士服其威以簡嚴  
而重朕所以釋然無一面之憂者以卿在也出綽大  
庭晉位亞保庶以褒異顯績風示庶邦之諸侯乃欲  
勿承得乎成命維行多辭無益

賜通議大夫參知政事周必大辭免同提舉  
勅令所不允詔

朕觀國朝循唐舊制凡刑定律令必以廊廟之臣領  
之示不敢輕也卿以經術潤皇猷以智畧斷國論宜



三言二集三言  
以餘力訂吾丹書況今倚任大臣總正諸夷宏章鉅  
典各奏厥成卿獨袖手於其旁可乎

賜通奉大夫樞密使王淮辭免樞密使日參  
如遇押班亦免宣名不允詔

朕酌稽前猷優禮台路誠至則文可簡任專則體亦  
尊卿高明適中敦大成裕練達萬事輯寧四方昔田  
單相齊齊王一日曰召相單來左右驚而諫之今朕  
端臨當宁延見羣臣而吾元輔乃抗聲傳名於下固  
朕之所未安也況日御別殿體殊正衙贊呼當儀宜  
有可略卿無辭焉

賜敷文閣直學士太中大夫知隆興軍府事  
充江南西路安撫使張子顏辭免差知紹興  
府不允詔

稽山勝地夙推禹會之朝浙水名藩今列漢都之輔  
簡求治最畀付帥權卿器度端純風猷和雅才能之  
茂稟於天資忠義之傳濟厥世美曩倚蕃宣之重尤  
高牧御之良爰省乃成宜易之鎮帝城可望遂寬存  
魏闕之心民瘼是除當有及京師之福已乎寵命難  
徇謙章

賜宣奉大夫右丞相趙雄辭免國史院進呈

四朝正史志了畢提舉官特與轉兩官依例  
加恩不允詔

朕惟五始之法變而遷史行八書之體拘而漢志作  
眷皇家之累洽仰列聖之嗣興威靈在天法度垂世  
茲告編摩之備首旌指授之勞卿以全才運理事機  
以宏度鎮寧方夏擴其餘力就此信書方頒懋典之  
常遽閱需章之上曩者疊緣褒進咸徇謙陳民罔中  
而爾中固當懲於過賞前不受而今受亦何損於高  
風當卽祇承無庸重請

賜通奉大夫參知政事錢良臣辭免國史院

進呈四朝正史志了畢禮儀使特與轉兩宮  
依例加恩不允詔

朕觀祖宗舊制信史成書則提綱宰輔率屬以進而  
已近世禮緣時備事逐情隆於是威儀文物之繁視  
昔加盛朕率循成則用不敢違乃者書成汗簡事集  
累朝登進端宸寶藏延閣卿董正盛禮周旋祓容迄  
臻于成宜與其賞文階之進固有故實尚何辭焉

賜德壽宮婉儀張氏三上表辭免進封

太上皇帝淑妃恩命不允不得再有陳請詔  
朕紹履邦圖躬勤于道備物致養惟恐於不隆先意

承顏惟恐於不至乃聞碩媛夙著令猶調滑甘寒煖  
之宜伺出入起居之節安和有度淑謹無違協于深  
懷錫是優典修六宮之職已高妃掖之華奉萬年之  
觴當溢親庭之喜宜祇寵命卽止謙章

冊命宜允詔  
賜德壽宮淑妃張氏辭免令所司擇日備禮

朕惟命冊之盛禮成之樂歌之古也朕崇建天妃虞  
侍親側方將備物展儀顯命于朝今上章固辭得不  
成其順巽之美乎雖庸勉從良爲缺然

賜宣奉大夫右丞相趙雄再具奏劄子辭免

進呈四朝正史志了畢特轉兩官依例加恩  
不允不得再有陳請詔

朕惟史書之成一家事叢則志必備宰相之總衆職  
勞大則賞必隆卿達識長才宏摹偉略綜練政事勤  
勞國家雖常深篤於眷懷曾未優加於恩禮適奏篇  
之來上知褒典之當行爰不淹辰趣令頒制卽予心  
之可見豈卿意之未孚辭已至三今爲過矣令無或  
再尚可返乎

賜通奉大夫樞密使王淮辭免進呈四朝正  
史志了畢經修不經進前權提舉官特轉行

一官不允詔

朕觀大中祥符間祖宗正史告成維時宥密元臣曰  
欽若曰堯叟咸緣舊勞竝被優禮今朕延集儒英登  
載前烈事業鉅功著職脩逮於差序勞伐而知吾  
樞輔實嘗提綱於其間可無厚乎卿德器嚴重道原  
純深燮和兵戎持守法度方將濟經綸之業豈徒矜  
翰墨之功行賞酬勲率用故實執謙雖至所不得從

崔舍人玉堂類藁卷第九

崔舍人玉堂類稿卷第十

批答

賜通議大夫參知政事周必大辭免以四朝  
史志成書曾經修特轉一官不允詔

朕緬惟神祖適駿先猷維時史臣咸極妙選然方修  
而曾鞏遽釋其任旣成而蘓頌弗預於恩乃知名儒  
宗工宣勞載筆任而成茲亦古昔之所難也卿高文  
大冊博識洽聞追迹二臣固已有光向者四入承明  
咸典斯事網羅囊括用力最多今釋簡冊登廟堂曾  
不淹口成書來上不其榮序答翰墨之成勞侈儒術



之亨遇一階例進予猶款然遜避之章所毋庸至

賜朝散大夫試吏部尚書兼侍讀兼修玉牒  
官兼修國史王希呂辭免修進四朝正史志  
了畢經修經進官特轉一官更減一年磨勘  
不允詔

朕惟文人多史才少此古昔之通患也此以四朝功  
德宜有信書設局有年告成無日固嘗明發興念選  
三長於侍從之中果得其人足辦吾事乃者丞相率  
屬上所著史志鋪觀反復有當朕心維時載筆之首  
勞可無褒乎卿識略通明風猷高邁方聽履星辰之

上乃策勲翰墨之間儒術有光衆聽維允賞稱于事  
尚何辭焉

賜中大夫試尚書兵部侍郎兼同修國史芮  
煇辭免修進四朝正史志了當經修經進官  
特轉一官更減一年磨勘不允詔

朕聞自古有史維才實難仰四聖之豐規接五朝之  
丕蹟率衷儒彥始就志書告于神明遂侈先猷之盛  
老於文學實資近侍之賢卿筆力畦徑雍容古風師  
友淵源根據經術閱奏篇之來上嘉用志之良勤已  
錫優章是循故實卽宜祇服毋重陳謙

賜少傅保寧軍節度使充醴泉觀使兼侍讀  
衛國公史浩上表再辭免進呈四朝正史志  
了當依進 徽宗實錄成書例推恩特依所  
乞許回授不允不得再有陳請詔

朕觀祖宗信史咸領台司然而成書進御第賞疇庸  
肆尋前勞多處外服今朕有元臣錫第輦下舊所典  
領親見其成宜褒寵之所當厚也而卿以虛謙避成  
功以恬退厲浮俗敷叙誠蘊願還恩章朕固已徇卿  
之志而俾馳於族親儻猶固辭是將廢賞賞國之典  
詎可廢乎

賜少保觀文殿大學士判建康軍府事充江南東路安撫使兼行宮留守陳俊卿乞檢會累奏許令致仕不允詔

選建輔臣臨撫都會龍蟠虎踞念方寄於蕃宣嶽鎮淵渟顧無逾於宿舊卿純深安重簡易清明勤勞載於邦家文武憲於夷夏年齡雖艾風烈方彊寬予顧懷亢彼方面典北門之管尚誰宜之垂故里之車奚遽議此況今田閭綏靖疆場晏清汜成茂庸聊借重望叙陳雖至所不得從

賜朝議大夫權尚書吏部侍郎兼太子詹事

兼同修國史兼權吏部尚書闕蒼舒辭免除  
吏部侍郎不允詔

朕招延雋能列布侍從必使資深而望重遲以歲時  
亦惟功著而職脩正其服位卿器範凝遠材猷邃明  
自擢序於天官寔發舒於賢業以平恕振滯淹之患  
以清通䟽盤錯之繁時聞嘉猶日稔令問顧瞻在列  
念久著於勤勞登進爲真實素由於知遇已孚成命  
奚事謙章

賜保康軍節度使提舉佑神觀士歆辭免除  
嗣濮王加食邑食實封不允詔

朕惟安懿王之功德積厚流光當祀百世比者宗老  
虛位惻然有懷顧瞻近親尚見耆碩率德蹈義肅恭  
在廷是用命以分茅纘乃舊服奉其烝嘗今卿陳德  
弗類願畀于宗族之賢詩不云乎維其有之是以似  
之尚誰宜焉

賜中大夫知明州軍州事兼沿海制置使范  
成大辭免除端明殿學士不允詔

朕惟崇名顯職皆國家砥礪羣下之具也前者深詔  
執事非功不除守此之令堅如金石今吾廊廟大臣  
之舊猶必循此而後予者豈非信乎卿謨猷川行智

略輻輳鎮服藩翰輯和軍民具聞忠勞爰錫褒賞風  
示顯績聳榮列侯尚思眷懷益展報効謙避之過所  
不必聞

賜資政殿大學士宣奉大夫知福州軍州事  
充福建路安撫使梁克家辭免復觀文大學  
士乞檢會前奏除一在外宮觀差遣不允詔  
觀文舊紫宸殿也冠職其間尊寵非他學士比近世  
專以待前宰之有德善勲勞者秩高地近朕不假人  
卿道原淵純德量邃遠釋政而去予懷不忘觀過知  
仁嘗坐少損爲國信法于茲有年今七閩之政中和

簡易兵民便安朕得無褒賞以風四方之諸侯乎既還寵名仍俾因任僉論維允尚何辭焉

賜中大夫知明州軍州事兼沿海制置使范成大再辭免除端明殿學士不允不得再有

### 陳請詔

朕惟賞當功則臣下勸名稱位則國體尊卿達識通才清規亮節賢聲顯重夙表朝端王事勤勞殆環天下曩煩舊德俾殿東藩仁心日宣政績時乂追前疑之宿遇答近輔之新庸集於眷懷厚此褒寵所當祇服豈必謙陳



賜資政殿大學士宣奉大夫知福州充福建  
路安撫使梁克家再辭免復觀文殿學士依  
舊知福州乞檢會前奏除一在外宮觀差遣  
不允不得再有陳請詔

朕選建仁賢惠綏黎庶教條服習既不奪其成績用  
著脩亦無輕其賞卿醇深之度宏毅之資均榮柄途  
倚重邦翰維日滋久厥勤茂宣推加寵章褒表治效  
疊覽囊封之上確辭恩命之行叙陳燦然謙挹過甚  
廟堂宿望實繫羣觀藩嶽重臣豈容輕易遲以少日  
既其外庸沖規孔高所不得徇

賜少傅保寧軍節度使充醴泉觀使侍讀衛  
國公史浩辭免經筵進讀正說終篇特轉一  
官不允詔

朕厲精政幾崇鄉儒術永惟章聖皇帝之正說該極  
治道辭簡意明爰開金華趣命進讀庶幾是憲是式  
對於前光卿兩朝純儒一代宿德幡然耆艾擁經在  
前開道朕心曉暢旨詩云無言不酬無德不報今  
俾朕悉聞先訓之美而可無以致其意乎一階之進  
率用彝章辭避雖勤良所難徇

賜正奉大夫參知政事錢良臣通奉大夫參

知政事周必大以積雨未霽乞先次貶秩不  
允不得再有陳請詔

朕惟水旱之來厥有咎證其爲天人交感之際則在  
懼與不懼爾今農事維時霖潦不止夙夜兢惕未知  
其由卿位居政路職貳國均相與憂之庶幾濟此乃  
欲潔身辭寵可乎

賜銀青光祿大夫右丞相沂國公趙雄以積  
雨未霽乞先次貶秩不允不得再有陳請詔  
朕惟災異之來上天所以警戒人主也霖雨爲愆年  
麥告敗浸淫不已害于農田卿體朕之心任朕之責

疊陳封奏願致國章言之克誠躬乃自厚薄不云乎  
應天以實不以文今推求闕違稽按咎證得無有以  
戾人和而召天異者方與卿等思之曷爲引咎之深  
哉

賜敷文閣直學士太中大夫知泉州軍州事  
程大昌乞改界一在外宮觀差遣不允詔

閩山袤長泉爲都會蠻琛夷寶利輸中州朕選儒學  
侍臣之鎮所以布寬詔惠遐俗也卿渾深之度簡重  
之資出臨名邦休有善狀尚體素遇迄終令庸引閑  
告歸毋至重請

三  
賜少傅保寧軍節度使充醴泉觀使兼侍讀  
衛國公史浩辭免進讀正說終篇特轉一官  
依所乞特回授不允詔

朕登延邇聯講誦先訓終篇之渥賁于儒林卿委口  
盛權嚮用全福臨寵知懼陳情益高聽馳茂思勉用  
近比崇儒重道朕方歉然胡爲謙辭猶復勤請巽雖  
令德過乃失中固避之章宜止勿上

賜少傅史浩再上奏劄子乞歸田里不允詔  
卿深迷遭逢之榮具陳廉退之誼章却復上志執愈  
堅方待之隆何去之果敬故者固思致其厚留賢者

乃欲咨其謀鬱於深衷重此大體當少安於恬養亦  
奚累於高風而況身名俱榮責望不及雖在京邑何  
殊山林豈必言歸乃爲自適諄諄之請宜勿復聞

賜少傅史浩上表再辭免進讀正說終篇轉  
一官特回授不允不得再有陳請詔

朕惟至治之世靡不尊德而樂道元榮稽古而膺賜  
綬之恩蕭相授經而被封侯之賞載之史冊未有議  
其過也卿誦說先訓熙廣朕心逮於終章多所宏益  
今一官之賞歉然不居而俾馳恩于後人亦已損矣  
猶陳謙辭懇懇不已是使朕邈無恩禮以致崇重之

意可乎宜乎至懷勿復有請

賜少傅史浩辭免今來所授官稱與先臣師  
仲適同乞特許辭避不允詔

二名不偏諱舊矣國初或大臣莫從所陳或小臣聽  
遂厥志繫於一時未有成則至嘉祐始申明禮律今  
令甲所莫著之易也卿確守謙規懇還恩典旣窮辭  
於累牘復推義於大門事固甚明理無可徇

賜銀青光祿大夫右丞相沂國公趙雄乞許  
上還丞相印綬畀以外祠不允詔

朕聞君舉賢而自輔臣遇主而後伸用能同心協慮

濟於治功簡策所紀何其盛也卿受才偉明植器方重朕所自擢人其具瞻今秉德輔相三年於茲矣登進才能執據法度庶績維乂羣言孔嘉朕方委任不疑庶幾前古君臣之盛乃欲遽舍而去何哉精力方盛曾無少愆星文稍違旋已順軌鋪援爲說得無過乎宜安勿言朕志已定

賜右丞相趙雄辭免特授觀文殿大學士四川安撫制置使兼知成都府乞檢會除一在外宮觀差遣不允詔

位台階而調元化開幙府而撫成師俱爲委任之隆



豈有眷懷之間卿宏材經遠瞻智潛微歷踐要塗旋  
登上宰更練萬事勤勞百爲勉循高情聽釋重任爰  
錫隆名之寵庶光良翰之行尚披謙章願返渙號積  
三年輔相之勞而授職非無績之可名斂四海經綸  
之業而偃藩豈有嫌之當避雖亮冲守固難曲從

賜樞密使王淮辭免特授光祿大夫右丞相  
兼樞密使進封福國公加食邑食實封不允

詔

朕承天寶命臨御四方惟是一日萬幾不能獨任敷  
求良輔作爲股肱猶疑須龜猶正須墨協志同德用

又我民卿涉道深純受才宏遠秉誼中正勤勞王家  
忠規密謨朕所自簡終始表裏一節不渝茲用告諸  
在庭命以作相庶幾旦夕承翼濟於丕平民言具嘉  
朕志素定而乃循執謙守遜避弗居詩不云乎德輶  
如毛民鮮克舉之我儀圖之維仲山甫舉之卿何辭  
焉

賜端明殿學士朝請郎僉書樞密院事謝廓  
然辭免除同知樞密院事不允詔

萬幾之繁關於國體五兵之本屬在樞廷比者酌前  
憲以揆宜命相臣而領使繼圖才傑俾晉位班卿德

宇靖明知機融達自簡識擢具昭忠純居言責則抗  
論以辨正邪備禁途則輸誠而勤獻納爰寘右府益  
紆賢猶堅履尚以不渝暢精神而自遠茲以序進協  
於僉同方隆宥密之基宜赴亨嘉之會尚披謙牘殊  
拂眷懷

賜王淮辭免提舉編修玉牒國史院國朝會  
要所勅令所不允詔

宰相事無不統固不以一職名官至於信書鉅典事  
大體重所以昭祖烈垂邦彞者可輕所畀乎卿學貫  
前聞識周庶務方踐宰路盡摠賢猶總領羣司全就

衆作咸所優裕尚何辭焉

賜正奉大夫錢良臣辭免除資政殿學士乞  
奉祠田里不允詔

朕總攬萬幾優崇四近待以誠則固將責其効念其  
久則亦思全其歸卿才術疏通性資和裕蚤結異眷  
歷登要塗積其賢勞授以柄任爰念廟堂之重當稽  
體貌之宜秘殿隆名真祠厚祿旣昭予遇亦徇爾陳  
謙避之辭毋庸重請

賜中大夫同知樞密院事兼權參知政事謝  
廓然辭免權監修國史日歷不允詔

國家設置文館編摩信書必命大臣領之凡以事大  
體重謹所折衷也自非兼集衆長配古良史亦豈輕  
畀其任乎卿亮直純明該貫通達登踐廊廟發舒材  
猷宜從庶務之間往訂諸儒之論沆就大典用傳無  
窮茲所優爲豈必謙請

賜太中大夫守尚書兵部侍郎兼侍講芮燁  
辭免兼侍讀不允詔

朕研究治道樂聞嘉猶尚論古人思見亮節若唐陸  
贄之論諫所謂恨不同時者比開經筵因命進讀豈  
惟慰忠臣之不遇抑亦廣涼德之未聞卿儒林勝流

禁路宏望從容清燕敷暢前言茲選甚高衆論維允  
謙避之請所不必聞

賜朝請大夫充敷文閣待制蕭燧辭免除吏  
部侍郎不允詔

朕遴簡雋能列布侍從至於去國雖久眷焉有懷則  
亦召而還之示不輕選也卿開亮坦夷表裏一致朕  
所自擢寘之爭臣操履不渝彈擊無避越去邇列久  
勞外藩今天官須賢無易汝允是用趣對昕殿卽頒  
除音豈惟重吾禁嚴亦以風示中外俾知朕意之所  
鄉尚何辭焉

賜觀文殿學士宣奉大夫知福州充福建路  
安撫使梁克家乞畀以外祠不允詔

朕觀祖宗盛時元臣巨老列布方嶽於時中外瞻望  
尊榮則亦知國勢之崇用殿我王室丕載厥庸卿亮  
直純明裕和敦重輔朕維舊道德循循宣勞外藩忠  
壹不懈今七閩樂土實便故鄉條教素孚績用深茂  
乃欲釋任而去則豈朕之所望哉德量可以大受豈  
有滿而懼盈政化期於遠成寧當久而思退勉卒乃  
績毋拂予懷

崔舍人玉堂類藁卷第十

崔舍人玉堂類藁卷第十一

青詞表疏

建康府開啓天申聖節道場青詞

恩厚慈尊已極四方之養慶逢誕節爰祈萬壽之休  
涓以令辰卽茲勝地啓瓊科於祕洞肅颺御於嘉壇  
祇達精衷丕延景福

滿散朱表

慈闈紀慶適臨朱夏之辰仙洞延真恭徹紫虛之鑿  
祇循祕典迄就沖儀具殫欽翼之誠茂介壽康之祉

太一宮 太上皇帝丁亥本命青詞



慶承慈養方形孝治之風序屆朱明適協命元之紀  
具嚴祕館祇祓清壇按三洞之真科下九天之僊御  
庶回沖鑒永錫純禧

滿散朱表

奉真僊館旣備罄於丹誠集祐親闈當永依於慈覆  
錫茲介福延及羣生

太一宮 太上皇帝丁亥本命青詞

慶集慈闈方極敷天之養氣回素籥適臨元命之辰  
繹妙本於靈函啓真科於祕洞具嚴沖式茂介純禧  
益增方至之休永庇重明之運

滿散朱表

慈極居尊屬推辰於命紀殊宮按式茲訖事於仙儀  
仰祈保右之休滋錫履洪之福

太一宮 壽聖明慈太上皇后生辰青詞

宸闈致養方祇事於母儀寶曆標祥適載臨於誕節  
祓除祕館宣演真筌恭憑清淨之緣仰助壽康之福  
後天難老應地無疆

滿散朱表

敷科真館祇勤頌禱之誠介壽慈闈具徹高明之鑒  
仍回丕祐普及函生

萬壽觀開啓會聖節道場青詞

冬律道寒適協既盈之月皇圖衍慶爰當載夙之辰  
卽靈宇之深嚴闢嘉壇之虛靜繹宣祕典延降高真  
仰祈眷顧之休俯錫履鴻之福

蒲散朱表

節臨初度具殫徼福之誠教演殊宮茲畢延真之會  
永孚善應宏覆昌圖

太一宮開啓會慶節靈寶道場青詞

發祥初度莫酬慈德之勞薦信上圓具繹沖科之蘊  
竚神光於煥幄肅颯馭於瑤壇孚格靈觀道迎景福

竝受四方之養永膺萬壽之符

滿散朱表

慶源流衍紀甲觀之初辰仙宇邃嚴畢丹臺之法會  
更資介福普及寰區

建康府開啓會慶聖節道場青詞

陽月就盈適臨初度殊廷款聖具輯沖儀啓雲笈之  
靈篇旅霞餐之淨供道迎清御降集純休永膺難老  
之期誕保無疆之業上偕親壽下底民生

滿散朱表

沖科具舉熙事迄成荷靈鑒之降觀企真旂之旋邁

益蕃盛福丕乂烝民

建康府會慶聖節道場青詞

祇荷慈謀紹膺丕統適協旣盈之月甫臨載誕之辰  
恭卽仙區預嚴祕宇集茲科式燕格高靈期以精誠  
道迎景福庶延休於菲德更均佑於函生

蒲散朱表

震夙之辰適當良月神仙之宅是有殊宮嘗祇被於  
齋衷俾具陳於法會肅延真馭昭格靈觀仰祈介壽  
於雙親俯冀降康於萬國默依道蔭永御邦圖

萬壽觀

太上皇帝丁亥本命青詞

慈極承顏備敷天之大養清臺驗歷著元命之初辰  
爰卽仙區具循沖式範玉京之芳獻演藥笈之真筌  
鋪薦丹誠道迎景福

滿散朱表

日環命紀方介壽於慈親事訖仙儀已殫誠於大道  
仰祈沖鑒永錫繁禧

萬壽觀

太上皇帝本命青詞

祇奉慈顏躬修孝養屬按清臺之歷適當元命之辰  
爰祓仙區俾遵道式肅瑤壇而集供啓瓊笈以繙文  
仰冀衆真永綏多福

三定三書十一  
滿散朱表

迎休慈極敷式仙宮已熙事之備成維丹誠之昭達  
更回丕貺均逮羣生

萬壽觀安奉丁亥丁未本命相屬星官位牌

青詞

地嚴祕宇館寓真旂向以加修嘗慮工徒之瀆今慈  
告備復祈威像之臨爰即仙區具循沖典冀竝膺於  
休福仍均祐於函生

滿散朱表

仙館載新方妥寧於歛御真科具舉已敷達於忱誠

仰祈有赫之觀丕錫無疆之福

萬壽觀 太上皇帝丁亥本命青詞

祇奉慈顏躬修至養屬陽春之季月紀元命之嘉辰  
爰卽仙宮敷陳於醮席庶通誠意延佇於飈旒仰資  
沖靜之緣茂介康寧之福

蒲散朱表

按錄殊廷薦恭羣位辭無祕祝維介壽於慈親事及  
休成益歸誠於元造

萬壽觀開啓天申聖節道場青詞

薰風阜物協炎祚之重明祥電繞樞紀慈庭之初度



恭循道式祇祓仙區詠雲極之空歌範霄晨之芳供  
具敷誠緼昭格天真冀垂眷佑之休永錫壽昌之福  
滿散朱表

祇脩孝養欣臨震夙之辰虔介壽祺具徹高明之鑒  
更回丕佑永託熙圖

萬壽觀 太上皇帝丁亥本命青詞

天人祐助光開壽貺之符日月推移環次命元之紀  
卽颺旂之靖館集羽禳之勝流參按沖儀敷陳芳供  
庶薦恭於霄極益介福於親庭

滿散朱表

誠意昭通具徹九清之監慶祥純錫永膺萬壽之期  
施及羣生賴茲景福

萬壽觀 太上皇帝丁亥本命青詞

祇奉親顏躬脩子道八月載績揆元命以端辰萬壽  
無疆祓精衷而致禱虔卽真游之館具陳祕籙之儀  
仰冀博臨永垂孚佑

滿散朱表

介慈慈庭歸誠霄極靈娛昭答熙事備成采殫頌禱  
之誠重達高明之聽

太一宮 壽聖齊明廣慈太上皇后生辰青

詞

夙依道蔭祇奉母儀灑氣澄空方協霄星之象嘉祥  
紀旦載臨夢月之辰爰卽仙宮具遵沖式陳層晨之  
芳供詠祕笈之空歌虔冀高真永綏景福安享綿區  
之養常齊慈極之尊

蒲散朱表

祥開沙麓序當萬寶之成事歲琳宮誠徹九清之遠  
重祈元造永介繁禧

明堂大禮前於天慶觀開啓預告道場青詞  
荷天丕序適當三歲之常稽古彌文肇講九筵之饗

預循國典祇卽仙宮演祕洞之真科下層晨之法御  
庶蒙靈右終舉上儀

萬壽觀 太上皇帝丁亥本命青詞

慶集慈親方享殊庭之養時標陽月適臨元命之辰  
恭卽仙區具遵沖式瞻睟容於煥座款真馭於嘉壇  
仰冀應誠永垂介福

滿散朱表

承顏順志益恭子職之修佑福兆祥更衍天休之至  
逝瞻虛極傾薦丹衷

明堂大禮畢告謝青詞

精卜商辰躬祠世室鳴鑾宿廟積雨夕收端冕升堂  
美光夜見荷純休之丕應迄熙事之備成祇卽仙宮  
具敷道式庸達齋明之意庶酬春佑之恩

滿散朱表

合宮宗祀當盛禮之時行嘉應駢臻豈眇躬之能饗  
肅蠲淨宇祇按沖儀咸薦丹誠具聞衆聖誓永依於  
大道冀純佑於丕基

太一宮開啓會慶聖節道場青詞

祇承親訓寅奉邦圖天開震夙之辰適肇臨於寒籥  
人介蕃昌之福敢專有於眇躬夙啓清筵具陳芳供

庶上迎於丕貺悉下集於慈庭欽布丹衷默口冲鑿  
滿散朱表

陽月肇寒適紀始生之度仙儀介福庶酬慈育之恩  
既訖事於清壇益歸誠於大道

建康府啟建會慶聖節道場青詞

純貺開先適臨初度輿情歸美是紀良辰瞻勾曲之  
靈峯祓神仙之真館敷陳道式延降飈旂仰祈親壽  
之綿長俯冀民生之康阜更廻丕祐遂集眇躬九功  
之德可歌諸福之物畢至

滿散朱表

三才集卷之十一  
就盈之月天肇啓於昌期愛上之情人悉歸於景口  
敢因衆志仍達丹誠按瓊簡之真筌延霞旌之仙御  
肅祈丕況永保熙圖茲甫及於休成益虔歸於元造

萬壽觀開啓會慶聖節道場青詞

長發其祥協明昌之休運誕彌厥月紀震夙之初辰  
祇按冲儀肅涓靖宇像霄晨之芳供誦藻笈之靈章  
鋪薦誠忱順迎福况庶依承於道蔭益保乂於邦圖  
滿散朱表

純誠上達熙事備成敢專福於眇躬實同休於庶俗  
茂膺降鑒益厲齋明

萬壽觀 太上皇帝丁亥本命青詞

躬修至德祇奉慈庭元命標適辰履隆冬之序真科  
按式具殫善禱之誠旅芳供於清壇瞻睟容於煇座  
虔祈宇鑿丕錫純祺茂膺萬壽之期永享四方之養  
滿散朱表

高真御座衆聖環筵旣祇荷於博臨庶永綏於景福  
傾瞻虛境敷露齋衷

皇帝進奉 壽聖明慈太上皇后生辰功德  
疏文

恩重母儀適紀誕彌之日誠修子道莫酬厚載之口



三才類集卷十一  
祇輯真筌虔伸善頌萬祥川至百祿岡崇永□□□  
之休上偕慈極安享壽康之祉下庇函生

皇帝進奉 壽聖明慈太上皇后生辰表詞  
序臨商籥浮瀨氣於良辰慶集慈闈紀休祥於初度  
禮行廣內歡溢綿區渭水興周塗山翼夏坤儀□正  
夙推恭儉之風帝所清虛竝受安榮之養靜觀妙道  
茂介純禧臣嗣守丕基欣逢今日虔致寶香之祝恭  
延壽筭之昌

崔舍人玉堂類藁卷第十一

崔舍人玉堂類藁卷第十二

青詞表疏

萬壽觀 太上皇帝丁亥本命青詞

慈庭養志慶方集於昌辰仙簡標符祥實開於元命  
敢因良日祇即殊宮啟雲笈之靈篇肅霞旌之真御  
虔祈昭鑒丕錫純禧獨觀衆妙之門永享萬年之福  
滿散朱表

延真祕宇介壽慈親熙事涓成丹誠敷達更道迎於  
景貺益孚佑於昌圖

臨安府仲春就吳山忠壯英烈威顯王廟設

醮青詞

天開行闕地據洪流眷民俗之奠居慮波濤之密邇  
考唐人之賦雖陽散而當微問吳土之宜乃春中而  
特大爰循彝典祇即靈祠繙霞觀之冲科款雲輶之  
真御敢祈聰監丕錫順祥沆銷暴溢之虞永享安寧  
之福

建康府茅山崇禧觀開啓天申節道場青詞  
紹隆熙運祇奉慈庭游於物初正協道心之適養以  
天下方修子職之恭屬當彌月之辰爰即羣仙之會  
旅延飈御參繹雲章仰祈有赫之觀俯錫無疆之祐

獨高帝壽永覆邦圖

滿散朱表

頤神養性方觀衆妙之門儲祉發祥式紀千齡之運  
祇因盛節共飭冲儀詠金簡之靈篇啟玉京之清會  
丹衷敷達熙事休成益傾頌禱之誠永介壽昌之福  
萬壽觀開啟天申節道場青詞

日永仲夏適開載夙之祥天生真人誕啟中興之運  
屬當盛旦祇即殊宮旅芳獻於嘉壇佇神光於煥座  
敷陳冲式諷詠靈章恭俟鑒觀永垂孚佑案六經而  
□德既超邁於前聞參萬歲而成純更丕延於景福

滿散朱表

星樞感瑞方肇紀於昌辰霞觀延真已具殫於誠蘊  
肅迎丕貺駢集慈庭更回有衍之祥永輔無疆之歷  
萬壽觀 太上皇帝丁亥本命道場青詞

頤神養性方高蹈於殊庭介福迎祥宜率循於祕籙  
茲履清秋之序適臨元命之辰祇被仙宮具嚴勝會  
佇神光於煥座演沖教於琅函仰冀博臨俯垂敷佑  
茂享無疆之壽永扶不拔之基

滿散朱表

凝款丹晨薦恭羣位福祥繁會方下集於慈庭仗御

裴回當端歸於霄極默懷監謨益罄齋明

臨安府仲秋醮祭吳山忠壯英烈威顯王青

詞

長江設險靈汐隨時山立海門折湍流而奔會月臨  
秋籥挾陰慝以暴興祗即名祠敬遵沖式延九清之  
法御啟三洞之真筌伏願約束波臣鎮安地紀舳舻  
千里永消習坎之虞煙火萬家咸獲奠居之福

天慶觀報恩光孝觀青詞

旱魃爲虐遂連夏秋黎民阻饑當在旦夕方竭吁嗟  
之請庶消并隔之災爰露丹誠重干沖鑒□默□於

□應即垂賜於嘉休三日成霖儻早沾於□潤百穀  
就實尚可冀於豐登

太乙宮 壽聖齊明廣慈太上皇后生辰青

詞

玉管吹商正九秋之清序瑤臺夢月慶千載之嘉辰  
祇命羽流具嚴仙宇下霄晨之法御啓藥笈之真筌  
仰冀鑒臨俯垂孚佑壽同慈極既齊箕翼之長福燕  
後昆更閱雲來之盛

滿散朱表

躬修子職祇奉親顏適標玉勝之期具歲金科之式

福流慶衍當均被於羣生事畢功宏益虔歸於大道  
萬壽觀純福殿開啟安奉 太上皇帝

今上皇帝本命相屬星官位牌青詞

祇飭殊宮欽崇大道量功慮事嘗圖輪奐之新揭虔  
妥靈爰肅威神之下敢涓良日即啟嘉壇演祕籙於  
琅函瞻睟容於煥座仰祈昭鑒俯錫善祥介眉壽於  
親庭洽太和於海宇益肩精意永迪淵崇

滿散朱表

道妙無方高設清真之御命生有本環分主衛之神  
茲竝妥於沖存已畢成於熙事永懷福貺□□齋明



萬壽觀申乞撰會慶聖節道場青詞

欽承慈蔭紹履丕圖長發其祥仰識儲休之自誕彌  
厥月敢專徼福之私祇即仙宮肅遵科式像九霄之  
淨供詠三洞之靈篇延佇沖游道迎景福上介雙親  
之眉壽下祈萬國之丕平永竭丹衷默依大道

滿散朱表

沖儀修舉靈鑒孚通雲景杳冥行返三清之馭福基  
堅固當膺百順之休益罄純誠庶承景福

太乙宮申乞撰開啟會慶聖節道場青詞

月旅冬權時臨誕節上祇天命思茂介於純禧下愧

民情念曷當於善祝肅涓靖館鋪按沖儀陳芝茹之  
芳華啟雲篇之隱奧仰紆清御俯鑒丹衷錫親壽之  
洪長畀民生之康泰庶依景貺益固熙圖

滿散朱表

震夙標辰思道迎於景福潔蠲脩薦用凝歎於高真  
既成三洞之儀遂返九清之御傾瞻空極敷罄明誠  
建康府茅山崇禧觀啟建會慶聖節道場青

詞

純乾旅月天開震夙之符華渚標辰人頌壽昌之福  
靜循菲德茂對宏休按藥笈之真筌即洞天之勝地

敷陳淨供鋪究沖儀肅仙馭於璿霄望睟容於寶座  
虔祈丕佑永茂熙圖

滿散朱表

冬籥道寒適協既盈之月皇家紀慶環臨載誕之辰  
望形勢之名都想神仙之奧宅祇循祕式虔祓嘉壇  
誦三洞之靈篇範九霄之芳獻涓成勝事降集丕休  
益堅兢畏之心永迓厖鴻之福

天慶觀報恩光孝觀青詞

大道無私高出範圍之表至誠有感默通精禋之間  
此以驕陽浸成重膏嘗傾輸於丹悃庶順道於嘉祥

帝闕九闕飛章既達王畿千里沛澤遂周實祗荷於  
靈休敢肅修於報禮更期鑒佑永底平康

萬壽觀 太上皇帝丁亥本命道場青詞

虞侍慈顏備極四方之養欽崇元命昭延萬壽之期  
按慈笈之靈章陳玉京之芳供普紆清御徧扣高真  
冀竝介於親祺俾永修於子道

滿散朱表

親壽無疆高蹈殊庭之逸福基有始具遵祕錄之儀  
既訖事於嘉壇益傾誠於元造

萬壽觀 太上皇帝丁亥本命青詞

尊崇慈父世形孝治之風考按靈篇日次命元之紀  
式因穀旦祇即殊宮肅絳節之真旂宣琅函之妙典  
虔祈道芘垂佑親庭擁百祥順備之休享萬國安榮  
之養

滿散朱表

誠修子道已殫頌禱之辭教闡仙宮諒達高明之鑒  
既成熙事益厲丹衷

萬壽觀 太上皇帝丁亥本命道場青詞

天錫祺祥方樂大庭之養日環次舍適臨元命之辰  
祇即殊宮肅遵祕典陳霄晨之淨供詠雲笈之靈章

鋪薦誠忱款凝仙御丕集九清之貺永延萬壽之期  
滿散朱表

虔修子道虞奉親顏歸誠衆妙之門邀福列仙之館  
仰祈丕佑俯鑒丹衷

萬壽觀申撰開啟天申聖節道場青詞

慈極居尊方享安榮之養炎衡紀序適開震夙之辰  
祇即殊宮虔遵祕典陳玉京之芳供詠琅簡之空歌  
罄露誠衷敷聞聰鑒丕集九疇之福永增萬壽之期  
滿散朱表

迎祥祕宇方勝事之熙成介壽慈親已純誠之上達

更祈丕佑永輔昌圖

太乙宮 太上皇帝丁亥本命青詞

親壽綿長擁純休而方盛福基肇啟推定命以有先  
爰集羽流肅遵科式演靈章於瓊笈陳芳供於瑤壇  
仰冀鑒臨俯垂孚佑益介無疆之筭永扶不拔之基  
滿散朱表

輸誠以禱迎嘉應於親庭畢事而旋企睟容於天路  
更祈道蔭益庇民生

太乙宮開啟天申聖節道場青詞

欽承丕緒祇奉慈親彌月肇祥適契盛明之會殊宮

介福具遵虛靜之儀瓊章敷三洞之音玉節駐九霄  
之仗懇祈靈顧降集善祥益增萬壽之期永享四方  
之養

滿散朱表

高聽下臨純誠上達福祥川至已駢會於慈庭仗御  
雲行當邁歸於霄極更新祈靈顧益鑿丹衷

皇帝進奉 太上皇后生辰表詞

金行屆節澄灝氣於圓霄玉勝標辰啟嘉祥於慈闈  
敢殫善頌用達歡悰伏願玩意希微怡神淵靜尊榮  
儷極永觀漢殿之朝慈儉流風普洽周家之化臣躬



修至養欣際昌期爰持一瓣之香庸致萬年之祝

皇帝進奉 太上皇后生辰功德

母道尊崇式紀發祥之日仙宮虛靜具修介祉之儀  
伏願福海淵深壽山堅固上齊乾父超高原以無疆  
下開雲孫曼來仍而未老

太乙宮 太上皇后生辰青詞

孝奉慈闈方極尊榮之養涼生清管適符誕育之期  
祇祓仙宮肅遵道式發雲章於瓊笈下風御於璿霄  
仰冀鑒臨俯垂孚佑壽齊聖父八千歲以爲秋福蔭  
皇圖七百年而過歷

滿散朱表

祥開沙麓鍾母範於良辰教闡殊宮款颺存於清夜  
虔祈冲鑒丕錫順祺適臨竣事之期更露由衷之悃  
萬壽觀會慶節道場青詞

霜律肇寒適紀發祥之序星冠按式具修介福之儀  
陳美薦於嘉壇款真旂於煥座仰回淵鑒俯照丹衷  
上延親壽之綿長下芘民生之康阜更祈涼德永保  
熙圖

滿散朱表

殊官宏連已迎百順之祥雲路續紛行返九霄之御

益殫誠禱更俟鑒觀

崔舍人玉堂類藁第卷十二

崔舍人玉堂類藁卷第十三

口宣

曾懷除右丞相賜告口宣

卿才智俱優暫違宰位讒誣既釋盍返台階綸告往  
頒趣宜祇受

楊倓除靖海軍節度使賜告口宣

卿飛華禁路濟美勲門爰陞將鉞之崇式獎事功之  
盛往頒綸告宜即欽承

楊倓上表再辭免除靖海軍節度使簽書樞  
密院事不允仍斷來章批答口宣

卿久踐禁途夙優賢績茲晉登於樞筦仍宏建於齋旄溫詔趣承毋庸重請

曾覲上表再辭免除開府儀同三司不允仍斷來章批答口宣

卿蚤事初潛荐更要任誕頒恩命晉視台司宜即欽承毋庸重請

曹勛除開府儀同三司賜告口宣

卿歷更四朝躬秉一德茲錫昕廷之命俾參公府之儀實出朕衷往其祗服

撫問新除參知政事鄭聞到闕并賜銀合茶

藥口宣

卿進還舊位行底脩門方欽竚於嘉猶諒深多於勞  
役特推寵錫仍諭眷懷

金國賀會慶聖節使人到闕回程賜龍鳳茶  
并金鍍銀合口宣

卿等拭玉成儀祖車問道屬寒風之淒厲正行役之  
悠長爰錫珍芳用資和普

賜殿前司滿散會慶聖節道場乳香口宣

卿等密護宸巖欣逢誕節悉率三軍之士虔祈萬壽  
之符特錫名香用昭善意

賜樞密院官滿散會慶聖節道場乳香口宣  
卿參陪宥密展効忠勤逢甲觀之初辰脩寶坊之勝  
會爰頒薰馥式助精虔

樞密院官赴貢院齋筵賜酒果口宣

霜籥司辰電樞紀節肆啓鈞臺之會竝延武服之賢  
維實及醪寵頒其受

賜步軍司滿散會慶聖節道場乳香口宣

卿等典司禁旅拱護宸嚴適逢震夙之辰竝祝厖鴻  
之福推予嘉錫迪爾精衷

賜皇太子府滿散會慶聖節道場乳香口宣

卿端居儲位欣際誕辰具殫誠意之勤申祝壽祺之  
永錫茲異馥侑爾至虔

撫問皇子魏王愷到闕并賜金合茶藥口宣  
卿祇會誕辰暫違藩服適風霜之初厲諒道路之多  
勤加致匪頒就將勞問

金國賀會慶聖節使人回程平江府賜御筵  
口宣

卿等言旋使傳已屆吳門肆啟初筵用昭眷遇少休  
濡轡庶遂從容

赤岸賜御筵口宣



卿等言辭魏闕甫出都門當行色之云初悵使華之  
遂遠少留近館特啟芳筵

鎮江府賜御筵口宣

卿等驩成聘禮迴次江城載馳載驅諒多勞役既嘉  
既旨少示眷懷

盱眙軍賜御筵口宣

卿等修成無爽畢事言還即候館以載休遡淮流而  
將邁特頒燕衍少遂遲留

赤岸賜酒果口宣

卿等總轡登塗抗旌歸國自茲跋履良念賢勞厥有

旨芳是將眷遇

玉津園射弓賜酒果口宣

卿等遊于芳園樂此終日既協和容之度益觀命之能爰有匪頒庶資宴喜

朝辭訖歸驛賜御筵口宣

卿奉將慶幣祇會誕辰維其令儀沆此成禮旋即賓郵之適肆頒燕俎之豐

朝辭訖歸驛賜酒果口宣

卿等入辭宸陛歸憩賓郵念惟將事之勤行及騰裝之邁特推寵錫俾侑宴私

金國使人到闕玉津園賜御筵口宣

卿等朝儀既畢使事方休聊從禁苑之遊肆講射侯之樂特頒慈燕用洽嘉歡

玉津園射弓賜例物口宣

射侯既設樂節斯行各奏爾能罔愆于禮式示便蕃之寵用旌審固之容

賜宰執已下喜雪御筵口宣

嚴籥凝寒飛花應瑞已銷疫癘之氣仍兆豐登之期爰致匪頒庶均宴喜

皇太子魏王愷再辭免除改判明州不允批

答口宣

卿來朝宸陛改鎮价藩匪出私恩是崇國體已加申諭宜即祇承

撫問奉使金國報聘使副張子顏等到闕并賜銀合茶藥口宣

卿等言遄使傳已屆都門屬時序之方寒諒道塗之多勩特推賜式庸示眷懷

金國賀正旦使人赴闕盱眙軍傳宣撫問并賜御筵口宣

卿等遠馳使傳祇會春朝已甫達於封疆爰特頒於

燕豆仍加勞問庸示眷懷

平江府賜御筵口宣

卿等銜命修盟馳車在道方少休於近輔宜就錫於  
初筵用慰勤勞庶昭眷遇

鎮江府賜銀合茶藥口宣

卿等奉將慶問行次近州眷言跋履之勞盍有綏調  
之助靈芽良劑爲賜宜承

鎮江府賜御筵口宣

卿等肅持慶禮申講歡盟方區薄於中塗適憩寧於  
外館就頒燕席聊拂征塵

赤岸賜御筵口宣

卿等竝馳華轡甫屆近郊念行役之多勤屬賓郵之少適特頒慈燕庸示眷懷

赤岸賜酒果口宣

卿等張旌長道解轡近郵諒惟跋履之勞爰有旨嘉之賜庶資燕喜宜體眷懷

葉衡上表再辭免除右丞相不允批答口宣

卿懿德邁倫通材周變比疇宿望晉陟台司已協僉俞趣宜祇服

葉衡上表再辭免除右丞相不允仍斷來章

批答口宣

卿才周物表識洞幾先茲晉陟於台司將盡施於賢  
緼趣宜祇拜母復多陳

李彥穎上表再辭免除端明殿學士簽書樞  
密院事恩命不允仍斷來章批答口宣

卿秉義醇正受材高明茲稽協於僉俞俾晉陪於宥  
畫即宜祇拜母復多陳

葉衡轉官加恩賜告口宣

登進成書優崇懿績渙此大廷之命賚于端揆之臣  
尚體眷懷即宜祇服

金國賀正旦使人到闕賜被褥鈔鑼等口宣  
卿等奉將慶儀寧處賓館宜有衾裯之適亦資器用  
之良竝致分頒式昭眷遇

十二月三十日賜內中酒果口宣

時令將新歲華茲暮諒旅懷之多感宜眷意之加隆  
維實及醪賜從內府

正月一日入賀畢歸驛賜御筵口宣

卿等祇修慶問甫畢朝儀既具閱於恭勤爰優加於  
禮遇專馳近侍即啟芳筵

正月一日入賀畢歸驛賜酒果口宣



卿等入慶會朝退安次舍爰致芳甘之實仍分嘉旨  
之醪竝洽殊私庶資良集

正月三日賜內中酒果口宣

四序更端三朝紀節爰念使郵之適宜推賜式之豐  
嘉實芳醪往宜祇受

皇太子滿散會慶聖節道場乳香口宣

卿位處儲宮時逢誕節申祝壽祺之永具殫誠意之  
勤爰錫名香用資善禱

賜三省官滿散會慶聖節道場乳香口宣

卿等欣逢誕節祇率采僚集梵宇之勝緣介宸居之

備福異香是錫眷意宜承

賜樞密院滿散會慶聖節道場乳香口宣  
卿等職重本兵誠深報上因誕辰而協慶即梵苑以  
祈休爰錫名香用孚至意

賜殿前司滿散會慶聖節道場乳香口宣  
卿等董戎禁旅協慶誕辰悉輸頌禱之誠虔介壽昌  
之福推予嘉錫侑爾精衷

賜馬軍司滿散會慶聖節道場乳香口宣  
卿等義存歸美志篤輸忠因誕節之戒辰即寶坊而  
獻福香維達意賜以昭誠

賜步軍司滿散會慶聖節道場乳香口宣  
卿等典司驍衛拱護嚴宸欣逢震夙之辰同祝厖鴻  
之筭宜加頒賚用助精虔

金國賀會慶聖節使人到闕賜被褥鈔鑼等  
口宣

卿等奉將使命協慶誕辰興懷區洎之初圖便燕私  
之適爰推頒賚宜即欽承

回程賜使副冬至節綰口宣

卿等奉書修慶訖事言還適陽律之方萌諒征途之  
正凜善縑往錫至意宜承

賜三節人從冬至節絹口宣

汝等竝將使事適履天正風霜多寒道路良苦爰資  
安煖之用式慰逶遲之勤

赤岸賜御筵口宣

卿等祇成慶禮端即歸途宜少駐於近郊俾就陳於  
祖帳用昭眷遇亦慰勤勞

使人到闕在驛賜生餼口宣

卿等偃息驂駢憩寧館舍特戒使璫之遣往頒禮餼  
之豐維厚寵私即宜欽承

玉津園射弓賜御筵口宣

卿等使華多暇禁苑言遊聞弓矢之斯調諒威儀之  
有則宜加燕勞用表眷懷

賜三省官滿散天申聖節道場乳香口宣  
炎籥告中璿樞紀瑞悉率官僚之衆竝祈聖壽之延  
亮乃勤誠往茲嘉錫

賜三省官齋筵酒果口宣

時臨誕聖禮厚肆筵當暑氣之方清諒歡心之正洽  
嘉肴旨酒併以示慈

賜步軍司滿散天申聖節道場乳香口宣

卿典司禁旅際會誕辰率軍士之歡情祝聖神之壽

祉爰加頒賚庶助精虔

賜馬軍司滿散天申聖節道場乳香口宣

薰琴御令祥渚標辰慶符千載之期歡動三軍之衆  
爰頒寶馥俾達誠忱

賜殿前司滿散天申聖節道場乳香口宣

密護周廬欣逢誕節悉率三軍之衆虔祈萬壽之休  
爰錫名香俾通誠意

明堂大禮禮畢宣勞將士口宣

卿等肅共武服典護嚴宸逮茲祀事之成多爾戎昭  
之助竝加眷撫式慰忠勤

右丞相趙雄上表再辭免勅令所修進一州  
一路酬賞轉一官加恩恩命不允批答口宣  
卿總率衆職辨章萬微茲疇定令之勤乃下進階之  
命是惟故典豈必牢辭

參知政事錢良臣上表再辭免勅令所修進  
一州一路酬賞轉一官加恩恩命不允批答  
口宣

章程明備憲令端平既通變以可行乃議勞而自近  
已頒成命難徇謙懷

趙雄特授宣奉大夫依前右丞相魯郡開國

公加食邑賜告口宣

嚴修賞式丕勸外邦時予鈞軸之臣就此簡編之績  
茲頒茂典宜服明恩

趙雄上表再辭免祕書省進呈會要了畢提  
舉官特轉兩官依例加恩恩命不允批答口  
宣

卿賢福被民儒猷經國茲渙絲綸之寵庶酬翰墨之  
功典實有初命維無返

錢良臣上表再辭免祕書省進呈會要了畢  
禮儀使特轉兩官加恩恩命不允口宣



汗簡告成涓辰登進茂對亨嘉之會畢陳祿盛之容  
既藉總提可無褒賞

王淮再上表辭免提舉經修會要特轉一官  
恩命不允斷章批答口宣

登進成書推加茂典一進階而示寵三抗奏以陳辭  
成命即行多言無益

史浩上表辭免已進會要經修不經進轉官  
令回授恩命不允批答口宣

書成英館賞逮元臣既從酌損之規猶守勞謙之美  
是爲已過奚復可從

撫問金國賀會慶聖節使人赴闕盱眙軍賜  
御筵口宣

卿等遠持慶禮祇會誕辰念甫越於邊疆俾就頒於  
燕席式昭眷遇庸慰勤勞

赤岸賜酒果口宣

卿等祇飭使車遠將邦禮望都門而伊邇即郊館以  
少留爰致恩頒庶資燕會

賜史浩告口宣

宗祀合宮熙成慶事茲推頒於惠澤首商賚於耆臣  
宜服口章益綏壽福

賜曾覲告口宣

歲事闋筵布釐庶位乃眷耆明之彥宜優慶賚之章  
茲錫恩綸是均餽福

賜鄭藻告口宣

事畢崇堂恩覃列位茲輯神釐之澤遂優戚畹之賢  
宜服寵榮益綏壽豈

賜皇太子滿散會慶聖節道場乳香口宣

卿位正儲宮時當誕序益厚君親之愛悉裒仙梵之  
因爰錫名香用孚至意

賜三省官滿散會慶聖節道場乳香口宣

卿等欣逢誕節悉率采僚効嵩嶽以輸誠即梵宮而  
營福爰頒異馥庶助精虔

賜樞密院官滿散會慶聖節道場乳香口宣  
卿等經武地嚴愛君志厚因祥樞之紀序即佛宇以  
輸誠宜錫名芬俾資善禱

賜殿前司滿散會慶聖節道場乳香口宣  
卿等宣勞武服典護巖除欣逢載誕之辰虔祝無疆  
之壽爰頒異馥庶達精誠

賜馬軍司滿散會慶聖節道場乳香口宣  
□□□□精騎拱護嚴宸逢誕節以輸誠即寶坊而

介福爰頒香炷庶助齋衷

賜步軍司滿散會慶節道場乳香口宣  
卿等總提勁旅嚴衛明庭畢殫愛上之誠咸祝後天  
之福宜推嘉錫俾侑精虔

崔舍人玉堂類藁卷第十三

崔舍人玉堂類藁卷第十四

口宣

金國賀會慶節使人到闕玉津園射弓賜酒  
果口宣

卿等適此暇日遊于芳園方觀審固之能爰致吉嘉  
之賜維茲將意庶以侑歡

朝辭訖歸驛賜酒果口宣

卿等進辭殿陛歸憩賓郵爰分嘉實之多仍致上尊  
之美竝昭恩遇各體眷懷

朝辭訖歸驛賜御筵口宣

卿等趨庭告去偃節少留當曲盡於從容俾就陳於  
宴衍眷懷茲厚禮意宜承

回程赤岸賜酒果口宣

卿等協講歡盟言成慶禮指歸途而將邁即近館以  
少留頒以甘新昭予眷遇

十月二十二日玉津園射弓賜御筵口宣

卿等射藝絕倫賓容協度特啟初筵之錫俾留終日  
之歡式示眷私用優禮遇

十月二十二日賜內中酒果口宣

卿等遠持慶問祇及都郵錫茲多旨之醪薦以甘芳

之實並由內府式表殊恩

賜宰執已下喜雪御筵口宣

時及元冬雪呈上瑞已兆有年之慶尤深同樂之懷爰即公堂俾陳高會

右丞相史浩上表再辭免玉牒所進書回授轉官依例加恩恩命不允仍斷來章批答口宣

書昭先烈恩逮台臣既酌損以適宜亦勞謙而具至即宜祇受毋復多陳

金國賀正旦使人赴闕盱眙軍傳宣撫問賜



御筵口宣

卿等協講歡盟遠持慶禮已飛軒而及境將濡轡以  
遵塗式厚撫存仍頒燕喜

平江府賜御筵口宣

卿等飛華使傳修慶春正知已屆於吳門宜即頒於  
燕席用昭眷遇式慰勤勞

鎮江府賜御筵口宣

卿等夙戒使駢遠將慶幣知絕江而既濟因授館以  
少留式厚眷私就頒燕衍

鎮江府賜銀合茶藥口宣

卿等遠馳使傳近次江城念跋履之勤勞宜沖和之  
輔養特推嘉錫用表殊私

賜接伴使副春幡春勝口宣

春華潛動物態交熙眷言要近之臣適有驅馳之役  
爰推賜式俾道時休

賜金國賀正旦使副春幡春勝口宣

三陽肇始萬寶向榮眷懷使事之勤適閱年華之美  
竝推繁錫俾對良辰

賜三節人從春幡春勝口宣

寒氣凋謝春陽發生旋觀物意之淳深念征塗之勤

竝膺頒賚同洽歡康

趙雄特授右丞相賜告口宣

卿稟方大之資迪忠純之度茲登相位實協民情宜服思書即恢賢業

王淮特授樞密使賜告口宣

卿受材高明蹈道中正久秉司於樞筦茲進陟於使權宜服明綸汜終顯績

史浩再上表辭免除少傅恩命不允仍斷來章批答口宣

朕優崇耆臣肇錫異禮既誕頒於成命已允愜於羣

心謙避之章止茲母至

趙雄上表再辭免右丞相不允批答口宣

朕渙發邦號延登相臣台路有暉輿情胥喜宜略謙  
恭之守即恢宏遠之圖

王淮上表再辭免樞密使不允批答口宣

朕考協民言登庸樞輔已頒顯命方佇嘉猶尚陳引  
避之辭殊弗倚成之望

金國賀正旦使人赴闕赤岸賜御筵口宣

卿等竝將使命協慶春元知已屆於近郊方少留於  
□館即頒惠燕用表眷懷

赤岸賜酒果口宣

卿等使傳載馳都門密通錫以上尊之美副之嘉實之多庸慰勤勞少資燕適

士歆特授保康軍節度使賜告口宣

卿謙恭飭已孝友承家已頒渙號之恩遂授齋壇之節宜孚眷意即服寵章

士歆上表再辭免保康軍節度使不允批答

口宣

卿蔚爲宗英休有德問茲頒英節具協彝章宜收謙挹之辭即服顯崇之寵

金國使人回程賜龍茶鳳茶并金鍍銀合口  
宣

卿等竝馳使節祗及都郵爰頒貢茗之英用輔沖襟  
之適是爲嘉賚宜體深懷

平江府賜御筵口宣

卿等持禮告成迴轅遄邁念當經於吳會俾即啟於  
賓筵庶洽歡娛式昭眷遇

盱眙軍賜御筵口宣

卿等竝馳使傳已指歸塗念將濟於淮流知少留於  
賓驛即頒燕衍庶盡從容

赤岸賜酒果口宣

卿等祇協歡盟言成慶禮方出留於近館將前進於  
遐塗宜有分頒庶資燕喜

金國使人到闕玉津園射弓賜射弓酒果口  
宣

卿等使事少間苑游胥樂知有循聲之藝諒多中節  
之儀式厚寵頒庶資燕適

十二月二十八日賜生餼口宣

卿等竝揚使節已次都郵念方釋於賢勞宜少安於  
頤養特頒禮餼用表眷懷

十二月三十日賜內中酒果口宣

卿等即于館寓及此歲除爰將眷予之誠特致芳醇之品凡茲嘉錫出自內庭

正月一日入賀畢歸驛賜御筵口宣

卿等入覲闕廷歸休館舍閱威儀之有度想陟降之良勞式示眷懷即頒燕衍

密賜大銀器口宣

卿等協慶春元肅將聘禮昭以寵光之厚錫茲器用之華是出隆私即宜欽受

正月一日入賀畢歸驛賜酒果口宣



卿等將命修歡造朝成禮方端歸於賓驛式興念於  
賢勞茲有分頒庶資燕喜

賜被褥鈔鑼等口宣

卿等奉將慶禮協講歡盟式圖賓館之安竝致燕居  
之用宜承厚錫咸體隆懷

正月三日賜內中酒果口宣

春華浮動使事遲留錫之和旨之醪侑以芳滋之實  
竝由內禁式表殊懷

正月四日玉津園射弓賜射弓御筵口宣

春陽融豫禁苑靖深方觀射藝之長庸洽賓歡之適

即頒燕設宜遂款留

正月四日玉津園射弓賜射弓弓箭例物口

宣

卿等聯馳使騎並集禁園具施命中之奇式協和容  
之度特申頒賚宜體眷懷

賜賀金國正旦使宇文价副使趙鼎到闕傳  
宣撫問并賜銀合茶藥口宣

卿等往將使命還及都門維跋履之良勤宜眷懷之  
加厚特推頒賚仍致撫存

王淮上表再辭免曾預修纂隆興以後日歷

奏成篇秩特轉行一官依例加恩恩命不允  
批答口宣

卿任專宥密謀罄中心嘉茲疇翰墨之勲爰煥絲綸之  
命是循彝典宜畧撫章

趙雄上表再辭免曾預監修纂隆興以後日  
歷奏成篇秩轉行一官依例加恩恩命不允  
批答口宣

朕比蒐儒彥俾纂信書深嘉載筆之勞亟下疇庸之  
賞茲維故典豈必牢辭

錢良臣上表再辭免修纂隆興以後日歷奏

成篇秩特轉行兩官依例加恩恩命不允仍  
斷來章批答口宣

書成三館章徹九重方疇汗簡之勞可後提綱之輔  
已頒渙命難徇謙懷

趙雄再上表辭免日歷奏成篇秩特轉行一  
官不允仍斷來章批答口宣

剡奏上聞信書告備事蓋干於國典賞首暨於輔臣  
茲協彝章豈須過遜

王淮再上表辭免日歷奏成篇秩特轉行一  
官不允仍斷來章批答口宣

卿疊上封章懇辭褒典已具形於申諭猶固執於謙  
懷命已惟行誼無可返

撫問賀金國生辰使錢沖之等到闕并賜銀  
合茶藥口宣

卿等奉書修好遘命及門興懷周道之勤加致口溫  
之諭仍將賜式併示眷誠

趙雄轉官告口宣

信書告備懋典時行茲攷協於邦常益尊崇於宰路  
宜祇成命沆究宏圖

王淮轉官告口宣

書成東觀勲策西樞躋登一秩之崇褒表三長之善  
茲頒寵命宜體眷懷

賜皇太子滿散天申聖節道場乳香口宣  
位居儲極恩重慈庭欣臨載夙之辰倍祝無疆之筭  
爰頒異馥庶侑精虔

樞密院官滿散天申聖節道場乳香口宣  
卿等任隆宥府時慶誕辰能祇率於案僚悉虔祈於  
壽祉特頒名馥庶助精誠

樞密院官齋筵酒果口宣

節紀誕彌誠輸歡頌已肅陳於高會俾茂對於良辰

馳賜旨芳款留燕樂

史浩加恩賜告口宣

朕燔柴歲事徹俎均禧肆頒寵數之隆爰及弼諧之舊益宣賢業用答眷私

鄭藻加恩賜告口宣

陽陔之祀甫訖上儀戚畹之英首均嘉況往頒恩綍宜卽欽承

蒲察久安加恩賜告口宣

上儀丕闡慶澤旁流維予忠盡之臣厥有褒嘉之典欽承明命益展壯圖

姚憲上表再辭免除參知政事不允仍斷來  
章批答口宣

卿敏猷經國碩德端朝進翊化元具符民望斷章催  
拜宜即欽承

葉衡上表再辭免除端明殿學士簽書樞密  
院事不允仍斷來章批答口宣

卿高明之資正大之學蔽自朕志登于幾廷僉言其  
孚母復有請

賜皇太子府滿散天申聖節道場乳香口宣  
卿位正儲宮慶承慈極式協誕彌之旦尤深善頌之



情爰錫異香用孚至意

賜步軍司滿散天申聖節道場乳香口宣

序當炎籙慶紀慈闈維時武服之良深祝天休之永式資善禱爰錫名香

賜樞密院官滿散天申聖節道場乳香口宣

卿謀參宥畫慶協休辰祇憑仙梵之因仰贊壽昌之福香維達意賜以助誠

樞密院官赴齋筵賜酒果口宣

慶集親闈祥開誕節爰啓惠慈之燕首均宥密之賢維實及醪往其祇受

王友直上表再辭免除奉國軍節度使不允  
仍斷來章批答口宣

卿沈毅不回剛方自立久典殿巖之衛肆開閫制之  
嚴成命已孚遜辭其止

葉衡上表再辭免除參知政事不允仍斷來  
章批答口宣

卿德望素隆材能兼劭茲擢陪於國論庶具展於壯  
猶成命已孚遜辭毋至

金國使人赴闕盱眙軍賜御筵口宣

卿肅馳輶傳已次封疆永言跋履之勞爰啟惠慈之

燕用昭眷禮宜體誠懷

鎮江府賜茶藥口宣

卿等建旌修聘濡轡遵塗爰嘉行邁之勤宜有匪頒之禮特推珍賜用表眷懷

鎮江府賜御筵口宣

卿等夙將聘節竝駕征塗當春物之繁華念使駢之勞勩往頒燕衍式示恩私

赤岸賜御筵口宣

卿夙馳華轡甫次近郊方弭節以少休爰肆筵而式衍宜承厚遇用洽隆私

崔舍人玉堂類稿卷第十四

四十一

十一



崔舍人玉堂類藁卷第十五

口宣

金國賀會慶聖節使人回程盱眙軍賜御筵

口宣

卿等來修聘禮回次淮津念將越於邊疆俾少休於  
候館特馳使騎就啟賓筵

遇冬至節賜使副節絹口宣

風威載肅水澤將堅深懷使介之勤重涉川塗之遠  
爰推厚錫庶表隆私

賜三節人從冬至節絹口宣

汝等使事言旋歸塗尚邈適履隆寒之序□□卒歲  
之求爰有分頒俾同安吉

鎮江府賜御筵口宣

卿等整駕歸程經塗會府將濟江而于邁俾就館以  
少留馳諭至懷即陳高會

使人到闕十月二十七日賜內中酒果口宣  
留連使節燕息賓郵爰頒多旨之醪仍侑甘新之實  
是將厚意竝出內庭

玉津園射弓賜酒果口宣

冬陽和豫禁苑闕深方觀審固之能爰錫甘芳之品

庶資宴樂宜遂從容

回程赤岸賜御筵口宣

卿等聘儀成禮歸馭首塗方出次於近郊俾就陳於  
高會是昭眷遇庸慰勤勞

玉津園射弓賜弓箭例物口宣

卿等使事少間賓儀載舉知和容之有度諒命中之  
無虛爰致分頒宜留衍樂

上壽畢歸驛賜御筵口宣

卿等入筵壽班退休賓驛觀修容而可度知率禮以  
無違式厚眷懷卽頒燕衍



十月二十一日賜內中酒果口宣

使介之勤遄休外館酒肴之錫分出內庭庶表眷私  
是昭寵異

朝辭訖歸驛賜酒果口宣

卿等已畢邦儀遂辭殿陛方歸休於賓舍當漸理於  
歸裝爰示燕慈用昭眷禮

在驛賜牲餼口宣

卿等竝展使華夙將慶問遄卽賓郵之適就頒禮餼  
之豐是出眷懷宜資燕喜

賜宰執已下喜雪御筵口宣

氣入祁寒雪呈瑞應驗玉燭之無爽慶金穰之有期  
爰厚惠慈宜同燕樂

金國賀會慶節使人到闕賜被褥鈔鑼等口

宣

卿等遠馳使傳入憩賓郵旣休跋履之勤宜便寢興  
之用爰加寵錫庶示恩懷

賜射弓例物口宣

卿等聘儀成禮使事多勞宜從禁苑之遊用洽賓歡  
之適爰推寵賚式示眷懷

十月二十七日賜內中酒果口宣

使介聯華方休外館甘芳推錫咸出內庭爰諭□懷  
庶章優遇

密賜大銀器口宣

卿等祇達慶書肅成聘禮出眷懷之優渥錫器用之  
光華仍諭溫言庶昭殊遇

朝辭訖歸驛賜酒果口宣

卿等聘禮有成使儀云復已展辭於殿陛方歸息於  
都郵爰致甘芳庶資宴樂

回程鎮江府賜御筵口宣

冬律向寒使車遄邁諒經途於會府當弭節於賓郵

爰示恩懷即頒燕禮

在驛賜生餼口宣

使華持禮邦好成儀重懷次舍之須特厚餼牽之品  
宜承恩錫尚體誠懷

賜射弓酒果口宣

良弓勁矢維以觀能嘉實芳醪庶其將意宜服惠慈  
之寵益施密固之長

賜步軍司滿散會慶聖節道場乳香口宣

卿職司禁旅時際誕辰即梵宇以輸誠率歡心而介  
壽爰加頒錫用助精虔

賜馬軍司滿散道場乳香口宣

卿典司驍騎拱衛嚴宸欣達聖辰之期虔祝無疆之  
壽專馳近侍俾錫名香

金國賀正旦使人赴闕鎮江府賜御筵口宣  
卿等遠將慶禮祇會元正適取道於江城聊弭旌於  
賓館專馳近侍即啟華筵

鎮江府賜茶藥口宣

卿等來會元春行經近府頒以靈芽之貴副之珍劑  
之良用慰勤勞式昭眷遇

回程平江府賜御筵口宣

使節言旋歸途尚邈念當經於近府俾就啓於初筵  
式示恩光宜流燕樂

玉津園射弓賜酒果口宣

卿等使事有間禁園胥樂錫以上尊之旨侑之嘉實  
之芳庶洽歡虞宜承眷遇

十二月三十日賜內中酒果口宣

卿等使華偃息賓館從容適當歲律之除爰示恩光  
之異凡茲多品出自內庭

回程賜龍鳳茶并金鍍銀合口宣

建溪方貢內府珍藏爰嘉使傳之華聊備歸裝之用

式將眷遇尚體誠懷

朝辭訖歸驛賜御筵口宣

卿等竝飭使儀肅成邦禮既入辭於殿陛方出憩於  
賓郵就啓華筵式昭厚遇

回程赤岸賜酒果口宣

卿等馳軺成禮濡轡遵途知漸遠於都門聊少留於  
郊館式加頒賚用示眷私

盱眙軍賜御筵口宣

卿等言旋使傳已屆邊疆重懷跋履之勞爰示惠慈  
之眷宜留衍樂庶遂從容

上壽畢歸驛賜酒果口宣

卿等肅將使命祇會春朝既進畢於壽儀方退休於  
賓驛爰推賜品用表眷懷

回程赤岸賜御筵口宣

卿等聘禮有成使輶云復方弭裝於近館爰示惠於  
初筵尚體恩私宜留燕樂

賜金國使副春幡勝等口宣

氣轉洪鈞祥開蒼陸深念歲華之變適當使節之留  
爰舉時儀俾綏壽福

賜送伴使副春幡勝等口宣



三陽布澤萬彙回春興言文武之臣適有驅馳之役  
竝推賜式庸示恩懷

賜金國三節人從春幡勝口宣

冬律載更春華方動爰均頒於節物庶昭示於恩光  
宜體眷存各忘勞役

趙雄辭免轉官不允批答口宣

卿總率諸儒刪裁大典閱簡編之告備仰謨烈之增  
光已錫茂恩豈容固遜

錢良臣辭免轉官不允斷來章批答口宣

書成良史禮講上儀重嘉使領之勞爰厚恩榮之典

宜收沖節即服優章

周必大辭免轉官不允斷章批答口宣

書成史策賞逮儒勞已孚成命之行尚閱沖章之至  
宜祇眷遇即服恩光

樞密使王淮辭免轉官不允批答口宣

史書來上賞典時行肆疇論譔之勞爰厚褒榮之禮  
即宜祇服毋重謙陳

賜王淮再上表辭免轉官不允斷章批答口

宣

賞典旣行民言維允方趣頒於明制奚確避於□□

宜服寵光尚圖報禮

賜王淮告口宣

啓封全國進位崇階雖優答於勤勞實顯加於體貌  
當祇隆遇即服榮章

撫問賀金國正旦使副葉宏等到闕并傳宣  
賜銀合茶藥口宣

卿等將聘出疆振衣還闕深念馳驅之遠爰加撫勞  
之溫仍有恩頒併昭眷遇

撫問新知建康府范成大到闕并賜銀合茶  
藥口宣

卿廟堂宿望藩輔殊庸當趨行闕之朝遂即留都之  
鎮專馳近侍俾諭深懷

賜進士聞喜宴口宣

傳臚殿陛合射宸庭既具洽於龍光宜胥同於燕樂  
尚承恩遇各勉忠圖

史浩辭免轉官不允批答口宣

篇徹經筵恩施儒彥方隆耆德之遇宜厚寵章之加  
固出至懷奚勞重請

賜史浩除少師告口宣

卿歷殫誠請願即里居既勉徇於高情宜優加於茂

典祇承恩命益介壽祺

史浩辭免特授少師不允批答口宣

朕優崇元老寵賁歸途旣聳暢於高風益允符於輿論尚堅素守殊拂深懷

史浩斷來章批答口宣

卿潛藩舊德合路耆臣旣莫遂於眷留爰有加於恩遇已孚明命宜略謙章

賜趙雄告口宣

卿屢貢需章確辭丕務已勉從於雅志仍優畀於便蕃宜服茂恩更昭顯績

賜王淮告口宣

朕參稽公論登用真儒已誕告於廷紳方聳觀於賢業宜承休命益邁遠猶

金國賀會慶節使人回程盱眙軍賜御筵口宣

卿等竝持使節胥會誕辰方回次於邊疆爰即放於宴席宜承眷遇各慰賢勞

平江府賜御筵口宣

卿等抗旌成禮回轡遵塗念多跋履之勤宜厚惠慈之寵專馳近侍深諭至懷

鎮江府賜御筵口宣

卿等修禮告成受書遄邁適弭旌於近府行整棹於  
長江爰錫初筵是昭優遇

赤岸賜御筵口宣

卿等竝驅周道甫出脩門念行涉於長途宜優加於  
榮遇即頒宴席宜體眷懷

赤岸賜酒果口宣

卿等濡轡登途弭旌就館方少休於徒御爰併錫於  
旨芳庶洽燕私各忘疲勤

朝辭訖歸驛賜御筵口宣

卿等使事已成禮儀無爽旣展辭於殿陛方歸總於都郵爰厚惠慈俾同燕樂

朝辭訖歸驛賜酒果口宣

卿等受書以退竣事而旋諒多陟降之勞爰厚上旨嘉之品宜祇寵錫各體眷懷

玉津園射弓賜弓箭例物口宣

卿等使事有間射儀克講爰厚旌能之寵仍加適用之良宜體眷私尚留款樂

賜被褥鈔鑼口宣

卿等奉將使信修講慶儀適休跋履之勞宜便寢興



之用諒承賜品當識眷懷

密賜大銀器口宣

卿等使範聿修邦盟胥洽爰輟中金之器俾將密賚  
之誠實出深懷固爲優遇

回程賜龍鳳茶口宣

卿等使事勤勞歸途脩遠爰有建溪之品實推御府  
之竒特俾分頒卽宜祇受

賜三節人從冬至節緝口宣

一陽潛復萬彙交通興言行役之長當動歲華之感  
特均頒賚竝慰勤勞

賜使副冬至節綰口宣

節紀陽正氣回地管適履風霜之變諒懷衣褐之求  
爰選善縑俾將至意

賜步軍司滿散會慶節道場乳香口宣

卿等職專師旅義重君親適當載夙之辰共祝無疆  
之福特加錫予用助精虔

撫問金國賀正旦使人赴闕盱眙軍賜御筵  
口宣

卿等竝馳使傳已越封疆爰敷溫厚之辭仍錫惠慈  
之燕宜祇眷意各釋賢勞

平江府賜御筵口宣

卿等來慶新正行經近府爰念使華之遠重懷征役  
之長式厚眷慈俾紓勤勩

鎮江府賜銀合茶藥口宣

卿等持禮正朝經途會府爰錫靈芽之貴仍頒上劑  
之良用輔至和庶昭殊遇

鎮江府賜御筵口宣

卿等已濟江流稍休賓館爰專馳於近侍俾就啓於  
初筵庶表眷懷用紓行役

赤岸賜御筵口宣

卿等載驅使傳密近行都宜少駐於賓郵俾即頒於  
燕席各承眷禮咸釋賢勞

赤岸賜酒果口宣

屬聞使節行次郊圻卽候館以少留瞻行都而甫邁  
宜加恩賚式表眷懷

入賀畢歸驛賜御筵口宣

卿等入趨文陛修慶華正方歸憩於都郵俾卽頒於  
燕具庸昭眷遇式慰勤勞

玉津園射弓賜例物口宣

使華暇日禁苑勝遊方觀中的之長宜有旌能之具

三才集卷十五  
特加頒賚式示寵嘉

玉津園賜射弓酒果口宣

卿等竝驅濡轡同樂芳園屬施弓矢之能爰往豆觴  
之品宜祇眷遇庶洽歡虞

玉津園賜御筵口宣

張弓挾矢旣展令儀鼓瑟吹笙宜陳高會庶留燕樂  
各遂從容

賜居廣批答口宣

褒崇宗老敷錫恩章已具協於公言奚尚堅於謙守  
茲加申諭宜卽祇承

賜士鞞再上表辭免不允仍斷來章批答口  
宣  
敦叙宗盟優崇族老爰餽釐而布惠乃亶號以揚廷  
衆聽已孚謙辭何益

賜居廣再上表辭免不允仍斷來章批答口  
宣

席慶皇家蜚華天路茲衍博臨之況乃優褒叙之恩  
命已維行理無可避

撫問金國賀正旦使人赴闕盱眙軍賜御筵  
口宣

遠將邦禮甫越邊疆諒備罄於勤勞爰優加於慰撫  
仍開惠燕併示眷懷

鎮江府賜御筵口宣

揚舲江道弭節賓郵良多跋涉之勞式厚惠慈之禮  
聊紓行役庶表恩私

士輻特授少師加食邑賜告口宣

朕齋精飭躬廣大建祀旣沛熙成之澤宜優惇叙之  
恩茂錫寵光益昭眷禮

居廣特授少傅加食邑賜告口宣

朕肇稱新禮宗祀明堂有衍欽柴之休無踰常棣之

愛茲頒顯命是出殊私

士輟上表再辭免除少師恩命不允批答口

宣

修祠世室徹胙堂筵爰加厚於親盟乃優推於邦典  
茲惟至意奚可固辭

明堂大禮畢紫宸殿受賀內侍宣答管軍詞  
祇率彝章肇修嘉饗資爾中權之彥聲茲周衛之勞  
神心顧懷福貺昭答

紫宸殿受賀閣門官宣答樞密詞

稽古彌文觀時亨會咸來四海之助迄就九筵之儀



實賴交修敢居能饗

紫宸殿受賀樞密宣答皇太子詞

祇荷洪休肅嚴大報既告虔於清廟遂展祀於合宮  
四方具來諸福畢至

麗正門肆赦閣門官宣答皇太子詞

躬祠世室還御端門沛恩宥於中天廣福祥於下國

崔舍人玉堂類藁卷第十五

崔舍人玉堂類藁卷第十六

口宣 勅書附

金國賀正旦使人赴闕鎮江府賜茶藥口宣  
使傳飛華江城經道興念川途之勤卽頒茗劑之良  
庸表眷私庶資和嗇

赤岸賜御筵口宣

將命修歡聯車遵道方少留於郊館當卽入於都門  
式厚眷懷就陳燕會

回程賜龍鳳茶并金鍍銀合口宣

涓辰遵道留館治行因頒異茗之良庶備歸裝之用

是爲嘉錫宜體深懷

使人到闕賜被褥鈔鑼等口宣

遠持使命初抵都郵豈無應用之須爰有分頒之寵  
宜承優賚式體隆懷

入賀畢歸驛賜酒果口宣

進朝宸陛退息賓郵第嘉實以分甘出上尊而致賜  
庶資燕喜用慰勤勞

入賀畢歸驛賜御筵口宣

遠將慶禮同預壽班旣訖事於殿庭方歸休於館舍  
爰開惠燕庶洽恩私

玉津園賜射弓弓箭例物口宣

使華來聘暇日出遊聞射藝之有儀知賓歡之正洽爰加頒賚庶表眷懷

玉津園射弓賜御筵口宣

春陽方動使事少閒適彼禁園游於射藝爰啓惠慈之宴庶昭審固之能

朝辭訖歸驛賜御筵口宣

已畢邦儀遂辭宸陛嘉進趨之有度念陟降之良勞爰卽都郵俾陳燕會

金國使副賜春幡勝等口宣

寒回□陸春入東郊適尚駐於使旃俾卽頒於時物  
宜承嘉錫茂介繁祺

賜館伴使副春幡勝等口宣

氣旋蒼陸仗轉青旗適更時序之新重起賢勞之念  
爰推寵錫俾對熙辰

賜三節人從春幡勝口宣

和風入律青令乘規尚勤使事之留適閱物華之變  
竝推嘉錫庸慰遠懷

密賜大銀器口宣

使節聯華聘儀成禮分此中金之器出於內府之藏

式厚恩頒庸昭眷遇

撫問賀金國正旦使副陳峴等到闕并賜銀  
合茶藥口宣

聯轡出疆弭旃還闕載念川塗之勤式頒茗劑之良  
仍諭溫言庶昭至意

御藥院申乞撰進呈

三祖下第六世仙源類譜

仁宗皇帝十年玉牒所有合用提舉官禮儀  
使已下宣答詞

慶系蕃昌聖謨宏遠爰輯成於大典茲竝告於成書

既遂覽觀卽嚴尊閣

進呈

仁宗皇帝十年玉牒

哲宗皇帝一朝玉牒宣答提舉官禮儀使已

下詞

書備兩朝事光萬世寫之琬炎煥乎文章旣具閱於  
奏篇當永嚴於尊閣

賜趙丞相不允批答口宣

寶牒告成皇猷增煥式厚褒嘉之典庸旌綜理之勤  
宜服溫言卽承休命

賜參知政事錢良臣不允斷來章批答口宣  
書成寶牒事謹珍藏興言使範之勞加厚褒章之寵  
已字成命宜止謙辭

賜右丞相趙雄不允仍斷來章批答口宣

典策告成臣民均慶乃春提綱之績可稽詔賞之恩  
開諭已明謙辭毋至

賜賀金國生辰使副傅淇王公弼到闕撫問  
并賜銀合茶藥口宣

抗旌修聘濡轡還朝良多跋履之勤重有光華之遠  
爰推嘉錫仍致溫言



賜殿前司滿散天申聖節道場乳香口宣  
職重典兵誠深愛上屬紀發祥之日具脩介壽之儀  
爰致名香庶資善祝

賜步軍司滿散天申聖節道場乳香口宣

總提勁旅典護嚴宸欣逢彌月之期深祝後天之筭  
爰頌名馥庶助精誠

賜樞密院官滿散天申聖節道場乳香口宣

位高宥府時際誕辰輯仙梵之勝緣介壽昌之備福  
爰頌名馥俾達丹誠

賜樞密院官齋筵酒果口宣

赤符開運華渚標辰眷言西府之臣同効南山之祝  
爰推嘉錫往侑華筵

周必大上表再辭免除參知政事不允仍斷  
來章批答口宣

朕選求人望參翊政幾當成命之方行已僉言之維  
允亟恢賢業遂畧謙章

謝廓然上表再辭免除端明殿學士簽書樞  
密院事不允仍斷來章批答口宣

登用宏才參陪宥府已亶縉紳之聽方須帷幄之謀  
宜止常謙卽承亨遇

賜陳俊卿告口宣

褒表民庸登崇孤位已布宣於明命咸允愜於輿情  
茲錫恩綸宜承眷禮

金國賀會慶節使人赴闕平江府賜御筵口

宣

祇輯歡盟肅將慶問念載驅於周道知已屈於吳門  
爰錫華筵用昭優遇

盱眙軍賜御筵口宣

歡盟交聘口便聯華聞甫越於邊疆諒少休於候館  
亟馳內侍即啓初筵

赤岸賜御筵口宣

眷言使傳密適都門諒多行邁之勤宜適燕胥之樂  
專馳近侍申諭深懷

赤岸賜酒果口宣

銜命鼎來涓辰入見已次邦郊之近重懷使傳之勞  
爰致甘滋俾留衍樂

上壽畢歸驛賜御筵口宣

展慶闕庭歸休館舍見修儀之有度嘉將命之無違  
式示惠慈用昭眷遇

賜皇子魏王生日詔

夏籥啓和允符令節天支衍慶誕育賢王爰推賜式  
之優往績壽齡之永

賜右丞相曾懷生日詔

朱衡御令式紀嘉辰喬嶽儲休是生碩輔往侑燕私  
之喜特將慶賜之儀

賜鄭藻生日詔

氣協薰弦慶鍾懿晬紀嘉祥於初度將厚意於多儀  
介爾壽祺昭予眷禮

賜皇叔祖少保昭化軍節度使判大宗正事

嗣濮王士輅生日詔

親賢竝茂爵齒兼崇屬當流火之辰適紀垂弧之日  
爰將蕃錫庶續遐齡

賜皇兄少保岳陽軍節度使充萬壽觀使永  
陽郡王居廣生日詔

氣中商籥爰及嘉辰慶衍宗盟是生賢屬往助私庭  
之喜特推內府之儀

賜皇太子生日詔

茂德聰文純誠淵塞爰紀金行之序是鍾玉裕之資  
式厚賜儀載綏福履

賜昭慶軍節度使簽書樞密院事楊倓生日

詔

氣肅清商適兆祥於勲闕時生俊德方陪議於幾庭  
有腆予頒往綏爾福

賜簽書樞密院事李彥頴生日詔

寒籥司辰祥弧紀旦載育醇明之彥方陪宥密之廷  
爰致賜儀俾綏壽福

賜簽書樞密院事錢良臣生日詔

序協中冬時生賢佐往侑私庭之慶特推賜式之優  
俾介壽祺亦將眷禮

賜皇子魏王愷生日詔

席慶仙源憑暉霄極適清和之嘉序正誕育之良辰  
爰往賜儀俾綏壽祉

賜少保寧武軍節度使充醴泉觀使曾覲生

日詔

月協仲商天澄西灝眷我耆明之彥紀茲誕育之辰  
爰將寵頒俾侑燕喜

賜皇兄少保岳陽軍節度使充萬壽觀使永  
陽郡王居廣生日詔

素商應律灝氣澄空維予宗屏之賢肇此門弧之日  
爰推賜式俾介壽祺



賜皇太子生日詔

天祐熙朝時生元嗣茂育溫文之德永毗久大之基  
式厚賜儀俾綏壽福

賜少傅保寧軍節度使充醴泉觀使兼侍讀

史浩生日詔

初潛舊學當代元臣適商律之正清知誕期之載至  
爰將頒賚俾介壽康

賜保信軍節度使開府儀同三司充萬壽觀

使鄭藻生日詔

月旅炎方慶鍾戚畹爰有純明之彥是當誕育之辰

式厚分頒俾資燕喜

賜右丞相趙雄生日詔

天祐皇家時生碩輔式紀門弧之旦方隆鼎鉉之功  
宜厚分頒俾資燕樂

賜參知政事周必大生日詔

金行澄爽玉管流商氣鍾河嶽之英時作邦家之輔  
爰推賜式俾介壽祺

賜皇叔祖少師昭化軍節度使充醴泉觀使  
嗣濮王士輅生日詔

國重親賢時尊爵齒慶旋臨於穀旦喜倍集於宗盟

爰厚分頒俾綏壽豈

賜少保寧武軍節度使充醴泉觀使曾覲生

日詔

玉管吹商金行變爽春我初潛之舊紀茲載誕之辰  
爰有恩頒是昭禮遇

賜皇兄少傅岳陽軍節度使充萬壽觀使永

陽王居廣生日詔

德憑天緒望冠宗藩屬當執矩之秋適紀垂弧之旦  
爰推賜式俾介壽祺

賜參知政事錢良臣生日詔

昂陸司辰陽正建統天佑明昌之運時生開亮之賢  
宜有恩頒俾綏壽祉

賜樞密使王淮生日詔

序當炎籙慶集高門爰加厚於眷懷俾優推於寵錫  
永綏壽祉茂輯勲庸

賜安南國王加恩制勅書

朕肅涓涼籙祗祀合宮方覃澤於敷天爰興懷於遠  
服參稽慶典優錫褒章答爾恭勤昭于春禮宜堅侯  
度茂對邦祺

回賜安南國王李天祚進奉大禮綱勅書

朕祇循彝典丕蕝明禋維時藩服之臣遠効貢□□  
實載嘉純節具閱多儀式厚寵光用頒慶賚

賜判寧國府皇子魏王愷金合夏藥勅書

時當長育氣及炎蒸眷懷賢王越處外服特厚匪頒  
之式往綏調御之宜

賜福建路安撫使史浩銀合夏藥勅書

位崇公輔寄重价藩適當炎燠之辰宜有綏調之助  
特頒良劑用表隆私

賜四川宣撫使鄭聞銀合夏藥勅書

暫輟政塗往釐蜀部爰念青天之道適當朱夏之辰

特厚寵頒用資珍蓄

賜浙東安撫使錢端禮銀合夏藥勅書

圖政舊臣典藩崇望適茲憚暑嘉乃宣勞特頒上藥之良往助沖襟之輔

賜湖南路安撫使劉珙銀合夏藥勅書

夙預政幾久分戎翰屬炎蒸之在候念綏御之多勤爰厚匪頒庶資輔養

賜湖北安撫使沈夏銀合夏藥勅書

夏序向中暑威滋盛迺春機廷之舊適宣藩閩之勞特厚分頒用資調衛

賜主管侍衛馬軍司公事趙樽銀合夏藥勅書

眷爾忠誠典吾親衛屬炎威之蒸勃亮戎務之勤勞式厚珍頒用扶吉履

賜御前諸軍都統制時俊吳挺王琪郭剛李川皇甫侗郭鈞王明御前諸軍副都統制魯安仁翟瓊王世雄岳建壽銀合夏藥勅書

夙懷偉略分總成師暑威方隆軍事良苦特致精嘉之劑庶資調蓄之宜

賜靖海軍官吏軍民僧道耆壽等示諭勅書

朕以楊俊贍智造微宏材經遠久宣勞於外服旋登  
長於禁途典賦名曹具彰富國之績通班延閣稍遂  
奉祠之遊茲錫寵於齋壇亦增華於勲閥諒聞休命  
咸愜輿情

賜南平王李天祚淳熙二年歷日勅書

朕欽授人時裁成天道丕徧同文之地誕頒底日之  
書迺眷藩方夙恭侯度尚祇予賜庸惠爾民

賜皇子判明州魏王愷金合臘藥勅書

分慶天潢承流旬服適屬風霜之勁卽頒湯劑之良  
庸示眷懷庶扶福履



賜浙東路安撫使錢端禮銀合臘藥勅書

政路者臣帥藩崇望屬風霜之回薄諒夙夜之勤勞  
爰有寵頒用資珍輔

賜湖南路安撫使劉珙銀合臘藥勅書

望重政塗寄隆邦翰言念凝嚴之序宜加調蓄之宜  
爰有匪頒用昭眷遇

賜湖北路安撫使沈夏銀合臘藥勅書

夙參樞畫久布藩條興言綏御之勤適履凝嚴之節  
爰推賜式用輔珍調

賜四川安撫制置使范成大銀合臘藥勅書

班華禁路倚重坤隅屬嚴籥之方寒宜沖襟之是蓄  
特推頒賚庸示眷懷

賜主管侍衛馬軍司趙搏銀合臘藥勅書

夙提禁旅茂建帥權當寒序之凝嚴宜沖襟之輔適  
特頒良劑庸表至懷

賜御前諸軍都統制吳挺時俊王琪郭剛李  
川郭鈞皇甫侗王明御前諸軍副都統制魯  
安仁王世雄岳建壽翟瓊銀合臘藥勅書

嚴護邊衝總提師衆適履祁寒之序永懷共武之勤  
特致分頒用資調衛

賜福建路安撫使陳俊卿銀合臘藥勅書

鼎輔元臣价藩崇望適履凝嚴之序深懷綏撫之勤爰有分頒庶資調蓄

賜皇子判明州魏王愷金合臘藥勅書

望重親賢任隆蕃翰屬風霜之方厲諒夙夜之多勤式示恩頒用綏福履

賜侍衛馬軍行司武康軍節度使侍衛馬軍都指揮使吳拱御前諸軍都統制吳挺等御前諸軍副都統制韓寶等銀合臘藥勅書

總提戎旅展罄忠勞當氣序之嚴凝宜精神之輔養

爰頒藥劑式表眷懷

賜江南東路安撫使陳俊卿銀合臘藥勅書  
留籥地宗帥潘望重當嚴凝之方厲諒綏撫之多勤  
爰有匪頒庶資沖嗇

賜福建路安撫使沈夏江南西路安撫使楊  
俊銀合臘藥勅書

夙秉中樞薦分外寄當寒威之增勁諒藩事之宣勞  
宜有恩頒用資和衛

賜兩浙東路安撫使李彥穎銀合臘藥勅書  
望高舊弼任重名藩適涉序於隆寒宜輔和於沖履

爰頒良劑式表深懷

賜成都潼川府夔州利州路安撫制置使胡  
元質銀合臘藥勅書

歲華向暮寒氣增嚴興言夕瑣之臣專任坤隅之寄  
爰推寵錫用助珍調

示諭保康軍官吏軍民僧道耆壽等勅書

天資純全地望融顯周旋法度之訓被服德義之經  
久於班聯嘉乃端靖已誕頒於英節俾遙鎮於名藩  
諒彼聽聞同於慰喜

賜皇子判明州魏王愷金合夏藥勅書

恩隆帝子任重侯藩屬當炎暑之辰宜輔沖和之履  
特頒良劑庶表深懷

賜侍衛馬軍行司侍衛馬軍都虞候馬定遠  
御前諸軍都統制吳挺等御前諸軍副都統  
制韓寶等銀合夏藥勅書

炎籥載臨暑威方熾爰興懷於良將適留戍於要衝  
竝有分頒庶資調衛

賜江東路安撫使陳俊卿銀合夏藥勅書

鈞鼎元臣藩翰重寄屬炎蒸之在序諒綏撫之多勞  
爰有嘉盼用扶沖履

賜成都潼川府夔州利州路安撫制置使胡  
元質銀合夏藥勅書

禁路舊臣坤維重寄適炎蒸之在序諒綏撫之多勞  
爰致嘉頒用扶沖履

賜大理卿賈選等獎諭勅書

獄者人之司命也朕傷夫教化之尚淺使吾元元未  
盡知義抵冒殊扞陷於憲網嘗選明察之官忠信之  
士惟良折獄庶于無刑汝等習於律章傳以經術亟  
問亟蔽有要有倫今狴牢之內乃亡一夫之留茲非  
朕心之攸懌虜既達聽聞良深歎美

賜成都潼川府夔路利州路安撫制置使胡  
元質銀合夏藥勅書

帥閩寄隆坤維地遠當炎威之方盛諒王事之良勞  
爰有寵頒俾資珍蓄

賜江東路安撫使陳俊卿福建路安撫使梁  
克家銀合夏藥勅書

宰路舊臣价藩雅望適履炎蒸之序諒多綏御之勤  
爰致寵頒庶資調衛

賜侍衛馬軍行司侍衛馬軍都虞候馬定遠  
御前諸軍都統制吳挺郭剛皇甫侗李□□



田□卿郭鈞王世雄御前諸軍副都統制□  
寶彭杲李彥孚劉光祖郭杲銀合夏藥勅書  
分提軍旅嚴護封疆適當炎暑之辰重起賢勞之念  
爰加頒賚俾厚珍調

崔舍人玉堂類藁卷第十六

崔舍人玉堂類藁第卷十七

春端貼子

淳熙元年端午貼子詞

皇帝閣六首

五言

雙秀雲牟實三眠雪繭豐無人知帝力渾在舜弦中

又

御柳垂波綠宮槐覆幄涼香風隨步輦偏到殿中央

又

采縷縈朱戶芳菰剪翠筒風光天上別景物世間同

七言 三首

千年桃印明金殿  
百子榴房照綺疏  
清曉宮門放魚  
鑰內家催進恤刑書

又

幽芳拂拂朝香度  
密葉陰陰晝影圓  
玉食未應須角  
黍君王端是念忠賢

又

雙人綠艾消民沴  
五色朱絲奉帝齡  
向晚封章都閱  
遍翠輿初過水心亭

淳熙二年春貼子詞

光堯壽聖憲天體道太上皇帝閣六首

五言 三首

嶰管今朝應璿杓昨夜旋耕桑三萬里一樣樂堯天

又

事已高超古心猶切為民慈顏應有喜房宿正當晨

又

采栢浮仙醪凝酥點壽盤君王千萬歲長奉兩宮歡

七言 三首

九重雲氣鬱崔嵬日轉青旗瑞色開晨蹕一聲春又到太平天子上瑤盃

又

樓閣隔年餘舊雪園林連夜著新花東皇擬作行春  
計先到長生大帝家

又

景龍門上華燈動黃鵠池邊翠浪通一一春光須作  
主從今二十四番風

壽聖明慈太上皇后閣六首

五言 三首

玉筥和聲度金鋪麗景遲思齊文母聖春日受春祺

又

寶殿春朝退瑤池夜宴深明朝是人日時復問晴陰

又

翠輦西湖路雕盤北苑花時平無外事隨意趁年華

七言三首

扇開雉影紅雲起簾卷蝦鬚畫燭明三十六宮齊進  
酒盤金小勝縷長生

又

日浴鳳沼搖波暖雲護龍樓倒影長讀罷黃庭無一  
事好風吹動百花香

又

院落韶光歸柳色郊原耕信到  
菖芽望春臺下□□  
軟不見游龍有外家

淳熙六年春貼子詞

皇帝閣六首

五言 三首

今歲韶光好時逢大有年  
條風方被物菖葉又催田

又

今歲韶光好年中兩見春  
餘寒九日在芳意一朝新

又

今歲韶光好田間氣象淳  
政平無橫賦粟賤少窮民

七言三首

東風先滿殿前旗  
御柳宮花次第知  
連夜芳心相待  
發侵朝柔思不勝垂

又

千門曉日山河麗  
萬國春風草木香  
造化無私隨發  
育聖明天子是東皇

又

彤庭清蹕轉輕雷  
鳳管吹春入仗來  
萬籟有聲皆善  
頌八荒無地不熙臺

皇后閣五首



五言二首

何處春來早  
光風入九門  
未翻池荇翠  
先著壁椒溫

又

何處春來早  
坤儀物意熙  
煙生金屋重  
日上玉階遲

七言三首

明朝嘉氣滿  
慈闈親侍君王獻  
玉卮一樣酥盤俱  
手製百般絲勝總  
春宜

又

風光天上倍常殊  
花壓闌干晝影舒  
虛几自臨中令帖  
明窻時展大家書

又

清明小苑條桑地和暖平川浴種天聖主儉勤游樂  
少只將敦樸示民先

淳熙六年端午貼子詞

皇帝閣六首

五言三首

玉罕浮菖細金盤薦朮香皇齡千萬壽高拱舜衣裳  
又

蘭氣浮丹殿槐陰被紫宸薰琴多在御揮拂寄深仁  
又

清曉開魚鑰紅雲縹緲間催裁恤刑詔傳放謝衣班

七言三首

夜披章奏涼生扇午對臣鄰汗浹衣水閣風亭松竹  
邃翠輿臨幸日來稀

又

仁風長養羣生遂化日清明百沴驅桃印艾人消底  
用殿心高設敬天圖

又

避暑深宮消永晝函風廣殿起涼秋宸心未愜高明  
適志在山東二百州

皇后閣五首

五言二首

剪玉菰筒翠盤金絲縷長宮中多燕喜天下正明昌

又

瑞麥登時物香蒲薦壽祺珠囊新樣小蹙就葛覃詩

七言三首

闕草人歸午漏徐宮簾不動玉窻虛旋開藥笈及尋仙  
典閑點松腴試法書

又

蠶館風清下箔時六宮口從獻絲歸便教淵室催機

織要及明堂製衮衣

又

聖主恭勤少燕游生衣趁得未明求隨時但獻長生  
縷當午猶閑競渡舟

淳熙七年春貼子

光堯壽聖憲天體道性仁誠德經武緯文太  
上皇帝閣六首

五言 三首

欲識春回處長生大帝家萬年枝聳翠千歲果開花

又

欲識春回處君王獻壽時  
商雲扶寶座和氣入瑤卮  
又

欲識春回處晴峯俯碧泉  
巖巒猶積雪草木已生煙  
七言三首

冰消宿沼悠揚動煙暖  
寒林約略青試上龍樓回遠  
望朝來生綠畫羅屏

又

聚景園中芳意換望湖樓下綠波長  
麗眉自識車音  
美時有綉縕夾道香

又

一氣暗隨鸞輅動萬祥給會袞衣朝康衢歌吹東風  
裏滿聽兒童善祝堯

壽聖齊明廣慈太上皇后閣六首

五言 三首

天上春光別東皇管領來初從旗氣轉旋逐蹕聲回

又

天上春光別融融物態宜彤庭花氣煖黃道日輪遲

又

天上春光別時康樂事繁煙花浮閨苑露葉簇金盤

七言 三首

蒼龍紫輦道春回盡把韶華入酒盃但見殿前移仗  
退已聞苑內奏花開

又

玉壓闌干日影長雲窻侍女晝焚香琅函自檢長生  
籙金管時書急就章

又

花邊破日紅千疊柳際勻煙翠一層閱盡風光長不  
老綠車當見從雲仍

淳熙七年端午貼子詞

皇帝閣六首



五言 三首

赤伏祥暉盛黃離治象亨天時四序正君德萬方明

又

采縷盤金麗香蒲鏤玉勻君王千萬壽歲歲樂茲辰

又

日御秋秋永雲峯疊疊繁宸心定志暑長算入中原

七言 三首

光浮水檻虛黃蓋涼滿冰臺待翠輿日轉槐龍天近  
午汗衣猶聽講筵書

又

松碧涵風清度曲梅黃過雨密留陰翠寒堂上全無  
暑定起人間扇暍心

又

黃道星辰移企翼青冥風露近飛簷翠華晚過凌虛  
殿一色明珠十二簾

皇后閣六首

五言二首

玉燕垂符小珠囊結艾青更將長命縷侵曉奉慈庭  
又

厚德承三殿柔風被八絃欲知勤儉化當暑澣衣清

七言三首

玉學浮菖迨令節寶箱儲藥趁靈辰細開角黍詢前  
事應助吾皇念直臣

又

日永符池閑畫舫風清蠶館入新絲內人鬪草歸能  
說今歲山中艾出遲

又

翠雲幕卷迎風殿零露盤高待月臺應上君王千萬  
壽霓裳吹下九天來

淳熙八年春貼子詞

太上皇帝閣六首

五言 三首

翠管吹寒去青旗卷仗來  
慈皇千萬壽春日  
上春盃

又

剪玉酥花細盤金絲勝  
宜六宮呈妙巧春日  
頌春祺

又

鳳苑開丹燕龍樓下翠華  
天工不敢住春日  
著春花

七言 三首

親提神器授今皇帝德王功  
日日昌萬宇熙臺無一事  
湖山好處賞風光

又

今歲東皇作意遲春朝  
恰近上元期長生宮殿花開  
了便放人間十萬枝

又

高蹈殊庭二十春  
隨時游樂為同民  
翠輿黃傘西湖  
路老穉年年喜望塵

太上皇后閣六首

五言 三首

春曉慈闈啓君王  
奏問安和聲調  
解管歡頌獻椒盤

又

春晝慈闈靜宮簾日上徐焚香開竺二典滴露寫仙書

又

春夕慈闈永瑤池樂未央管弦聲合奏燈月影交光

七言三首

昨夜三更斗柄旋東風催放百花鮮飛來峯下浴新  
綠流得春光到外邊

又

鬱葱嘉氣滿蓬萊天子雙稱萬壽盃朝罷樂音迎複  
道瑤輿同上望春臺

又

有象并平屬好春九衢歌舞樂芳辰濯龍門外車如水應笑豪華漢外親

淳熙八年端午貼子詞

太上皇帝閣六首

五言三首

待月長生殿迎風太液池慈顏歡樂日聖德盛明時

又

濯濯風涵柳英英露瀉荷微涼無限意分付舜弦歌

又

蓮葉看龜上桐花引鳳棲聖人千萬壽福祿與天齊

七言三首

采索謾縈長命縷紫芽安用引年苜只將三紀休兵  
德聖壽宜同泰華長

又

了無塵累可關情坐見寰區樂太平弄水看花聊燕  
適倚松餐菊偶經行

又

竹殿陰陰間綠槐日長碁罷看流盃北窻風味沈沈  
靜南內時新節節來

太上皇后閣六首



五言 三首

菰黍團雲白  
芎花剪玉長  
晚涼新月上  
水殿按霓裳

又

海上千年實峯頭  
十丈花年年當令節  
同獻玉皇家

又

翰墨消長日  
尊壘占遠風  
纖塵吹不到  
人在玉壺中

七言 三首

寶月駸鸞采  
結垂朝來新  
寫上皇詩  
金盤有露涼生  
早玉宇無塵凍  
解遲

又

水晶宮闕淨涵虛  
歷歷南風度玉除  
金井輓轡聲欲  
曉內人來奏問安書

又

萬年枝下綠陰長  
拂石時來坐晚涼  
別殿笙歌催宴  
早千門鋪月靜焚香

三才圖會卷十七

三

崔舍人玉堂類藁卷第十七

崔舍人玉堂類藁卷第十八

致語口號 樂曲附

金國使人到闕紫宸殿宴參軍色致語口號  
勾合曲詞

致語

琬圭修聘方申締於歡盟雕俎均思爰肆陳於慈燕  
肅簪紳而拱極儼旒冕以當天洪施豐融輿情樂豈  
恭惟 皇帝陛下建中布度執競凝圖英略淵通昭  
徹天人之表深仁溥博際蟠宇宙之間旁開衆正之  
門廣闢太平之路念寶鄰之永好嘉外使之多儀置

一六二  
一  
帳于神麗之庭下輦于明光之殿風回鳳蓋密瞻煥  
渥之容日度鼇峯屢轉華旗之影寫淳音於調露汎  
嘉氣於流霞君臣歡康中外寧壹臣叨居法部幸際  
熙辰上奉宸顏敢進口號

口號

春風黃繖下清廟纓弁蟬聯宴未央萬國文明周禮  
樂九重端穆舜衣裳雲低殿幄星辰近漏轉宮花日  
月長聖主寬仁盟好永和聲細入鹿鳴章

勾合曲

曉日周原念使駢之勤勤春風漢殿開燕席之從容

筍簋畢陳笙鏞間奏式遂莘魚之樂聿來祥鳳之儀  
上悅宸顏教坊合曲

金國賀正旦使人到闕紫宸殿宴致語口號  
勾合曲詞

致語

周歷誕頌適履端於今日漢儀高會爰示惠於羣臣  
清光粹溫協氣充塞恭惟 皇帝陛下體元御極贊  
化宜民當三陽開祚之辰展萬壽稱觴之禮臣等恭  
陳口號仰奉宸歡

口號

九重帳殿敞層空清曉羣臣宴鎬宮神護翠華居北  
極春隨黃傘下東風觴行隱隱紅雲裏仗轉矐矐瑞  
日中看取乾坤俱壽域兩朝時節聘車通

勾合曲

和樂在陳嘉觴當御日度層峯之影風回廣殿之春  
上悅天顏教坊合曲

金國賀會慶聖節使人到闕集英殿宴致語  
口號勾合曲詞

致語

冬權肇始陽月就盈當真人誕育之辰正寶曆明昌

之運 皇帝陛下樂同萬國禮厚羣賢啓惠燕於端  
宸流恩光於廣坐君臣相悅福祿無疆臣等上奉天  
顏敢進口號

口號

良月欣臨震夙辰恩涵雨露燕羣臣遙連漢岳三呼  
應徐聽虞韶九奏淳仙篆縈風浮廣殿卿雲擎日護  
嚴宸奉觴更喜嘉賓會同祝 吾皇萬壽春

勾合曲

丹宸天臨華簪雲會旣洽莘魚之樂宜觀韶鳳之儀  
上悅宸顏教坊合曲



金國賀正旦使人到闕集英殿宴致語口號  
勾合曲詞

致語

斗轉璿穹序正夏時之統星環寶座儀陳漢殿之圖  
嘉生阜繁協氣充塞恭惟 皇帝陛下聰明天錫剛  
健時行對昌會之亨通同羣情之燕樂臣等輒收與  
誦盡入歡謠

口號

殿頭清蹕起晴雷萬歲聲中扇影開曉日青旗明絳  
闕春風黃傘傍瑤臺卿雲湧瑞扶天座仙露流甘入

御盃要識八荒俱壽域年年常看使星來

勾合曲

華幕張庭翠裘臨座既洽嘉賓之樂宜聞治世之音  
上悅天顏教坊合曲

會慶聖節使人到闕集英殿宴致語口號勾

合曲詞

致語

冬律乘乾皇圖開泰千載慶生商之旦四方同戴舜  
之心撫運隆昌對時康乂轉丹輿於廣殿張翠幄於  
彤庭雨露涵濡風雲際會臣等輒陳歡誦仰奉威顏

口號

雲護輕霜漏曉晴日高黃金傘影亭亭六龍衛蹕來臨  
座五鳳儀韶下舞庭地湧南山朝帝殿天回北斗挹  
仙驪侍臣近識宸顏喜時顧皇皇二使星

勾合曲

景轉繒峯香浮黼座既上萬年之壽當條九奏之音

致語

周官頒曆正月之吉始和漢殿登圖諸福之物畢至  
恭惟 皇帝陛下剛明獨運慈儉安行應乾坤交泰  
之辰合君臣相悅之樂鸞觴當御鸞羽分庭臣等敢

酌民言用成口號

口號

四時和氣轉洪鈞昨夜璿杓正指寅萬玉鳴班朝廣  
殿五雲扶輦下端宸翠旄低引仙韶度寶罕徐傳御  
醴醇看取年年來信使定知天地一家春

勾合曲

日轉鼇峯雲低鳳蓋流人間之歡詠入天上之和聲  
金國賀會慶節使人到闕集英殿宴致語口  
號勾合曲詞

致語

天開景命璿樞應千載之符時協昌辰玉殿獻萬年  
之壽恭惟 皇帝陛下神謀高運仁德安行受福無  
疆垂虞裳而臨正宇與民同樂開鎬燕而集羣臣流  
仙露以溶津結卿雲而駐采臣等敢緣嘉會輒貢蕪  
詞

口號

盛節簪紳宴玉京紅雲深護赭袍明寶花合座天香  
滿仙羽分陳御學行原隰有光交信睦廟堂無事樂  
和平歡心協氣知多少盡在今朝九奏聲

勾合曲

萬歲稱觴已祝聖人之壽九成合奏宜揚治世之音  
金國賀正旦使人到闕紫宸殿宴致語口號  
勾合曲詞

致語

臣聞帝執規而布治萬物俱榮王在鎬以示慈羣情  
胥樂乾剛高運豐照端中撫邦家晏祭之辰應天地  
亨嘉之會彤庭合弁迎羲馭之舒長寶座傳觴況衢  
尊之多旨臣等欣逢令旦冒貢蕪詞

口號

東風初滿殿前旗環珮春容侍燕時帝澤普涵春自

暖人心同樂日先遲三峯影裏瞻鼇動九奏聲中看  
鳳儀更喜使華齊獻壽八方何地不熙熙

勾合曲

仙羽分庭宮花覆座既洽惠慈之樂宜揚皦繹之音

金國賀正旦使人到闕紫宸殿宴致語口號

勾合曲詞

致語

臣聞五始書正集嘉祥於華旦萬年稱壽望粹表於  
中天惠燕雲需歡聲雷動恭惟 皇帝陛下聖神廣  
運慈儉安行政布青陽對三朝之亨會恩垂湛露流

四海之深仁臣等仰悅宸顏俯陳口號

口號

仗轉瞳瞳曉色嫩千官齊望赭袍尊食苹鳴鹿迷天  
樂泳藻游魚沐聖恩香泛流霞涵雨露春隨和奏滿  
乾坤使華同上南山壽近識宸顏一倍溫

勾合曲

玉醴飛觴金壺緩箭宜合虞韶之奏更均鷦燕之歡

六州

商秋吉嘉會協中辛涓路寢修禋祀聖德昭清端志  
慮罄竭齋精錦繡排天仗羽衛繽紛朝太室返中宸



被袞接神明時平天地俱清晏  
兼豐年和氣品物達  
芳馨瞻煥座春容娛燕三靈奠  
瑤爵薦量幣清思助  
冥冥望昆侖嘉祥塞細緼誠殫禮  
洽慶休成潤澤被  
生民端門肆眚昕庭稱賀俱將景  
福萬壽祝雙親

十二時

勛華並天昨昌期聖德茂重離  
英明經遠濟哲昭微  
寶儉更深慈觀萬國累洽重熙對  
明時報禮秩神祇  
玉帛奏華夷雍肅顯相百辟各欽  
祇奄嘉虞英壁奠  
華滋神安坐景氣澄虛極光燄燭  
長麗展詩應律萬  
舞逶遲三獻洽皇儀垂靈寢慶祐  
來宜禮無違鳴鑿

臨帝闕飛鳳下天倪清和寰宇霈澤一朝馳醇化無  
為萬祀鞏洪基

登門肆赦皇帝升御座宮架奏黃鍾宮乾安  
之曲

大禮備矣鑿車闐闐帝來維何賚及幅員有聲伊肅  
有容伊虔彼雉斯開帝坐中天

皇帝降御座宮架奏黃鍾宮乾安之曲

帝坐中天流澤演迤厥蒙伊民歌舞以喜澤流普矣  
民喜偕矣駕言徂歸福祿同矣

太祖皇帝位酌獻登歌作大呂宮彰安之曲

一德開基百年垂統中天禘郊薄海朝貢寶龜相承  
器鼎加重澤深慶餘帝復命宗

皇帝入小次宮架奏黃鍾宮儀安之曲

匏尊既舉蘇席未移有德斯顧靡神不娛物情肅穆  
天宇清夷宅中受命永復邦基

亞獻宮架奏黃鍾宮穆安之樂威功睿德之  
舞

四阿有嚴神既戾止備物雖儀潔誠惟已有來振振  
相我熙事載酌陶匏以成茲祀

送神宮架奏圜鍾宮誠安之曲一成

奕奕宗祀煌煌禮文高靈下墮精意升聞熙事既畢  
忽乘青雲敢拜明況永清世氛

皇帝還大次宮架奏黃鍾宮憩安之曲

應天以實已事而踐瓊案朝帝竹宮拜神靈光下燭  
協氣斯陳福祿時邁基圖日新

皇帝上

太上皇帝壽樂曲

陞坐用聖安之曲

簪纓列序羽衛分行雉扇爰徹天威煇煌清明在躬  
容容昂昂咸拜稽首萬壽無疆

公卿入門用禮安之曲

端闈肅啓金奏和聲有來濟濟煜其華纓度中規矩  
步協英莖一人達孝百辟丕承

皇帝上 太上皇壽酒用福安之曲

笙鏞皦繹冀簋騰驤奉觴介壽龍衮黼裳盛儀克舉  
至德用章刑于四海化洽風揚

上壽用崇安之曲

凝旒肅穆鳴佩春容有酒伊酌管磬其從典禮絢綉  
威儀恪共頌堯之壽與天比隆

太上皇帝初舉酒用蟠桃之曲

結根閭苑登實瑤池紅雲駢艷瑞露含滋味參石髓  
名配松脂王母一笑河水漣漪

再舉酒用大椿之曲

培植自古質淳以全凌傲霜雹盤薄風烟朝菌焉識  
楚莫詎肩聳柯擢幹終古蒼然

三舉酒用瑞鶴之曲

彼肅者羽名紀仙經芝田下啄容止安傳引吭警露  
響徹青冥聖德格物來儀帝庭

四舉酒用祥龜之曲

粵有靈物負圖效祥蓮棲著宿錦文有章天和發越

睿澤滂洋沂于宮沼美應昭彰

五舉酒用老人星見之曲

奕奕南極應期曜靈祥暉昭衍次丙躔丁事垂漢史  
名著甘經錫符祚聖億萬斯齡

降坐用福安之曲

慶典具舉皇慈溥將禮光長樂事掩未央佩環濟濟  
金石鏘鏘天容有懌言旋建章

羣臣酒三行並用正安之曲

曉日敬天門星環萃盍簪明良賡舜日富壽祝堯心  
穿仗搖旗影鳴珂混樂音聖朝敦孝理百辟盡丕欽

縹緲殿中央紅雲捧紫皇香風飄絲仗仙露滴霞觴  
樂度儀鳳曲恩流振鷺行萬年天下養寶祚享靈長  
清漏滴彤壺皇仁雨露濡遙瞻天一笑同効岳三呼  
御醴傳觴速宮花覆座敷欲知歸美意歌頌在康衢  
酒一行罷用萬壽無疆之舞

三紀御圖道豐德盛化洽兆民功光列聖界託有歸  
脫屣萬乘優游法宮頤神養性岌岌具闕豐麗靖淵  
游神象外玩意物先為衆父父尊榮配天大福備祿  
何千萬年

酒再行罷用聖德重光之舞



於穆聖子仁天智神體剛立極寶儉化民美政畢舉  
舊章聿遵舞以象德儼韶實倫龍樓問寢前殿奉卮  
密承慈訓不忘其祇海宇豐阜邊陲晏夷于以養志  
福祿來宜

崔舍人玉堂類藁卷第十八

崔舍人玉堂類藁卷第十九

祝冊詞表

明堂大禮祭享皇地祇冊文

博厚載物靜專承天溥彼羣生裕于大化欽念菲質  
紹承慶基山川晏寧稼穡蕃阜膺受靈顧不敢怠違  
練吉商辰修報世室奠以黃玉薦以黝牲承神至尊  
精意孚盡臨錫景福垂休無疆

太祖配享冊文

五代腥聞萬姓請命誕降真主風揮日舒方夏載寧  
彝倫攸序天德地業詒厥子孫傳及眇冲嗣守神器

夙夜祇畏思昭大猷報本返初無物可稱宗祀世室  
陟配兩儀威神在天右序罔極

太宗配享冊文

維聖肇造維明纂承廣聲昭功混壹函夏文熙武鬯  
底于丕平世承慶休施逮眇德是述是紹不敢□□  
金行肅秋歲物告阜祇舉彝典大饗合宮明明祖宗  
竝侑于坐來燕來止綏福萬邦

明堂大禮修整雅飾太廟畢土時前奏告祖  
宗帝后神主還殿室祝文

祀展合宮享先太室嘗畢加於修飾已具益於神深

敢告前期將伸還奉

安穆皇后安恭皇后祝文

具嚴闕宇祇妥靈遊屬當大饗之期嘗飭加修之役  
逮茲訖事敢以告虔

正奉安祖宗帝后神主祝文

崇崇總章戒于大饗奕奕清廟謁以先期旣庇役以  
圖新爰消辰而還御敢孚誠意庶安神遊

正奉安懿節皇后祝文

明堂孔陽精裡是舉闕宮有恤虔饗攸先嘗祇戒於  
繕修茲具觀於嚴靜敢消良日永妥靈遊

安穆皇后安恭皇后祝文

宗祀維時先期是饗嘗加修於闕宇庶具歲於禋容  
茲告訖功敢祈旋位

明堂大禮畢皇后賀 皇帝表詞

觀時亨會酌千古之彌文遵國彝章展九筵之嘉饗  
禮儀既備慶賜遂行恭惟 皇帝陛下聖孝日勤皇  
仁天覆據域中之位盛德通於明神采汶上之圖美  
報修於元祀四方來賀萬壽無疆妾正體坤儀承休  
乾運當告成於熙事實倍喜於柔悰

皇帝答皇后詔本

朕祗遵舊章肅稱元祀嘉氣被乎重屋美光燭乎崇  
筵神靈燕虞福應顯見欽荷博臨之況愈深寅畏之  
懷遽覽奏陳具形贊喜重為披閱良集褒嘉

天慶觀預告五嶽四瀆祝文

消辰商籥歲事總章重循眇躬曷究盛典即此祕宇  
告于羣神尚祈孚休汔遂成禮

雷神雨師祝文

國家宗主百神稱秩羣祀凡以茫佑生民也今自夏  
愆澤越秋亢陽雨猶不滋苗將卽槁神掌茲事寧忍  
弗圖側躬焦勞用以誠薦

天地

蓋聞王者正五事以承天心乃雨暘以時民用樂康  
永念眇躬奉承基緒維德弗逮無以感通陰陽之和  
乃自夏秋之交旱魃為虐良疇沃壤胥為焦原嗷嗷  
下民行且艱食慮念憂灼罔識所圖是用飭遣大臣  
請于天地之靈願垂畀矜亟賜膏澤使稼穡中熟民  
獲免於阻饑敢不夙夜寅畏以承嘉休

社稷

維國家秩祀社稷所以助生萬物也今自夏乃秋農  
壤匱澤滌滌旱野播為埃塵民情焦然行且艱食永

思厥咎夙夜兢畏無以感回天心維神國之尊奉民  
之依賴其尚應時消沴以惠福于我有邦吁嗟以請  
庶其鑒之

別廟 懿節皇后祝文

安穆

安恭皇后

同詞改慈德  
作后德

竝緣旱虐浸害農田竝告神靈庶蒙膏潤欽惟慈德  
孚佑我家迄臻順成實藉陰相

五嶽四瀆祝文

自夏亢陽越秋匱澤旱既太甚民將亡聊寅念山川  
之神寶司雲雨之柄祀垂萬世望冠百靈適災沴之



已長豈神明之弗恤願垂嘉應沆底豐年庶宏濟於  
民生當永虔於邦禮

十神太一祝文

行棊布氣福庇兆民闕宇棲真禮崇羣祀適屬愆陽  
之序已深艱食之虞敢竭齋明用通靈應願下九天  
之御亟垂三日之霖盡起稟苗頓還豐歲吁嗟以請  
庶矜佑之

宗廟

寅念涼德奉承丕基無以感通神祇消弭災異乃夏  
秋之交旱魃為虐良疇沃壤胥為焦原嗷嗷羣情行

且艱食慮念憂灼罔識所圖惟祖宗在天之靈矜哀  
下民畀佑膏澤使歲得中熟民獲免於阻飢敢不夙  
夜祇栗以承嘉休

九宮貴神

惟神道參上帝德芘下民稽按靈典實專主風雨霜  
雹之事此國家所以虔共奉祀以迎嘉休也今夏秋  
亢陽勢既太甚滌滌旱野嗷嗷民情化災為穰功在  
頃刻輸誠以告庶矜佑之

皇帝進奉 太上皇后生辰表詞

金風扇物王商籥之佳辰玉殿稱觴紀慈闈之誕序

三神合慶四海交驩恭惟履德謙恭游心清靜啟塗  
山而輔贊蚤濟中興坐少廣以逍遙晚偕難老屬臨  
令節益介純祺臣祇荷親仁紹承邦緒萬年康壽方  
修視膳之勤百葉雲仍更祝含飴之樂

皇帝進奉 太上皇后生辰功德疏

祥開沙麓慶千載之昌期教歲琳宮輯九天之妙果  
爰申頌祝益罄齋明 云云 恭願百順雲臻萬祥川至  
享無量福永延昌熾之休會長生君同樂清虛之境

春分前修整補種奏告 昭慈聖獻皇后櫝

宮 永祐陵櫝宮表文

義律和聲正協鳴庚之序漢陵王氣已成拱木之陰  
爰及芳辰俾加庶役是遵藝典敢告先期

安恭安穆皇后攢宮祝文

金屋長違玉衣永閔適及融和之序當加修治之宜  
庀役維時涓辰是告

仲春修整修換殿室什物并補種窠木奏告

昭慈聖獻皇后攢宮 永祐陵攢宮表文

肅瞻吉兆近在勝區春事方興宜加於締葺靈存是  
宅實慮於震驚敢告役期庶孚神監

顯恭皇后表文

增嚴仙寢遵用彝章事役得宜已涓於良日神靈貴  
靜爰告於先期仰冀永寧俯垂丕福

安穆皇后安恭皇后攢宮祝文

春律將中國章是舉爰增嚴於域兆已夙戒於工徒  
涓辰旣良先事乃告

奏告

徽宗皇帝神帳朱漆暗淡起剝合行重朱換  
殿脊攔損爛告遷神御權安奉表文

肅瞻仙域近在輔藩帳座黯昏合加顯設殿楹弊腐  
仍俾更新涓時日以即工奉衣冠而移御具敷誠悃

虔妥威靈

奏告

顯恭顯肅顯仁皇后神帳朱漆暗淡起剝合  
行重朱告遷神御權安奉表文

同前表文威靈改作光靈

欂宮下宮疎漏翻瓦祭告告遷

安恭皇后神御於殿東廊權奉安祝文

眷彼寢封戒茲工役當奉遷於靈御庶寧妥於真游  
爰卜良辰敢伸虔告

奏告

徽宗皇帝神帳重行朱漆并重換殿脊擱畢  
工告遷神御還殿正奉安表文

禹山神麗漢寢崇深鳩役加修用嚴弓劍之地消辰  
告備復妥衣冠之遊爰布誠忱虔通靈鑒

奏告

顯恭顯肅顯仁皇后神帳重行朱漆畢工告  
遷神御還殿正奉安表文

慈德在天真遊有所近加賁飾嘗遷寓於神靈今告  
鼎新庶永寧於容御既涓良日敢布丹衷

太常寺申撰成都府新繁縣裝飾六朝御容

衣紋及修飾殿宇奏告祝文

坤維地遠嘗寫真容繪事工深儼存遺範慨棟楹之  
歲久慮冠劔之塵侵因飭更新用嚴崇奉旣鳩庶役  
敢告前期遐想威靈默通誠素

崔舍人玉堂類藁卷第十九



11月11日

1

崔舍人玉堂類藁卷第二十

祝冊詞表

春分前繕修補種奏告

昭慈聖獻皇后攢宮 永祐陵攢宮表文

禹會名山漢陵勝兆春陽方動適稽按於彝章工役  
當興慮震驚於真御敢涓良日祇告前期冀寧宅於  
仙區訖敷遺於後利

安恭安穆皇后攢宮祝文

瞻懷邱寢嚴奉容衣春事旣興國章攸舉考日茲吉  
僾工是宜維妥而寧敢前以告

祭告

安恭皇后為下宮殿內踈漏箔翻庑畢工告  
遷神御還殿正奉安祝文

逝瞻仙域近在勝區既殿宇之圖新宜容衣之還御  
敢涓良日庶妥靈遊

奏告

懿節皇后神帳朱漆暗淡起剝并帳座損爛  
及架擱走起修換重行率正告遷神御權安  
奉表文

仙寢成陰神遊安位屬舉繕修之事深懷震動之虞

敢即先期暫移靈御俟畢成於庶役即還奉於真容  
奏告

懿節皇后神帳朱漆暗淡起剝并帳座損爛  
及後架擱走趨修換重行葺正畢工告遷神  
御還殿正奉安表文

頃緣庀工嘗告遷御官師肅給旣徒役之時休帳殿  
靖深宜靈神之端返敢涓良日用達丹誠庶安侑於  
真遊益綏成於景福

報謝天地祝文

比以驕陽浸成重青嘗極吁嗟之請冀回眷佑之仁

於遂感孚日聞霑洽農畝間成於中熟漕渠悉底於  
大通爰竭誠衷用伸報禮

太廟祝文

春佑二字改作顧佑字

餘同前

社稷祝文

春佑二字改作鑒佑字

餘同前

太乙文

同社稷

九宮貴神祝文

同社稷

五嶽五鎮祝文

比者驕陽煽沴時雨愆期閔此下民瀕於艱食竝走

羣祀畢輸丹誠迄蒙靈休旋獲嘉潤農畝間熟河流  
大通敢涓剛辰用謝昭貺

四海四瀆祝文 同前

雷神雨師祝文 同前

別廟懿節皇后祝文

比緣旱魃浸害農疇嘗布誠忱庶回休應迄臻霑洽  
遂慰焦勞敢涓剛辰用謝靈貺

安穆安恭皇后祝文

進呈安奉前二日奏告景靈宮中後殿祝文

書成良史篇奏法官紀四聖之宏規垂萬年之偉範

事闕廟社慶集臣民將謹寶臧敢祈孚鑒

閏三月旦望起居景靈宮諸神御并永祐陵櫝宮  
昭慈聖獻皇后櫝宮會聖宮等表詞本

諸帝旦表

生民之道要在正時附月之餘乃維置閏式因朔旦  
庸舉國章恭惟恭儉寬仁聰明齊聖垂子孫而作則  
參天地以成能茲履昌辰益懷遺烈爰致吉蠲之饗  
用伸感慕之誠

諸后旦表

月分重管日累餘躔晦明之數罔愆寒暑之宜遂正

恭惟化參坤育功濟乾行道德流長永錫蕃昌之福  
歲時運往空懷遐邇之靈敢率彝章用修芳薦

諸帝望表

振美於辰適春華之方盛歸奇於劫乃天道之有成  
恭惟恩浹綿區德高邃古銅渾度正方遵政教之常  
金鼎光寒徒望威靈之遠

諸后望表

斗杓斜指既協芳辰月魄中圓又當良日恭惟覩天  
表異儷極功高流美化於四方貽徽音於萬世敢陳  
嘉薦庶達丹誠



孟夏車駕詣景靈宮朝獻祝香文

盛德日升洪休川至建無前之美業鞏不拔之丕基  
孟冬車駕詣景靈宮朝獻祝香文

皇圖安永帝業隆昌慈闈申萬壽之休寰宇共三登  
之樂

太陽交蝕祭告祝文

太史有言日食在朔深惟變異不遑寧居伐鼓用牲  
國有彛典消弭厥咎繫神之休

太陽交蝕祭謝祝文

太陽當虧是謂變異竝舉常典側躬省修重除蔽霄

潛護光體神寶賜況敢忘薦誠

孟春車駕詣景靈宮朝獻祝香文

皇圖天大聖德日躋兩宮永享於壽昌萬國咸臻於  
康富

孟春車駕詣景靈宮朝獻祝香文

邦圖鞏固親壽延昌三邊仍偃革之安萬國遂登臺  
之樂

孟夏車駕詣景靈宮朝獻祝香文

三邊安靜五穀順成凡居覆載之間咸享和平之福  
明堂大禮禮畢車駕詣景靈宮恭謝祝香文

裸將太室宗祀合宮慶盛禮之熙成擁嘉祥之滋至  
云云伏願德參五帝功冠三王邦國開不世之基親  
壽介無疆之福

告謝五嶽四瀆祝文

蒐講彌文紹修元祀霽霖雨於先夕燭靈光於嚮晨  
迄底休成實多陰相敢陳芳薦竝答殊休

孟春車駕詣景靈宮朝獻祝香文

民生康阜親壽綿長三邊臻偃革之安萬國遂登臺  
之樂

太常寺申撰進呈安奉

三祖下上五世宗藩慶系錄

真宗皇帝玉牒奏告青詞

鉅典時脩有司告備昭列聖蕃昌之緒侈真皇盛大  
之休已消卜於剛辰用闕藏於邃宇仰祈淵鑒永覆  
丕圖

安奉奏告中後殿祝文

祇涓吉日登進成書慶述祖宗將謹寶藏之永事闕  
社廟敢忘昭告之勤仰冀靈觀俯垂孚鑿

孟夏車駕詣景靈宮朝獻祝香文

伏願基圖鼎固功業川增親庭膺萬壽之休海宇遂

三登之樂

孟秋車駕詣景靈宮朝獻祝香文

帝業隆昌皇猷光大盡恢文武之境土永垂堯舜之  
衣裳

孟冬車駕詣景靈宮朝獻祝香文

福祥川至功業日新居中土以制四方開明堂而朝  
萬國

孟春車駕詣景靈宮朝獻祝香文

治功日進聖壽天齊盡恢故境之廣長永奉慈庭之  
康樂

孟秋車駕詣景靈宮朝獻祝香文

伏願四方安泰五穀豐登躋治効之隆昌奉親顏之  
歡樂

孟冬車駕詣景靈宮朝獻祝香文

二氣敷和三靈駢福嘉雪消餘年之疵瀉慶雲占嗣  
歲之豐登

明堂奏告天地宗廟社稷別廟祝文

祇承親訓稽協邦常因萬物之成秋舉九筮之恭祀  
仰祈昭鑒虔告先期

宗廟祝文 社稷祝文

昭鑒改云孚鑒

別廟祝文

參講上儀肇修宗祀已卜消於嘉序嘗飭戒於先期爰率故常竝伸預告

奏告五嶽四瀆祝文

四首一詞係路通去處

遵用彝章紹修宗祀卜消時日之吉敷告山川之靈庶達虔誠竝孚聰鑒

祭告五嶽四海四瀆祝文

九首一詞係路未通處

肅涓嘉序祇事合宮慨疆域之未還瞻山川之尚遠竝陳芳薦遙告先期

明堂大禮前二日朝獻景靈宮分詣奏告中  
後殿祝文

紹承慶運蒐講上儀循三歲之彝章舉九筵之親祀  
敢先信宿祇款神靈庶達明誠竝垂孚鑒

後殿祝文

練吉商辰躬祠世室翕來四海之助昭格三靈之歡  
敢飭前期祇修嘉薦仰祈丕佑永庇昌圖

青詞

紹舉明禋已消辰而展采祇循彝典敢先事以告虔  
肅仰真風口扶丕緒冀鑒臨於精意益申錫於純禧



奏告諸陵帝后及昭慈聖獻皇后攢宮永祐  
陵攢宮表文

荷天休命當修大報之常稽古彌文肇舉合宮之饗  
茲逖瞻於真域敢祇告於先期爰達丹誠庶孚靈鑒  
奏告安穆皇后安恭皇后攢宮祝文

三歲親祠具存常典九筵宗祀丕講上儀飭事維虔  
先期是告

崔舍人玉堂類藁卷第二十


崔舍人西垣類藁卷第一

王希呂知紹興府

稽山奧壤浙水名邦地接浩繁夙倚藩維之重民罹  
留害今勤憂顧之懷具官王希呂識慮疏通器資強  
毅純誠天至獨開忠義之圖俊辯風馳自詭功名之  
會寔發舒於素蘊遂登冠於近聯久歷歲陰益承恩  
遇爰念近畿之地方深艱食之虞展閣貸捐悉無遺  
力矜存惠養正在得人宜深體於焦勞尚恪勤於綏  
撫惟詳密可以究民隱惟寬和可以盡下情佇輯顯  
庸卽圖懋賞可

鄭丙除吏部尚書

天官任重綜會羣才常伯班高密鄰二府朕深厭容  
容之弊樂聞諤諤之風儀圖正臣領袖法從具官鄭  
丙志剛而弗惑學博而有原正色不回凜凜端朝之  
望至誠無隱拳拳迄膝之陳察其特立而獨行常以  
深嘉而屢嘆眷言銓選宜屬老成惟亮直必不以法  
而從人惟公明必不以權而付吏揚清激濁方觀綱  
紀之張陳善閉邪更賴謀猷之告勉堅素守益劬遠



朕稽古訓以建官酌公言而立政稟承出於西省旣克謹於幾微之先審閱付於東臺又相濟以可否之論夙重茲任亶惟其賢具官施師點學造深淳器函夷雅清規亮節凜松栢之後彫厚實美名顯圭璋之特達自躋榮於禁路卽演潤於詞垣高文寡經術之華宏論達國家之體旣淹歲籥宜進位班庶事施置有未便於民羣才選除有未孚於衆爾悉予告予皆爾從當消患於冥冥豈矜功於赫赫勉殫忠蓋茂對亨嘉可

未待問除中書舍人

政令出於中書訓辭行於內史必識通今事乃能裁  
若否之宜必文追古風方足擅坦明之制得於已試  
命以爲真具官木待問智識澹長風規遠遠英聲茂  
實早騫藝苑之華安步徐行徧極儒林之選曩記言  
於左陞旋攝直於西垣文詞鼓天下之心議論發胸  
中之蘊宜從輿望遂正近聯四禁行書方重高華之  
地五花判事益觀潤色之長可

儒林郎劉植降一官

國家法令昭若日星有官君子尤當循守爾乃戾法  
以徇其私罰可逃乎可

從義郎孫惠義降一官

縣令於民最親爾居其官敢肆殘酷不有顯罰曷厲其餘可

芮輝兼侍讀

朕泛觀載籍夷考名臣越在李唐深嘉陸贄雖忠規挺挺凜後世之未亡顧諫疏拳拳慨當時之不遇肆疇近列俾闡遺文固將廣一己之聰明抑亦發九原之亮直具官芮輝性資宏毅德宇淵純奧學英詞蚤著士林之譽昌言正論晚高禁路之聲宜從清燕之遊用究前賢之蘊摘其精要爲我指陳金必賴於良

工始得範模之正方雖傳於往古固多樂石之良可  
武功大夫謝純孝降三官放罷

廉恥國之所甚重貪汚法之所不容爾資稟凡庸弗  
紹厥美護其宿過寘在右班位序高華不爲不遇繕  
治器械朕所注懷俾爾典臨略無勞効而敢黷貨冒  
沒肆其豕心徹于聽聞何敢佚罰雖鑄累秩尚屈彝  
章宜知寬恩痛自懲省可

韋訊致仕

朕娛侍親庭優隆戚畹望濯龍之車馬稍闕冲規挂  
神武之衣冠忽披忱請重違雅志亟下褒書具官韋

訊制行端良稟資和裕高門有奕靡矜世曹之華令  
德無疵自迪儒風之美比聞假告方切眷懷尚須勿  
藥之期遽上告歸之奏念其確至畀以休閑簪紱趨  
朝雖嘆儀刑之遠邱樊佚老終膺福祉之長可

張顯功轉防禦使

帶干將佩弧矢入侍出從密近左右其爲恩渥不同  
常倫于解其職又增秩以寵之用故事也爾恭恣敏  
給擢在軒墀左弭右鞬周旋惟謹茲出分於戎務爰  
陞寄於軍防尚服龍光益圖報効可

秉義郎魯安時妄陳利害降兩官



臣正其美之實一  
朕於聽言雖草茅之狂未嘗不容也爾詭辭汗漫略  
無端倪不黜得乎可  
臣

韋訊贈節度使

聯華四姓望尤重於親賢流寵九原義當隆於恩禮  
莫追遺範爰錫愍章具官韋訊德宇靖深器資溫裕  
雍容文藝恂恂樂善之風蹈履中和疊疊勞謙之度  
還觀懿行盍享遐齡方從解紱之高遽歎移舟之遠  
臨朝興愴念威畹之彫零渙爵疏恩飭邦彝之優厚  
宜畀建旄之寵俾爲告第之光慰爾杳冥寄予哀惻  
尚祇徽典永燕幽宮可

木待問磨勘轉中大夫制

聯榮兩禁禮優入侍之臣會課三銓法著陟明之典  
肆條伐緒爰錫恩書具官木待問德宇凝深詞華雅  
健代言西掖旣全潤飾之功論道東宮更廣見聞之  
正寵榮方集聲問采高稽周官大計之書躋漢爵議  
臣之序秩登祿富當思報稱之圖言聽計從正賴忠  
嘉之益可

皇甫倜降官吉州居住制

程尉馭下必先軍簿之明李牧饗師亦取市租之富  
爾素稱勇節自奮戎行蚤受簡知荐分委寄旣不能

昭明兵律俾以肅齊又不能經理軍須底于辦給空  
閱歲年之久略無績効之聞茲覽人言可逃國典宜  
併錫於官秩仍就謫於方州法有至公固不渝於金  
石才無終棄尚可効於桑榆可

趙善俊降直徽猷閣制

朕審重名器未嘗輕假爾畏妄人之利口溢薦牘之  
虛辭欲以市恩忍於罔上任方面者顧如是乎降職  
示懲尚爲寬典宜思循省毋重悔尤可

孔摺降兩宮制

孔子曰節用而愛人未有用節而人不蒙其愛也爾

爲聖人後曾不知此聊從薄罰降秩罷州歸思聖言  
尚亦知耻可

牟天麟降一官放罷

小寇跳梁一方被害爾爲郡貳義當首公避事偷安  
茲復何賴免官降秩庸戒後來可

王丞相初除封贈三代

曾祖贈太師

朕卜選真賢登進宰位乃一德一心勩相我國家則  
亦惟念流澤之由褒大顯榮上及三世蓋尊尊者  
重善善者慶長古之道也具官某體仁蹈義飭于

躬錫祚流光燕及乃後今予命以維垣一品之秩  
賁于廟豈惟示吾尊異元臣之心抑亦彰未慶源深  
長流衍未艾潛德闕耀發見有時以勸天下之爲善  
與臣子之顯親一舉而數美備豈不休哉可

曾祖母贈楚國夫人

朕惟國家崇厚士夫自通籍以上皆得寵綏其先其  
位愈高其體愈隆推而上之至于相臣遂及三世而  
命爵品秩又皆加異凡以禮之宜與稱所當然也具  
位某氏柔明端靖蹈履令規仁慈惠祥開相後裔乃  
眷元輔是惟聞孫今進登厥位而不推錫恩寵以賁

于幽扃何以昭積善之報而慰慕遠之心哉追錫命書改封全楚庶其如在尚克有榮可

祖封魯國公

積厚者光遠施隆者享豐固有高門而俟軒車乃若植槐而須袞繡修德在已責報彼天殆厥應之信然何可必之如此具官某才周世用行迪天常秉節自彊蚤共高於問望韜光不曜晚弗見於功名委社後昆調元台路肆於柄任之始念爾陰功之由詔爵追榮已極上公之貴按圖易壤更新東魯之封尚體密章永寧泉室可

祖母贈魯國夫人

爵視德以俱崇禮隨情而始稱眷惟元輔方懋遠圖  
探尊祖之心既加崇於廟室推齊體之義爰竝下於  
恩書具位某氏秉則淳和凝資冲靜柔風懿範既克  
相於有家厚德陰功乃大昌於厥後屬聞孫之登任  
知慶澤之由來位正小君已疏榮於象服封開大國  
仍易地於龜蒙尚想營魂克祗茂典可

父封慶國公

臣子之道忠孝而已得時行道既盡忠於國原始追  
遠必思逮其親朕既歷選于衆得天下之賢而命之

輔相又推其欲報之心不愛高官重爵以崇寵其先  
豈非仁之至而義之盡者歟具官某宅心澹夷制行  
中正蹈履仁義弗昌于時卷藏材猷全畀其子今吾  
丞相佐佑厥辟勤勞國家則惟爾義方之教用能銜  
訓象美底其忠嘉肆於柄任之始命以全國美封告  
于廟室豈惟發揚潛德之光抑亦褒大慶祥之自沒  
而不朽尚榮享爲可

母封吳國太夫人

朕覽魯侯燕喜之章想其雍雍怡怡內外和懌固常  
三復興嘆以爲人臣之遇旣致位於顯崇復榮親於



孝養信天下之至樂無以易也今吾丞相寅亮元化  
辨章萬微退食委蛇有母而壽茲非朕心之寵嘉乎  
其位某氏生稟柔則動合令儀信順靖恭稱內助之  
正慈和嚴翼具聖善之資果見嗣賢是陟相位肆稽  
彝典爰易名封且袞繡拜前簪紱滿後俾夫族黨胥  
慶知天報之豐邦國具詹幸親榮之盛則惟爾訓慈  
之厚豈不顯哉可

妻封越國夫人

朕觀召南之詩知夫賢人君子身有爵位上宣勞於  
王室下施澤於國人其所以夙夜匪懈克底成績則

亦惟內助之賢乃有濟也今予登用一相儀刑列辟肆推伉儷之體併錫褒崇之章豈非此虜具位某氏懿和稟質溫靖成儀嬪于德人動以禮法爰舉典章之舊俾新脂澤之封尚服寵榮益綏福履可

### 趙介降兩官

朕保民如保赤子惟恐傷之爾受命典州宜知德意乃剝民以資妄用不黜可乎降秩兩階尚爲輕典可

### 曾守約降兩官放罷

朕甚惡將帥剝下以自豐爾甫分戎寄已肆貪心降秩免官尚爲寬典可

張士份降一資

賦有經常一豪過之卽傷吾民爾撫字無方刻剝是務閱實以聞聊用薄罰可

韋潛心降雨資放罷

周官以豬蓄水以澮寫水凡蓄水者正以待旱而灌輸也爾昧於適宜幾以召亂繆戾如此蒙黜何尤可  
李椿落致仕除顯謨閣待制知潭州

朕厲精政理遴選帥藩念南紀之上游孰寬予顧訪東山之故老強爲我興具官某學造誠明智周貫變端純簡重曾不越於宮庭清粹澹夷亦無窺其涯涘

曩綴甘泉之從歷宣外屏之勞旋據禮以告歸迄挂  
冠而厲俗眷言巨鎮夙重長沙藩翰須賢方當宁周  
詢之日邱園亢志豈長才高臥之時宜下垂車卽紆  
懷綬仍念分符於遠服更令峻職於西清惟風俗周  
知當有爲而人服惟吏民素習固不令而化行尚底  
政成更勤猷告可

江溥除直祕閣

西崑冊府東觀道山凡預選掄莫非俊乂至於官稱  
論譔地重高華朕今以清名顯職皆爲勸功之具非  
績用卓然協于輿論不以輕畀也爾素推才望嘗任

臺網不避當塗無爽正論今以使者節持平一道乃  
能以其餘力審覈邊防徹于聽聞良所嘉賞且身行  
重湖風波之外名繫蓬萊雲氣之間吏民觀望不亦  
美乎宜思忠勤益務報稱可

沉作賓再任評事

廷尉有平朕所遴擇凡其以稱任聞者不遽易之也  
爾庀職有年議法無枉爰俾因任尚究所長可

潘師旦罷閤職轉一官

帝宸二閣職近地親肆推懋恩率用優比爾久恭乃  
事今解厥司眷言勞動宜有褒異且一官之賞朕亦

甚吝毋曰持例可得而不思報哉可

吏部員外郎蘓詡陞郎中

文昌諸郎俱世高選校勞定位纖悉不差蓋重其任也爾名臣之後詳練靖嘉列屬三銓甄序惟允今推次閥閱宜在正員之序不旣寵乎位班雖升職任不易夙夜匪懈迄究爾庸可

何杞特降兩官

監臨虧失國有彝章爾掎削紛紜幾以逃責獨不念無辜之民乎帥臣以聞不可無罰可

張子顏降敷文閣直學士提舉江州太平興

國官

朕厲精政體勤恤黎元比聞近輔之邦適爽順成之望亟下命令悉捐賦輸宣吾德心屬在帥守具官某蚤登禁近屢守藩方念其踐歷之多寄以撫綏之任方矜存流冗屢頒漢詔之寬乃督迫催科靡念越人之瘠屬披臺劾已釋郡章宜降職於清班俾奉祠於外館尚思前失益勉後圖可

內侍寄資武功大夫張安祚寄資武義大夫謝仔與轉歸吏部

內侍之官秩至東班供奉則有寄資逮歸銓曹乃畀

外任此舊典也爾服勞親近厲志端勤既躋官省之  
司宜正武階之秩雖循常比實出殊私且恭則寡過  
密則遠嫌可不勉哉可

宇文紹奕叙官

國家黜幽甄叙有法未嘗以一青棄材也爾向坐簡  
劾既閱歲年應于常科還爾舊物盍思所以報此哉  
可

廖遂特降一官

搢紳庸行無越廉隅審如章聞爾何甚已尚緣去斥  
寧不究窮鑄官一階當識寬宥可



楊丙降一資放罷

職爲司屬奉教令趨期會宜也爾緩不虔又以計去  
寧無責乎可

崔舍人西垣類彙卷第一

崔舍人西垣類藁卷第二

劉堯咨該人使到闕應奉十番特與遙郡上  
轉行一官

朱華上閣位序高榮凡列職其間積其伐緒皆有以  
優異之示厚恩也爾奮由將闕進服宸庭歲時旣多  
勞績是著今俾疊上二秩之賞陞列遙團不旣寵乎  
恭以承事恪以守業率履不懈圖究爾能可

孟俊特降一官

東南諸將碁布眚分鈐制之官所望忠實爾紀律素  
弛廉級已夷肆爲詭辭溢見章奏鑄官一秩可不戒

乎可

魏泳降兩資放罷

穀粟無征法也况當救荒之日乎爾背違德意苛擾商舟免官黜資聊示薄責可

趙粹中落職

百年去殺政常出於寬平三宥致刑事當先於清審具官某項由法從俾典方州銳陳郵置之姦顯正市闌之戮既更累歲乃露幽寃五聽有孚何偶乖於克允一成不變遂濫及於無辜莫追祝網之寬尚想沈泉之痛究觀厥實駭動予衷死者不生懲之奚益姑

盡錫於乃職庶具警於攸司祇服恩容勉圖報効可  
鄧從訓職事有勞特與遙郡上轉行一官

朕欽修孝養祇奉慈庭凡給侍左右苟有勞能未嘗  
不優賞而昭勸之也具官某愿忘飭躬恭恪承事旣  
乃歲籥良協眷懷宜進序於遙封用增華於內列維  
忠維勤夙夜不懈圖所以稱朕意者可不勉哉可

雷世方降一官

將帥之道維公與廉乃可服衆自昔所記市租輸莫  
府賞賜入軍中凡皆一毫不私也况敢奢侈以自奉  
乎爾用公財造私舟得於風聞事有實狀錫官一等

聊警乃心尚知戒哉可

王孝通特降一資

網運之事屬之搢紳猶有以侵移聞者尚誰使乎黜  
官一資聊示薄罰可

張適朱傑各特降兩官放罷

黎民荐飢荒政畢舉一時乏事之吏咸用峻典朕爲  
赤子計者重也爾等各負曠責具形劾章錫秩免官  
理不容已可

辛棄疾落職罷新任

淫風殉貨義存商訓之明酷吏知名事匪漢朝之美

豈意公平之世乃聞殘黷之稱罪旣發舒理難容貸  
爾乘時自奮慕義來歸固嘗推以誠心亦旣委之方  
面曾微報効遽暴過愆肆厥貪求指公財爲囊橐敢  
於誅艾視赤子猶草菅憑陵上司締結同類憤形中  
外之士怨積江湖之民方廣賂遺庶消譏議負予及  
此爲爾悵然尚念間關向舊之初心迄用平恕隆寬  
之中典悉鐫祕職併解新官宜訟前非益圖後効可

錢愷守本官致仕

朕惟行尊賢穆恩厚昭陵舊館淒涼悵穠華之已遠  
高閣赫奕望喬木之猶存肆乃後人見茲耆老

某賦資淳壹秉誼直溫習見稔聞多前人之風度侃  
言循行守君子之宮庭方圖畀於恩章遽願還於官  
政抱誠既切抗志莫回沁水名園應動襟懷之遠都  
門祖帳遂全名節之高勉服寵光茂終慶譽可

薛舜臣特降一資

刑獄朕所甚重爾爲縣令荒怠厥事乃使狴牢之內  
有死於淫酷者一資之黜豈足償寃當體寬容尚知  
愧畏可

錢愷贈節度使

朕敦厚風化優崇族親角東路之巾甫遂垂車之志

薄西山之景遽聞易簀之言具官某風矩詳華才資  
清邁訪建武功臣之世盛矣無窮閱長安戚里之家  
歸然獨在尚須耆艾足寄典刑駭遺書之上聞悼故  
老之凋盡念此感慨優其寵榮絳節先塗莫致生前  
之遇篆章書柩聊爲沒後之光諒爾沉冥知予傷惻  
可

魏庭瓚董壽祺應奉金國人使到闕及一十  
番與轉一官

周旋軒墀贊相賓客其責皆非輕也爾承事恪勤詔  
禮安裕閱歲旣久積勞當遷一官之賞尚承敬哉可



楊思濟特降一官

小民乘饑譁聚有訴鎮以安靜徐爲辯詳宜也爾惑亂失措可不責乎可

王定國特降一官

天下之士會於銓曹里居官歷必有實乃可攷也爾遠通戶籍私矚吏胥閱實以聞不可無罰可

崔亮捕賊沉師等陣亡特與贈四官

共武之臣所資於忠力死綏之節當厚於恩章爾策略敏明器懷沉銳久領師干之寄適承名捕之書匹馬直趨庶成功於必取妖弧匿發偶殞命於不虞莫

歸先軫之元徒負班超之願優加卹典驟越彝章尚  
發予懷慰忠魂於地下亦令爾士激義氣於行間可

### 耿秉降一官

朕憂民之飢由已飢之凡捐財發粟皆以拯民也爾  
夙負材稱尤高郡選適因匱乏遂有轉移雖心乎奉  
公殆與朕本指良異可無責乎尚緣荒政已著勞庸  
薄罰示懲餘毋胥効可

### 趙汝愚回授贈母

仁治之朝凡以親請者朕未嘗不致其厚也爾子願  
馳一秩追責九原則其賢亦可知矣爰頒明綸俾遂

正史卷之三十一  
五  
素志幽爽未泯得無慰哉可

劉焯落集英殿修撰

朝廷清明公道昭達威用峻罰酌從與言爾蚤列雋  
英素高議論出於選擢付以蕃宣今言者歷數過愆  
置在窮竒之目鋪觀反復迹狀燦然噫使朕賞不當  
功罰不當罪皆爾私意變亂所致可不責耶盡錫寵  
名少謝衆志祇予寬典尚省厥尤可

廖遵降一資

外臺之臣寄朕耳目所以取成而制賞罰者也爾前  
使遐方嘗上重劾逮茲覆視見乃橫誣噫使予施峻

罰於無辜抑何誤耶降秩一階尚爲寬典維明克審  
則免後先可

曾寘降一官

王畿之內纖悉必聞爾爲小吏奉職不謹閱實有狀  
聊用薄罰可

趙伯驩落階官

右班至正任恩禮重矣朕未嘗輕以假人也比承慈  
訓褒厚宗盟乃下贊書用成德美爾稟資和裕履行  
端純總近甸之軍符司外臺之臬事久于任使見乃  
勤勞竝用推錫恩章進于扞防之秩不旣顯哉服命

數之殊常思寵名之長守惟謙惟畏是稱所蒙可

趙不惹贈左領軍衛將軍

朕惟祖宗本支蕃衍百世間聞淪喪有足悼傷不有  
厚典何以寄予恤乎爾邦族之良淳和孝友曷嗇其  
子乃弗永年朕用不釋于懷命以領衛之秩賁于九  
原哀榮有終恩義俱盡尚有知者亦克享哉可

林和林賜各轉一官

頑兇輕命出沒溟波殘擾善良寢以稽捕爾等履危  
蹈險禽獲無遺顯伏重刑海氣明靜咸進官秩尚知  
報哉可

趙不諧換率府副率

朕優崇近親敦厚美俗間者下升等之詔所以壯宗盟而華班序也爾端純靖共蹈履無失宜易環列俾參昕朝尚承敬哉可

張子震補承信郎

內省去職聽奏未仕者二人非舊制也用是官爾宜敬以承可

姜棫應奉人使到闕及一十番與轉一官

端宸二閣右列高選也爾敏給靖恭祇事維久贊道賓客禮無闕違命進官秩尚思報哉可

杜沂除閣門祇候

朕惟昭憲皇后之家浸鬱弗昌明發有懷爲之惕然爾純謹和雅自有前光宸閣清華命以庀職豈不宜哉可

王珪降一資

郡獄有寃至於濫殺究其蔽斷初不至斯固有任其咎者矣爾得無薄罰乎可

施師點奉使回程特轉一官

禮樂光華方被張旌之遣山川跋履又觀濡轡之旋具官某德器純深才資高邁駕一乘之傳不憚于行

道二國之言罔違於禮肆疇褒典俾進文階維關河  
感槩之情暨原隰咨詢之實尚殫猷告茂對恩光可  
鄒詡副使回程特轉一官

玉帛往來內外和樂于時拜五善之詩奉萬里之使  
亦人臣之至榮也爾奮迹魏科典教右學才業之茂  
有達朕聞選以輔行迄於成禮勞還進秩尚承敬哉  
可

張大聲孫孜特降一資

朕救災卹患所賴羣力今使者上不職之吏宜有薄  
罰可



范珣武劉銑陳拱夏之禮各降兩官

羽林之兵有干等級是必紀律素弛恩威不孚而致此也豈特逐捕弗謹爲罪乎偏裨而下降黜以差尚警其餘善撫吾士可

張瓘降一官放罷

畔官離次國典有常爾爲貳郡宜知職守乃翩然自如肆已之便尚有法乎可

張偉降兩官

一夫肆兇干犯軍律玩弛不謹宜有自來凡預典臨皆被黜罰爾職雖下可得免乎可

馬希古趙友諒各轉一官

古者醫政視勞制食所以引人之進於藝也爾執伎  
有稱服勤維久肆稽功緒俾陟官階維謹以恪尚益  
勉哉可

趙鞏施栢各轉一資

近臣出疆體優事重凡其選置行與居者皆被勞還  
之賞不旣寵乎可

朱熙績降一資

鄉郡有飢義當救恤乘時邀利是誠何心雖爾不足  
以責此違令鼓衆可無罰乎可

郭杲轉遙刺

刺史古官也漢制秩二千石宣詔牧民乃古方伯之任今列于勇爵號爲顯崇雖在遙寄亦不輕予爾分提戎戍安鎮邊陲攝領帥藩積更歲籥疇其勞効錫以寵光衛上盡忠撫士盡愛圖所報稱可不勉哉可

李師信補挈壺正

疇人之官序于爵品爾服初命宜謹厥司可

楊璽李溫各轉一官

祇奉賓客咸有優恩所以勸人之謹於事也爾以積勞應于遷令尚敬承哉可

王蘭兼崇政殿說書

朕從容清燕延見儒英講道先聖之遺書誦說前賢之名論信天下之樂無以加也自非直諫多聞古之所謂三益者尚誰居乎爾氣節高邁學問淵純中立獨行無所回曲擢在臺察斷由朕心風稜言言不善知懼今引以自近列于講席豈徒望爾於分章析句之間哉啓告利病分別正邪知無不言是乃報稱可

韓敏中降一官

天下財賦灌輸中都今民曹上稽違之狀罰難但已絀官示責尚敬承哉可

曾恠降兩資

縣有戎兵將以警盜爾爲令亡狀漫不知卹何以責其力乎可

趙詠之回授封母

朕以孝理天下凡搢紳之以親請者未嘗不曲從其欲也爾子願馳已秩圖報母慈推錫命封賁于泉室可

崔舍人西垣類彙卷第二

崔舍人附錄

告詞

除祕書省正字告

乾道九年二月二十五日王淮行

勅左宣教郎林杓等朕聞三館以待方聞之士異時  
詞臣講官與夫司言責掌諷議爲時名臣者由此塗  
出故擇之必精試然後命所以重其選也以爾杓博  
學而多聞爾彌大方重而有立爾敦詩閱毅而不同  
振藻儒林見謂國器奏篇來上煥乎可觀宜從英俊  
之遊往司是正之職益務涵養以副朕知可

進中興會要轉宣教郎告

乾道九年十月十四日王淮行

勅左迪功郎守祕書省正字陳自脩等昔司馬談爲  
太史方天子建漢家之封而留滯周南以所欲論著  
屬其子遷於是紬石室金鎖之書而史記作焉蓋抱  
良史之才當筆削之任遇大典冊曾不得措辭其閒  
可勝惜哉惟我 太上皇帝中興盛典講於倣擬之  
際得於授受之日固已越商周而追唐虞久而無述  
懼有闕焉肆命大臣典領成書爾等俱以儒英入館  
閣佐太史氏親見聖王之傳顧不韙歟晉陟京聯以  
旌爾勞以貽訓于億萬世則爾與有無窮之聞可

除崇政殿說書告

淳熙元年正月  
初四日王淮行

朕蒐攬英雋置諸冊府如藝梓杞待其成材凡一時  
詞臣講官鮮不繇此有能翹然自拔於衆人之中則  
將試而用之進以不次爾性識敏悟學業夙成見於  
文詞有秀傑邁往之氣朕旣爲爾綿絕典故攝直翰  
墨之林經幄需賢肆以命爾可謂士之榮遇者矣昔  
魯秉周禮敵人不敢加兵禮之有益於國如此据古  
以言無爽朕聽可

除著作郎告

淳熙六年正月  
二十日陳騏行

爾作屬西府精於編摩攝直北扉工於潤色亟立要  
津衆亦爲允然猶儲之東觀何哉益夷玉不厭於韞



藏良材益務於培養矧慈極所授訓言隆興以來政  
事實資閱博纂成冊書往奮筆焉豈曰弗稱可

進日歷轉奉議郎告

淳熙六年四月  
初八日李本行

王者世有史官君舉必書所以謹言行昭法式也爾  
充職蘭臺典司著謨傳信萬世實藉三長汗青告成  
宜進官列更勤繼錄以對恩榮可

進會要轉朝奉郎告

淳熙六年八月  
初十日李本行

勅朝散郎試祕書少監施師點等朕自膺傳緒常務  
策勵以時繫年廣記已藏於巖密舉綱撮要類分將  
備於討論爾等學擅該通才高述作備竭勤勞之力

共成詮次之功遂續前編同標鉅典宜被進官之寵  
用旌載筆之良祇服予恩益恭汝職可

進三朝寶訓轉朝散郎告

淳熙七年五月  
施師點行

朕欽惟藝祖肇造區夏太宗真宗繼統揚業其宏摹  
遠略載諸簡編以爲子孫億萬斯年之訓者殆與典  
誥相爲表裏朕丕承厥緒歷選名儒進讀於退朝之  
暇是憲是述罔敢荒寧逮茲終篇可無褒賞爾高文  
綺潤奧學淵淳進直北門親結九重之眷入陪西學  
光膺再命之榮屬恩典之遂行肆文階之序進其祇  
戒渙益勵忠規可

三  
除國子司業告

淳熙七年七月  
十五日鄭丙行

勅朝奉大夫國子司業兼國史院編修官兼太子侍  
講何耕等朕惟永平之際園橋門以億萬計正觀之  
盛闢黌舍千二百區人文之興治道以立茲用恢宏  
學校建置師儒庶幾禮義之行可致肅雍之化以爾  
耕渾然道德不見圭角爾敦詩卓爾文辭富有波瀾  
秀出班行表表愈偉領袖後進于于而來其竝列於  
成均庸丕闡於儒教化民成俗必由學式崇賢士之  
關惇師考德以爲官益劭範模之美可

再除宗政殿說書告

淳熙七年七月二  
十三日施師點行

春秋王道之權衡也朕昕朝之餘詳延鴻博敷繹於前蓋將究其指歸以補治道之未至與其選者寔難其人爾才茂而識明學深而文富北扉視草增潤於皇猷東觀紬書追芳於良史是用陪露門之間燕專麟筆之討論推褒貶於一字之嚴辨得失於三傳之異毋嫌諄復庶廣緝熙爾嘗爲奚侯多訓可

進讀正說轉朝請郎告

淳熙八年五月十三日木待問

朕永念定陵貽孫謀於億世肆臨講殿敷正說於諸儒爾思好深湛辭尚體要司成曹序蔚爲雋造之宗寓直複門式擬坦明之制進聯侍學論本□□茲□

絕業之修宜錫懋官之寵侈而稽古昭我右文可

除中書舍人告

淳熙八年九月二十  
四日未待問行

朕澄出治之源公馭臣之柄遴求端士寘諸禁密之  
聯比飭溫言責以論思之益矧參華於內史必試可  
於真材具官崔敦詩文企前修器先遠識存游冊府  
胸中儲未見之書晉長膠庠館下服于勤之業經幙  
久嘉於侍學綸闈獨擅於摛詞充爾所長恢乎餘地  
載惟西臺命令之本豈徒東里潤色之工一賞或僭  
則國維不張羣枉未排則官邪猶在能盡言而無隱  
斯庶政之惟醇蔽自予衷擢居是選朕於知人則哲

追盛治於有虞爾其遇事不回繼祖風於祐甫

致仕告

淳熙九年十二月十五日宇文价行

持橐甘泉方極清華之選挂冠神武忽騰休退之章  
曾雅志之莫回宜贊書之寵錫具官崔敦詩才猷敏  
瞻問學淵源入踐班聯早膺識擢三館兩學久陪英  
俊之遊西掖北門獨擅詞章之媿有資獻納遽爽節  
宣正當強仕之年欲致爲臣而去肆稽彝典寵陟文  
階勉加調攝之功益介康寧之福

贈中大夫告

淳熙十二年二月十六日王信行

未老歸休駭予聞聽將終占奏嗟爾淪亡春□□□

邇聯頌愍章之殊渥具官崔敦詩文詞藻蔚問學  
澄蚤陪英雋之游徧歷清華之選代言西掖簡自朕  
知攝直北門創田卿始方快雲霄之直上忽驚蒲柳  
之易衰緬懷朝夕論思之誠深悼春秋窳窳之事用  
稽令典峻陟文階豈惟榮及於爾終抑亦賞延于厥  
後尚其英爽服此寵光可

崔舍人附錄終